

Igitan ən Nəmmuzal

Əkkozat təmərwen n əzəl win dat əmədkəl ən Ƴaysa

Əsənti

¹ Ya Tayofil, əlkəttab-in wa azzaran əktâbay daƣ-as aratan kul win as issənta Ƴaysa igi-nasan d əsəssəƣri-nasan,

² har əzəl wa d immədkal əs jənnawan dəffər as iga ammaran-net əs tarna n Infas wa Zəddigan i nəmmuzal-net win isannafran.

³ Əntanay en da a issəkna iman-net dəffər alƣazab-net. Isattad-asan əs təməwiten ag-gotnen tanakra-net daƣ tamattant. Əkkozat təmərwen n əzəl a iga itinəfilil-asan, itagg-asan isalan ən Taymar ta n Məşşina.

Arkawal n assa n Infas wa Zəddigan

⁴ Əzəl iyyan idrâw dər-san imensewan as tan-omar, inn-asan: «Ad wər təgmədəm aƣrəm ən Yerusalam. Əqqələt y arkawal n Abba wa dawan-əmala,

⁵ fəlas Yaxya aman a daƣ issəlməƣ aytedan mišan kawanay, ƣur adan wər nəggət, Infas wa Zəddigan a daƣ za tətəwəsəlməƣam.»

⁶ Əddəwan ƣur-əs nəmmuzal-net as t-əssəstanan, ənnan-as: «Əməli, awak əmərədda ad za təssuƣələ təmənukələ y İsrayil?»

⁷ Inn-asan: «Wər kawan-təwer masnat n al-waq wala tamert win otas Abba əs tanaya-net.

8 Mišan ya a fall-awan d-azzabbat Infas wa Zəddigan, təgrəwam tarna, təqqəlam šigəyyawen-in daɣ əxrəm wa n Yerusalam, d akal kul wa n Yahudəyya əd wa n Samarəya, taglim har da d-iraz amaɗal.»

Əmədkəl ən Ƴaysa

9 As inna awen, immədkal əs jənnawan. Əswādan daɣ-as har dasan-tu-təlsa tagarak.

10 Harwāda əggizzayan ijənnawan assaɣa wad itagazzay Ƴaysa as nafalalan əššin meddan ən samlalan dəgma-nasan.

11 Ənnan-asan: «Ya meddan ən Galilaya, mas təbdadam, təswādam daɣ jənnawan? Ƴaysa wa immədkalan gar-ewwan da əs jənnawan, ilkâm a d-iqqəl s əmmək wa da as tu-tənayam ikk-en.»

Ənətti n Əlkənisat - Šigəyyawen daɣ Yerusalam

Awedan wa z'iggəzan edag ən Yahuza

12 Təzzar əfalan nəmmuzal adɣaɣ was itawannu wa n Eškan ən Zaytun, əqqalan aɣrəm ən Yerusalam a das-ihân edag ən teklay tas tətawala turagat-net daɣ əzəl wa n təsanfawt ən Kəl-Əlyəhud, almaɣna edag ən kilaw iyyanda ən teklay.

13 As din-osan, əggazan ehan wa n afalla daɣ suru wa daɣ saganan. Əmosan Butros, Yaxya, Yaqub, Andrawəs, Filibus, Tuma, Bartulamawəs, Matta, Yaqub wa n ag Alfay, Simyon was itawannu wa Isaggatakken əd Yahuza wa n ag Yaqub.

14 Ketnasan tiddawan-du y igi ən təwatriwen s əwəl iyyanda, əntanay əd mədrayan ən Ƴaysa əd tədoden təha Maryama ta n anna-net.

15 Adan en da a daƳ ibdad Butros gər nəlkiman ən Ƴaysa, əmosnen temeday n awedan əd sanatat təmərwen, inn-asan:

16 «Imədrayan-in, əşšil ad andu awa inna Infas wa Zəddigan daƳ Əlkəttaban irəw s əmi n ənnəbi Dawəd daƳ salan ən Yahuza wa d-issəlalan aytedan win əbaznen Ƴaysa.

17 Fəlas kala daƳ-naƳ iddun nakkanay inəmmuzal, amaran igrāw adagar-net daƳ əşšəxəl wa dər-naƳ isanattaf Ƴaysa Əlməsix.

18 Aləs za wa, izzənza tawagost daƳ azrəf wa igrāw daƳ abakkad-net, dəffər awen uda daƳ-as əs tədist-net, ibbəqqat, iffəzzat awa ihan tadist-net kul.

19 Aytedan kul win əxsarnen daƳ Yerusalam əslān awen, har as tawagost ten əgan-as esəm daƳ awal-nasan "Akaldama", alamaƳna tawagost ta n əzni.

20 Amaran iktâb daƳ əlkəttab wa n Əzzəbur as: "İqqəlet ahan-net əməjir, a tu-wər-iləs awedan iguz." İktâb daƳ-as dəx as: "İggəzet awedan iyyan edag-net daƳ əşšəxəl."

21 DaƳ adi ilzâm-ana ad nəsənnəfrən iyyan daƳ meddan win dər nətidaw faw daƳ šikilan n Əməli Ƴaysa,

22 a d-ibazan Ƴur əzəl wa t-issəlmaƳ Yaxya daƳ aman har əzəl wa Ƴur-naƳ immədkal əs jənnawan. Aləs wa za nəsənnəfrən da, ad iqqəl təgəyya ən tanakra ən Ƴaysa daƳ tamattant.»

²³ Ǝssəbdadan əššin meddan əmosnen Yusəf was itawannu Barsabbas, gannin-as dəy Yustus, əd Matəyyas.

²⁴ Təzzar əttaran, ənnan: «Ya Ǝməli, kay a issanan awa ihan iwallan n aytedan kul, sakn-ana wa təsannafrana gər meddan win əššin a,

²⁵ fəl ad iggəz əššəxəl n anammazul wa igmad Yahuza ikka edag wa imosan wa-net.»

²⁶ Ǝgan šişaxeren, əbaznat Matəyyas, iddun dəy nəmmuzal win maraw d iyyan.

2

Assa n Infas wa Zəddigan

¹ As d-iɣlay əzəl n əmud ən Kəl-Ǝlyəhud was itawannu Fantəkawt, əddəwan nalkiman ən Ǝaysa ketnasan dəy adag iyyanda.

² Wala a ihogan igmad-du əjit iyyan ijənnawan olân d in aɟu issohen, itkar ehan ketnet wa dəy əqqiman.

³ Nafalalan-asan d ilsawan olanen d in abalagleg ən təmsay, əmməzzayan ilsawan en; əkkulluk n iyyan iwar iyyan dəy-san,

⁴ Idnay-tan Infas wa Zəddigan ketnasan, təzzar əssəntan awal dəy awalan wər nəmos win-nasan, s əmmək was tan-ikfa Infas wa Zəddigan fərregat n awen.

⁵ As itaggu awen, aɣrəm ən Yerusalam əxsâran dəy-as Kəl-Ǝlyəhud zizawatnen dəy əddin a d-əgmâdnen ikallan n əddənet kul.

⁶ As əslan y awal wen, təddew-du tamattay tagget, təzzar isammaklâl sər-san awen fəlas akkiyyan dəy-san isallu i nalkiman əššewalan dəy awal n akal wa d-igmad.

7 Iga sər-san awen əsəmməkləl labasan, gannin: «Xa! Aytedan a əşşewalnen da, awak wərgex ketnasan Kəl-Galilaya?

8 Mas za, akkiyyan dağ-na isall-asan əşşewalan awal ən marwan-net?

9 Ənta nakkanay əhân-anax aytedan a d-əgmadnen amadal ən Bartəya, d akal wa n Medəya, əd wa n Ałam, d aytedan əxsârnen dağ akal wa n Mezobotaməya, əd wa n Yahudəyya, əd wa n Kabadokəya, əd wa n Fontəs əd wa n Asəya,

10 əd wa n Frijəya, əd wa n Banfiləya əd wa n Masar. Wiyyad əgmâdan-du akal ən Libəya dağ xələyxələyan n əxrəm wa n Qərwan, wiyyad aytedan n Ğrrum,

11 wiyyad aytedan ən Kəret əd win Arabəya. Gər za win dağ-na əmosnen Kəl-Əlyəhud wala deş aytedan a d-əhdânen s əddin wa n Kəl-Əlyəhud, ketnana nəsall-asan əmmâlan dağ awalan-nana igitan ən tarna ən Məşşina.»

12 Ketnasan isimaklal sər-san awen, wər əssenən a ənnan, tinəmännin: «Ma imos almaşna n awa?»

13 Mişan ya wiyyad dağ-san əgan dağ nəlkiman tamakkakkayt, gannin: «Awen esmad n alşanab a tan-isammaswadan.»

Təlxutbat ən Butros əzəl wa n Fantəkawt

14 Təzzar ibdad Butros ənta əd nəmmuzal win maraw d iyyan, idkal əməsli-net işşewal i tamatay, inna: «Meddan ən Yahudəyya əd kawanay ketnawan win əxsarnen dağ Yerusalam, agriwat awa igan da, təssəsəməmə wəllən y awa dawan-zanna da.

15 Meddan win wər əmməswadan, arat wa təyilam əddi, fəlas taza alwaqan win aḡora awa harwa da.

16 Kala kalar arat wa imal ənnəbi Yowəl a d-osan, as inna:

17 "Inna Məššina: 'Ənta da awa du-z-asin daḡ adan n əddənet win əlkamnen: a du-zəzzəbbəḡ Infas-in fəl i t-illa awedan, əssuḡəlan maddanəwan d aššekkawan awa dasan-z-əməla; sənnəfiləlaḡ aratan əttinkalnen i mawadan-nawan, səssuga iḡmaran-nawan targəten.

18 Awalla, a du-zəzzəbbəḡ daḡ adan win den Infas-in fəl naḡbidan-in əd tənəḡbiden-in təzzar əssuḡəlan awa dasan-z-əməla.

19 Ad aḡaḡ təlməḡjujaten daḡ jənnawan, aḡaḡ aratan əmosnen alḡalamaten fəl amaḡal: Inḡəl əzni, tarḡu təmsay, akku əhu ijənnawan.

20 Təfuk ad tamattay, təqqəl šiyay; tizwaḡ təllit šilat n əzni; izar-du adi kul y assa n əzəl zəwwəran ilân əlxurma wa issəbɖad Əməli.

21 Amaran i igmayan daḡ Əməli əlḡillas ad t-igrəw."

22 Ya meddan n Israyil, səməmat i salan win: Ḡaysa wa n Nazaret, aləs a imos as kawan-issīkna Məššina əs təlməḡjujaten d aratan əmmittaynen, əd wiyyad əmosnen alḡalamaten win as t-ikfa igi-nasan gar-ewwan as ənta a isannafran. Kawanay iman-nawan təssânam daḡ adi.

23 Aləs di, Məššina di as tu-wər-illa a das-idrâḡan a t-igan daḡ fassan-nawan, imos awen arat ixtâs irəw, təgam iman-net s ətəwəsətəytəy wa tu-təsassagam i nəzzulam fəl təḡəttawt.

24 Mišan isənkār-t-idu Məššina, ikkas-t-idu daɣ tarna ən tamattant fəlas wər t-illa əmmək as t-in-təttəf tamattant.

25 Batu-net a daɣ inna ənnəbi Dawəd irəw: "Hannaya Əməli dat-i faw, iha aɣil-in fəl ad wər əɣşədan man-in.

26 Adi fəl falawasan man-in, təkna tədəwit iguz n awal-in, wala taɣəssa-nin wər nəmos tamaylolt da ad tagu attama,

27 id wər za tayyaɣ iman-in daɣ alaxirat, wala deɣ tayyaɣ Əmizdag-nak tarɣu təɣəssa-net.

28 Kay a di-issəknan tarrayt ta təha təməddurt. A di-təsəffəliwəsa wəllen əs tassaɣ ta dər-ək əgeɣ."

29 Imədrayan-in, əleɣ tarrayt n a dawan-agay isalan daɣ əkkâsaɣ aššak n əmaraw-nana Dawəd n as, aba-tu, itawanbal-in. Əzəkka-net, har azalada illa gar-ena.

30 Ənnəbi a imos, issân deɣ fəl arkawal wa fəl das-ihad Məššina n as, ilkâm ad agu daɣ taɣmar-net iyyan daɣ hayawan-net.

31 Daɣ adi Dawəd inây dat alwaɣ tanakra n Əlməsix daɣ təmattant, amaran isalan ən tanakra-net a daɣ inna: "Wər din-itawayya daɣ alaxirat, wala deɣ tərɣa təɣəssa-net."

32 Ƴaysa za wa, issənkār-t-idu Məššina gər nəmməttan, nakkanay nəggəyat adi.

33 Idkal-tu Məššina di n Abba-net ig-ay daɣ əɣil-net, ikf-ay Infas wa Zəddigan was iga arkawal-net, ənta amaran izazzabbat-t-idu fall-ana. Adi a imos arat wa təhannayam da, təsallim-as.

34 Wərgəɣ ənnəbi Dawəd a ikkan ijənnawan,

kalar ənta iman-net a innan: "Inna Əməli Məşşina y Əməli-nin: 'Yam dağ əxil-in,

³⁵ iket di ad taggağ izənga-nak daw daran-nak."

³⁶ Dağ adi akninet Kəl-Israyil kul masnat dağ as, Yaysa wa tətəytayam fəl təgəttawt, ənta a iga Məşşina Əməli d Əlməsix.»

³⁷ Idas awal wa iga Butros den iwallan n aytedan wəllen, ənnan-as ənta əd nəmmuzal win hadatnen: «Imədrayan-nana mas danax-ilzam igi-net?»

³⁸ Inn-asan Butros: «Utabat. Akkiyyan dağwan itəwəsəlməxet dağ aman s esəm ən Yaysa Əlməsix fəl ad təgrəwam təsureft ən bakkadan-nawan, təgrəwam təhəkkut ən Məşşina təmosat Infas wa Zəddigan,

³⁹ ənta arkawal wa iga Məşşina, kawanay as t-iga, kawanay əd hayawan-nawan d aytedan kul win əxsarnen dağ igəg, almağna aytedan kul win du-z-ağru Əməli-nana Məşşina əs man-net.»

⁴⁰ Har irəw Butros itagg-asan təlxutbat idgâz wəllen igann-asan: «Ağəzat iman-nawan dağ aytedan əxrâknən ən nəllubas win azzaman a.»

Tassağ ta əgan məzzəgzan win azzarnen

⁴¹ Aytedan win əzzəgzannen s awa inna, tawasalməyan dağ aman, təzzar tətəy tiddawat ən məzzəgzan əzəl wen s adag ən karad gim n awedan.

⁴² Wər əgmedan ar əs tağaray daw nəmmuzal, əmosan arat iyyanda ketnasan, darrawan imensewan-nasan, tuzanan amensay wa n saktan, taggin şiwatriwen.

⁴³ Təkna tasa ən Məššina igguz n awedan kul, inəmmuzal deḡ taggin s əlqudrat ən Məššina təlməxjujaten aggotnen d aratan əmosnen aḡalamaten.

⁴⁴ Ɛrtâyan məzzəgzan ketnasan, ədrâwan deḡ arat kul wa əlan.

⁴⁵ Zanzin-in daḡ ərrəzəḡ-nasan, tuzanan attaman-net, ewal awen s awa dər togdâ addararat n akkiyyan daḡ-san.

⁴⁶ Ɛzəl kul tamanayan daḡ Ahan wa Zəwwəran n Ɛlḡibada, nimannakan s awen. Tuzanan amensay wa n saktan daḡ nan-nasan, darrawan deḡ imensewan-nasan daḡ təfalawist əd tazdak n əwəl.

⁴⁷ Ɛmmâlan Məššina, əssiḡmaran-tan aytedan kul. Akk əzəl iššota Ɛməli əljəməḡat-nasan s aytedan win iḡlas.

3

Təməzzəyt n anabdon iyyan

¹ Ɛzəl iyyan iggəzzay Butros əd Yaxya s Ahan wa Zəwwəran n Ɛlḡibada y ad agin šiwatriwen šin tazzar.

² Alwaq wen da a daḡ d-immeway aləs iyyan a d-ihəwan əd bəddən s əmi n Ahan wa Zəwwəran n Ɛlḡibada was itawannu: «Imi wa Ihossayan» itawasansa fəl ad igməy takutay daḡ aytedan win tu-tagaznen. Akk əzəl itawasansu den.

³ As inay Butros əd Yaxya əbukan y iguz n Ahan wa Zəwwəran n Ɛlḡibada, a tan-itansay.

⁴ Idak-ku Butros əd Yaxya s asawad, inn-as Butros: «Ɛswəd daḡ-na.»

⁵ Ikna daɣ-san asawad, iga attama n ad t-akfin arat iyyan.

⁶ Təzzar inn-as Butros: «Urəɣ wala azrəf, wər tan-ələɣ, mišan a kay-akfa awa ələɣ: Əs tarnə n esəm ən Ƴaysa Əlməsix wa n əɣrəm ən Nazaret, əbdəd jəwənkət!»

⁷ Təzzar ibaz Butros əfus-net wa n əɣil, issəbdad-tu. Əddaran-du daran-net əd tələzzen-net alwaɣ wen da.

⁸ Innad-du zəllat ibdad, ijawankat. Iddew dər-san, əggazan Ehan wa Zəwwəran n Əlyibada, ijiwankat itaggad fəl tədəwit immâl Məššina.

⁹ Hannayan-tu aytedan kul ijiwankat immâl Məššina.

¹⁰ As din-əgran as, ənta a itaxamin ɣur əmi n Ahan wa Zəwwəran n Əlyibada was itawannu: «Imi wa Ihossayan», itânsay, əhagan, isammak-lal sər-san awa t-igrawan.

Emel ən Butros i tamattay almaɣna n əzuzəy wa iga y anabdon

¹¹ Iglə aləs wa itawazozayan da iltâɣ daɣ Butros əd Yaxya. Jiwanken daɣ tarrayt təfâlat as itawannu «ta n Suliman» as sər-san du-tozal tamattay ketnet. Igâ awen s aytedan əsəmməkləl labâsan.

¹² As inay Butros awen, inna y aytedan: «Meddan n Israyil, mafel ikna sər-wan awa əsəmməkləl? Təgâram daɣ-na šittawen, təgâm daɣ-na asawad n as nakkanay a izzozayan aləs wa əs fərregat-nana nakkanay iman-nana, madeɣ nəzzozay-tu fəl aššaddat ən təksəda-nana Məššina?»

¹³ Əməli n İbrahim d İsəhaq əd Yaqub, Əməli ən marawan-nana, ənta a ikfan akli-net Ҳaysa əlxurma. Kawanay iman-nawan a t-igan dağ fassan, tənkuram-tu dat Bilatəs s ənta ikus-net a otas.

¹⁴ Awalla tənkuram Alxadil di n Əmizdag, təgməyam a dawan-d-itəwəkkəs aləs n əməggi ən man.

¹⁵ Təgam iman ən wa ihakkin təməddurt. Ənta a d-issənkər Məşşina dağ tamattant, nakkənay nəggəyat adi.

¹⁶ Əzəgzan-nana əs tarna n esəm ən Ҳaysa a ikfan aləs a təhannayam da, təzdâyam-tu şığurad-net. İllikan as əzəgzan əs Ҳaysa a ikfan aləs di şığurad-net kul dat-wan ketnawan.

¹⁷ Amaran imədrayan-in, əssânağ as əljəhəl a dağ təgam adi kawanay əd muzaran-nawan.

¹⁸ Mişan əssənət as irəw as imal Məşşina dağ mawan n ənnəbitan kul as Əlməsix ilzâm-tu ad inəy alğazab, amaran issənda adi əs təməwit tədi da.

¹⁹ Dağ adi utabat tiksadam Məşşina fəl ad iməs ibakkadan-nawan,

²⁰ izəzzəbbət-du fall-awan şimerən ən təsasmit, issuxəl-du Əlməsix a dawan-isinafran dat alwaq, almağna Ҳaysa.

²¹ İlzâm-tu ad aqqam dağ jənnawan har d-asu alwaq wa dağ z'issuxəl Məşşina arat kul əmmək-net wa azzaran, imâl awen irəw əs mawan n ənnəbitan-net di zaddognen.

²² Awalla a inna ənnəbi Musa: "Məşşina, Əməli-nawan a dawan-d-isənnəfiləl iyyan ənnəbi ən şilat-in dağ mədrayan-nawan amaran ad təsəsəmam y awa dawan-z-annu kul.

²³ Awedan kul wa wər nəbbərdag y ənnəbi wədi, ad itəwəkkəs daḡ tamattay ən Məššina, ihlək."

²⁴ Ənnəbitan kul win hadatnen, a d-ibazan ḡur ənnəbi Saməwel əd win t-əzraynen ketnasan, əmâlan arat wa igan daḡ adan win.

²⁵ Kawanay a imosan iməkkusa n ənnəbitan win den, təkkošem deḡ arkawal ən tassaḡ wa idkal Məššina i marawan-nawan as inna y Ibrahim: "Tawšeten n əddənet kul ad əgrəwnat albaraka s əssəbab n əzzurrəyya-nak."

²⁶ Kawanay as d-isannafalal Məššina Akli-net Ḡaysa daḡ tizarat, issok-awan-t-id, fəl a kawan-akfu albaraka-net ikkəs akkiyyan daḡ-wan daḡ tarrayt ta n əššur.»

4

Tebadday ən Butros əd Yaxya dat Asaggawar wa Zəwwəran

¹ Harwada iššewal Butros əd Yaxya i tamattay as fall-asan əhan limaman əddəwan d əmuzar n aytedan win tagaznen Ehan wa Zəwwəran n Əlyibada əd Sadusaytan;

² ih-en alham n əsəssəḡri wa taggin tamattay, əmmâlan âs dad zamas Ḡaysa inkar-du daḡ təməttant, wədi inəmməttan da a daḡ-as d ənkaran.

³ Sattarmasan-tan əgan-tan daḡ kasaw har ifaw fəlas ehad a igan.

⁴ Mišan ya əzzəgzanan aytedan aggotnen daḡ win əslanen i təlɣutbat ten, təzzar əqqalan məzzəgzan edag ən səmmos gim n aləs.

5 As affaw əmmənayan muzaran ən Kəl-Əlyəhud, d əmḡaran-nasan əd musanan n Əttawret daḡ Yerusalam.

6 Ih-en Xānan wa n Əlimam wa Zəwwəran əd Kayif, əd Yaxya d Alaskandər d aytedan n aḡaywan n Əlimam wa Zəwwəran ketnasan.

7 Əssəbdadan Butros əd Yaxya gar-essan, əsəstanan-tan ənnan-asan: «Ma ilan tarna madeḡ esəm was təgam adi?»

8 Təzzar inn-asan Butros idkâran Infas wa Zəddigan: «Ya imuzaran ən tamattay-nana d əmḡaran n Israyil,

9 azalada nəbdâd dat asaggawar wa fəlas nəga əmazal olâḡan imosan tilalt y awedan ibdânan, amaran ilzâm-ana ad nəməl əmmək was itawazozay.

10 Əssənat za ketnawan, kawanay d aytedan n Israyil kul as, aləs wa ibdadan dat-wan da wər ila malad waliyyan, tarna n esəm ən Ḡaysa Əlməsix wa n Nazaret a t-izzozayan, wa tətəytayam fəl təgəttawt, issənkər-t-idu Məššina daḡ təmattant.

11 Ḡaysa, ənta a imosan "təhunt ta din-təgaram kawanay win makrasan, amaran ənta a təqqalat təhunt ta təkbalat ehan."

12 Ənta ḡas a iḡallasan, amaran wər ikfa Məššina gər jənnawan d amaḡal esəm n awedan iyyan was za nəḡləs ar wa-net.»

13 As ənayan taholat ən Butros əd Yaxya awal isammaklal sər-san awen fəlas əgran as aljahilan a əmosan, əssânan deḡ as aytedan a əmosan as kala tiddawan əd Ḡaysa,

14 mišan wər t-illa as əfrâgan a dasan-t-annin

fəlas hannayan aləs wa itawazozayan ibdād den yur-san.

¹⁵ Təzzar əkkasan-tan daɣ ahan wa daɣ immənay asaggawar, amaran ad tinəməggin šinaden.

¹⁶ Gannin: «Ma za nagu y aytedan a? Illikan as ənāyan Kəl-Yerusalem kul təlməxjujat zəwwərat ta əgan, amaran wər nəfreg əsəbbəhəw-net.

¹⁷ Mišan ya fəl ad wər wəziwəzan salan n awen daɣ tamattay kul, daɣ adi agiwatana y-asan šisəksədawen fəl a du-wər-ələsan adakal n esəm ən Ƴaysa dat awedan waliyyan.»

¹⁸ Təzzar sassaxran-tan-du, ərɣaman-asan fəl a du-wər-ələsan adakal n esəm ən Ƴaysa wala deɣ əsəssəɣri n arat a t-iqqālan.

¹⁹ Mišan inn-asan Butros əd Yaxya: «Kawanay iman-nawan ma tənnam: Məni daɣ aratan win wa oɣadan dat Məššina: awak əbərdəg y-awan meɣ əbərdəg i Məššina?

²⁰ Nakkanay za, wər nəfreg ad nayyu emel n aratan win nənay əd win as nəsla.»

²¹ Ilas-asan asaggawar igi n təsəksədawen, amaran oyyan-tan, id wər əgrewan əsaru fəl tan-əwwəddaban. Ʒgân awen fəl əddəlil n aytedan, fəlas aytedan en ketnasan taggin i Məššina təmmalen fəl awa igan den.

²² Ʒnta aləs wa igan təməzzəyt təmosat təlməxjujat ten, elan-net ogaran əkkozat təmərwen n awatay.

Šiwatriwen ən məzzəgzan əs Ƴaysa a dasan-olaman fəl man

23 Itawayya Butros əd Yaxya ƣas, əkkan imidawan-nasan, əssoƣalan-asan awa dasan-ənnan muzaran ən limaman d əmƣaran ən Kəl-Əlyəhud.

24 As əslan i salan win, jajjayan daƣ təwatray ta, s əwəl iyyanda, ənnan s afalla: «Ya Əməli, kay a d-ixlakan ijənnawan d amaɗal, əd ƣərwan d awa tan-ihan kul,

25 kay a innan əs tarna n Infas wa Zəddigan s əmi n amaraw-nana akli-nak Dawəd: "Mafel ƣiśaśatnat addawlaten n əddənet, tagginat təmattiwen śinaden wər nənfa wala?

26 Əbdadan mənokalan n əddənet, əddewan deƣ muzaran daƣ adag iyyanda, fəl ad am-maddin Əməli d Əlməsix-net."

27 Id illikan as, aƣrəm wa da, a daƣ immənay Herod əd Fons Bilatəs əntanay əd təmattiwen śin nəzzulam əd śin Israyil, əmməddan Ƣaysa, imosan Akli-nak zəddigan, wa təgeƣ Əlməsix.

28 Imos awen igi n arat ketnet was təxtasa fəl igi-net dat alwaq əs tarna-nak əd tara-nak.

29 Amaran əmərədda Əməli, əswəd daƣ təsəksədawen śin dana-taggin, təzzar təssəhəlaƣ-ana wəllen nakkanay an eklan-nak emel n awal-nak,

30 tilalaƣ-ana əs tarna n əfus-nak fəl ad nəzzuzəy aytedan, nagu təlməƣjujaten d aratan əmosnen alƣalamaten s esəm ən Ƣaysa, Akli-nak Zəddigan.»

31 As əƣradan təwatray-nasan inagaynagay adag wa daƣ əddewan, idnay-tan Infas wa Zəddigan ketnasan, təzzar ad əmməlan awal ən Məşşina śi wala tasa.

Tartəyt ta əgan məzzəgzan

³² Əljəməxət ta n məzzəgzan ketnet tənimmannak təmos arat iyyanda. Wər tan-ihə i igənnin awa ilə, i-net xəs-net, kalar ədrāwan arat kul wa əlan.

³³ Tagayyen nəmmuzal əs tarna zəwwərat fəl tanakra n Əməli Yəysə dəx təmattant, ikf-en dəx Məşşina ketnasan arraxmat-net s igət.

³⁴ Əljəməxət en wər tat-ihə i iddiraran əs wala, fəlas win dəx-san əlanen inan madəx şiwəgas zanzan-tan-in, tawayan-du attaman-nasan,

³⁵ hakkin-tu i nəmmuzal, amaran itəwizən gər məzzəgzan ewālan dəgran-nasan s awa dər ogdanat təməxutar-nasan.

³⁶ Awen da a igə aləs iyyan igān Yusəf imosan iyyan dəx Kəl-Lebi n akal ən Qibrus. Əntə əs əgan nəmmuzal təsəmmədəq Barnabas, almayna «Ənalam fəl man»

³⁷ İzzənz-in tawagost təhat tələ-net, eway-du attaman-net ikf-ay i nəmmuzal.

5*Bahu wa igə Ananəyās əd Safira*

¹ İll-ay aləs iyyan igān esəm Ananəyās a din-izzinzan, əntə əd tətut-net Safira, tawagost-net,

² təzzar inamarda əd tətut-net fəl a din-ittəf arat dəx əzrəf wa din-tənza, eway-du awa hadan, ikf-ay i nəmmuzal.

³ Inn-as Butros: «Ananəyās, mafel əs toyyəx Aşşaytan igə y əwəl-nak iguz ogdān d awa, ewad dəx-ak ad taga y İnfəs wa Zəddigan bahu s iduf wa din-təgeç arat dəx əzrəf wa din-tənza tawagost-nak?»

⁴ Harwa tat-in-wər-təzzənza, wərgex təla-nak a təha? As tat-in-təzzənza dex, wərgex azrəf wa tat-in-təzzənza kay a ittafan tanat-net? Daḡ adi, mafel təsamarkasa daḡ əwəl-nak igi n əmazal ogdân d awa? Wərgex aytedan as təgeḡ bahu, kalar Məššina əs tu-təgeḡ.»

⁵ As isla Ananəyâs i batu ten, ifataqqat, əgmadan-tu man. Təggaz tasa zəwwərat aytedan kul win əslanen awen.

⁶ Təzzar osan-t-idu meddan ən mawadan, əgan-tu daḡ šifit, əglan dər-əs ənbalan-t-in.

⁷ Edag ən karadat assaxaten dəffər awen, tosa-du təntut n Ananəyâs, wər təssen fəl awa igan.

⁸ Issəstan-tat Butros, inn-as: «Safira, əməli, awak tawagost-nawan azrəf wa tat-in-təzzənzam, ənta da da ketnet?» Tənn-as: «Awalla, ənta əddi da.»

⁹ Təzzar inn-as Butros: «Mənəmmək əs tənəmannakam fəl igi ən taremt y Infas wa Zəddigan? Səsəm, meddan win din-ənbalnen aləs-nam əllân dat əmi n ahan; a kam-awəyan kam da.»

¹⁰ Təfataqqat tamazayt ten da ḡur daran ən Butros, əgmadan-tat man. Əggazan-du meddan winad ən mâwadan a, osan-tat-du wər tədder, ewayan-tat ənbalan-tat-in dəgma n aləs-net.

¹¹ Eway-du awen as təggaz tasa labasat Əlkənisat ketnet d aytedan kul win əslanen awen.

Inəmmuzal dat Asaggawar wa Zəwwəran

¹² Taggin nəmmuzal təlməxjujaten aggotnen əmosnen aḡalamaten d aratan aggotnen simak-lalnen daḡ aytedan. Tamanayan faw məzzəgzan

əs Үaysa ketnasan, daw tafala n Ahan wa Zəwwəran n Əlxibada tas itawannu «ta n Suliman».

¹³ Əssiymaran-tan aytedan mišan wər-t-illa i ihalan a tan-in-ihaz.

¹⁴ Dər iga awen da ya, tittəyan s aytedan əknanen igət əgânen dağ meddan əd tədoden win zagzannen s Əməli.

¹⁵ Har as, tamawayan-du miranan tawasansin dağ tessaten madeğ şisalaten fəl afay ən tar- rayen ən Yerusalam, fəl a din-tawəd kuddeğ telay ən Butros wiyyad dağ-san as d-illam den.

¹⁶ Tazalan-du değ aytedan əknanen igət ən xərman win əhoznen Yerusalam, əs Yerusalam ewâyan imiranan-nasan d aytedan-nasan win əssəranan kələsuf. Ketnasan değ tiwəzuzəyan.

¹⁷ Əggaznat təsmiten labasnen Əlimam wa Zəwwəran ənta d aytedan kul win təximit-net, ən taggayt ta n Sadusaytan,

¹⁸ təzzar ənkaran sattarmasan inəmmuzal əgan-tan dağ kasaw dat awedan kul.

¹⁹ Mišan osa-du angalos n Əməli ehad, olam şisəhar ən kasaw, ikkas-tan-du, inn-asan:

²⁰ «Akkiwat Ehan wa Zəwwəran n Əlxibada, təməlam y aytedan isalan kul win təməddurt ta təynayat.»

²¹ Əgan nəmmuzal awa dasan-itawannan, ənzayan s Ahan wa Zəwwəran n Əlxibada, a dağ-as sasaxrin aytedan.

As d-osa Əlimam wa Zəwwəran ənta d aytedan win təximit-net, sassaxran-du Asaggawar wa Zəwwəran almağna iymaran kul win əmosnen şiggətawen ən Kəl-İsrayil, amaran əssəğmayan inəmmuzal əs kasaw.

²² Osan-in maššaxalan win tan-əgmaynen ehan ən kasaw, mišan wər tan-in-ogezan daḡ kasaw, təzzar əqqalan əgan isalan,

²³ ənnan: «Nös-in kasaw ketnet itimantamat, əbdâdan sojitan win t-ogaznen dat mawanet, mišan as nolam təsəhərt ən kasaw, wər daḡ-as in-nosa awedan waliyyan.»

²⁴ As isla kabtan ən sojitan win tagaznen Ehan wa Zəwwəran n Əlyibada, əd muzaran ən limaman i salan win den, əqqanan ḡafawan-nasan, ad samadranan daḡ awa z'iqqəl awen.

²⁵ Əhân ten da as tan-d-osa awedan, inn-asan: «Səsəmat! Meddan win təgam daḡ kasaw, əbdâdan daḡ Ahan wa Zəwwəran n Əlyibada, sasaxrin daḡ-as tamattay.»

²⁶ Təzzar igla kabtan alwaḡ wen da iddêw əd sojitan-net əbazan-du inəmmuzal, mišan wər tan-ədesan fəlas əksudan a sər-san du-təggəd tamattay əntanay en da, tanḡ-en əs zabaw ən təgur.

²⁷ As tan-d-ewayan, zazzakken-tan dat Asaggawar wa Zəwwəran, təzzar issəstan-tan Əlimam wa Zəwwəran,

²⁸ inn-asan: «Wərgəḡ nərxâm-awan wəllen fəl a imosan əsəssəḡri n awedan waliyyan daḡ batu n esəm di? Mišan ənəyat awa təgam! Təzawwazawazam daḡ Yerusalam ketnet əsəssəḡri-nawan, tərâm a dana-təssəwaram tamattant n aləs di.»

²⁹ Inn-ašan Butros əd nəmmuzal win hadatnen: «Məššina as danaḡ-ilzam a das-nabbardag, wərgəḡ aytedan!

³⁰ Məššina, Əməli ən marawan-nana a d-issənkaran ḡaysa was təgam iman-net s ətəytəy

wa tu-təgam fəl təgəttawt.

³¹ Ēnta a da, a idkal Məššina ig-ay daḡ əxil-net, ig-ay Ēmuzar d Ēmaḡlas y ad igrəw i Kəl-Israyil tarrayt ən tətubt, əgrəwan təsureft ən bakkadan-nasan.

³² Nəmos šigəyyawen n awen, nakkanay d Infas wa Zəddigan ihakku Məššina y aytedan win əlkammen i tara-net.»

³³ As əslan muzaran n Asaggawar wen i batu ten, iggaz-tan alham labasan, əran a daḡ-san əkkasan iman.

³⁴ Mišan ibdad iyyan daḡ-san ən taggayt ta n Fərisaytan igân esəm Gamaləyel imosan əmusan zəwwəran n Ēttəwret, əssiḡmaran aytedan kul, omar s ad təwəkkəsən nəmmuzal daḡ ahan wa daḡ iga əmənəy har din-agin arət n amazay,

³⁵ amaran inn-asan: «Kəl-Israyil, ənkədat y a was təram a tu-tagim i meddan en.

³⁶ Wər irəw adi as d-inkar aləs igân Tedas inna ənta imos arət, təzzar əlkaman-as meddan ewâdnen əkkozat təmad n aləs. Ēnta za iman-net itawanḡa kərəz, meddan win das-əlkammen wazawazan, ibənnan awen ketnet.

³⁷ Dəffər-əs, daḡ azzaman win tuddant, inkardu iyyan aləs igân esəm Yahuza wa n Galilaya, isaffallag aytedan aggotnen, əlkaman-as. Ēnta da za, itawanḡa kərəz, təzzar wazawazan aytedan kul win das-əlkammen.

³⁸ Daḡ adi daḡ talḡa ta, ənnəsixa wa dawan-zaga: Ēgmədat batu ən meddan en, tayyim-tan ad aglin; fəlas kud arət wa ənnəyən madeḡ wa taggin wər imos ar arət ərân aytedan a, wədi ad ibərəjjət.

³⁹ Mišan kud arat a imos as Məššina a t-iran, wədi wər təfregam əzərəz-nasan. Ēnkədat, a din-wər-tagrim iman-nawan təmosam əllid ən Məššina.» Təzzar əttafan ənnəsixa-net.

⁴⁰ Sassaxran-du inəmmuzal, sassagan-asan šiwwit labasnen s ələkkud. Dəffər awen ərxaman-asan fəl a du-wər-ələsan adakal n esəm ən Ƴaysa, amaran oyyan-tan.

⁴¹ Əfalan nəmmuzal ehan wa dəx itamanay Asaggawar wa Zəwwəran, əknân tədəwit id Məššina a tan-issəharan d ad tawasaknin məlka fəl əddəlil ən Ƴaysa.

⁴² Akk əzəl, gər za dəx Ahan wa Zəwwəran n Əlyibada wala dəx dəx nan n aytedan, wər kala əmməzzayan d əsəssəxri d igi ən salan n Əlinjil a tan-imosan əs Ƴaysa ənta a imosan Əlməsix.

6

Əssa meddan win tawasanafrannen y ad ilalan i nəmmuzal

¹ Azzaman en, inalkiman ən Ƴaysa tittəyan wəllen. Eway-du awen as gatantanan Kəl-Əlyəhud win əššewalnen təlyunant fəl Kəl-Əlyəhud win əššewalnen təlxibrit fəlas wər tətawagga masnat tolâxat dəx tədoden-nasan šin as aba meddan-nasnat xur təzunt ta tawaggin mensewan akk əzəl.

² Adi a fəl sassagan nəmmuzal win maraw d əššin əmənəy təha əljəməxat ən nalkiman ən Ƴaysa kul, ənnan-asan: «Wər ihor ad nayyu emel n awal ən Məššina fəl ad nannataf əd təzunt ən mensewan.

³ Daḡ adi imədrayan-nana, sənnəfrənət daḡ-wan əssa meddan as təga masnat fəl əlluḡ-nasan, idkâr-tan Infas wa Zəddigan, əmosan imusanan, a tan-nəsənnəttəf d əššəḡəl wədi.

⁴ Nakkanay amaran nəgməd s igi ən təwatriwen d əššəḡəl wa n amel n awal ən Məššina ḡas.»

⁵ Tanat ten, toggam-tat aljamayət ketnet. Təzzar sannafranan Əstefanos imosan aləs izzigzanan wəllen, idkâr-tu deḡ Infas wa Zəddigan, əd Filibus əd Frukurus əd Nikanor əd Timun əd Barmenas əd Nikolayos wa n əḡrəm n Antəyoḡəya as kala-net əddin wa n Kəl-Əlyəhud a iha.

⁶ Təzzar əssəbdadan-tan dat nəmmuzal, əssəwaran-tan nəmmuzal ifassan, əttəran-asan.

⁷ Ad itəyttəy ətəwəsəḡmar wa itawaggan y awal ən Məššina. Təzzar əttəyan nalkiman ən Ḡaysa wəllen daḡ Yerusalam, fadda əhdandu limaman ən Kəl-Əlyəhud aggotnen əs Ḡaysa, əzzəgzanan as Əlməsix a imos, əlkaman y awas omar.

Ətərməs n Əstefanos

⁸ Əstefanos aləs a imos iknân agaraw n arraxmat əd tarnə ən Məššina. Itamazal dat aytedan aratan simaklalten əd təlməḡjumatən əmosnən alḡalamaten zawwarnen.

⁹ Təzzar ənkarandə aytedan wiyyad n ahan n əlḡibada ən Kəl-Əlyəhud was itawannu «wa n Dərfan» âs wiyyad daḡ-san Kəl-Əlyəhud ən Qərwan, wiyyad in əḡrəm n Alaskandrəya,

wiyyad in akal wa n Kilikəya əd wa n Asəya, ad tamazağan d Əstefanos.

¹⁰ Mišan wər t-illa a dər din-əkkân masnat ta t-ikfa Infas wa Zəddigan.

¹¹ Təzzar ərzaman i meddan wiyyad dəx əssir fəl ad əssəwaran Əstefanos bahu, ann-in: «Nəsl-âs itaggu batuten əmosnen ikus ən tarna i Məşşina, əmosnat dəx iba n safrar n ənnəbi Musa.»

¹² Əgan s awen alham dəx tamattay əd muzaran ən Kəl-Əlyəhud əd musanan n Əttəwret. Wər isla Əstefanos wala as t-id-osan aytedan, əbazan-tu. Ewayan-tu s Asaggawar wa Zəwwəran ən Kəl-Əlyəhud.

¹³ Təzzar əssəbdadan şigəyyawen ən bahu, ənnanat: «Aləs wa, wər itəməzzəy d abayak n ahan wa zəddigan [wa] d Əttəwret.

¹⁴ Igmâd aşşak as nəsl-âs as inna, ilkâm ad ijəbbərəjjət Ƴaysa di ən Nazaret di ehan wa, isəmməttəy alxadaten şin dana-d-oyya Ənnəbi Musa.»

¹⁵ Əgaran aytedan ketnasan win asaggawar şittawen dəx Əstefanos, iqqal sər-san udəm-net zun in angalos.

7

Təlxitbat n Əstefanos dat Asaggawar wa Zəwwəran

¹ Təzzar issəstan Əlimam wa Zəwwəran Əstefanos, inn-as: «Awak aratan win tidət?»

² Inna Əstefanos: «Kawanay imədrayan-in d abbatan-in, səsəmat-i! Məşşina di n əməli ən tanaya, ənta as kala a d-inafalal y amaraw-nana

Ibrahim harwa iha akal wa n Mezobotaməya, dat tēməxsurt-net daɣ akal wa n Xaran.

³ Inn-as: *"Egməd akal-nak əd marwan-nak, takkay akal wa kay-z-assakna."*

⁴ Təzzar igmad Ibrahim akal wa n Kasdaytan, ixsar daɣ wa n Xaran. Dəffər iba n abba-net a t-id-isaggalat Məššina s akal wa da daɣ təxsaram da azalada.

⁵ Akal wa, wər daɣ-as ikfa Məššina Ibrahim edag as z'iggəzan təkasiit-net, wala ɣas edag daɣ issənsa adar-net, mišan idkal-as Məššina arkawal n *a das-t-akfu ənta d əzzurrəyya-net*, kuddeɣ as alwaq wen, wər ila Ibrahim ara waliyyan.

⁶ Ənta da awa inna Məššina: *"Thayawan-nak ad əxsəran daɣ akal a daɣ əmosan iɣərab, əqqələn daɣ-as eklan, ad tawazaxazzaban har aɣin əkkozat təmad n awatay."*

⁷ Mišan addawlat ta tan-təgat eklan, nak iman-in a tat-z-abəzan s əššəriɣa, dəffər adi, əkkəsəq-qan-du daɣ-as, əɣbədan-i daɣ adag wa da."

⁸ Təzzar inamagga Məššina d Ibrahim arkawal ən tassaɣ s ənta as imos əmənəkəd ejwal-net. Adi a fəlas, as ihəw barar-net Isəhaq isammankad-tu əzəl wa n əttam dəffər təhəwt-net. Iga Isəhaq awen da i barar-net Yaqub, Yaqub deɣ iga awen da i bararan-net əmosnen maraw d əššin, win əmosnen aljadan-nana.

⁹ Ənkaran meddan win əmosnen aljadan-nana əmmənəzaxan amadray-nasan Yusəf, təzzar əzzənzən-t-in, immeway s akal ən Masar; mišan issan daɣ-as Məššina.

¹⁰ Ikkas-t-idu Məššina daɣ tēməɣutar kul šin

iggaz. Ikf-ay masnat, d udəm xur Firxawna wa n əmənokal ən Masar, har as ig-ay Firxawna daw-əs, izzozar-tu y akal ən Masar d aɣaywan-net ketnet.

¹¹ Dəffər awen, iga laz daɣ akal ən Masar ketnet, ənta əd wa n Kanan. Ad taɣazzaban aytedan wəllen, aba i meddan win əmosnen aljadan-nana a ətšan.

¹² As isla Yaqub as Masar tah-et təbzəst, iza-mmazal sər-əs meddan win dana-sahhayawnen, imos awen iki-nasan y-as wa azzaran.

¹³ Xur iki-nasan Masar wa n əššin, ad izzəzday Yusəf iman-net i mədrayan-net, əggazan deɣ salan Firxawna n aɣaywan wa d-igmad Yusəf.

¹⁴ Issəgmay Yusəf abba-net Yaqub əd marwan-net kul, əmosan əssayat təmərwən n awedan əd səmmos.

¹⁵ Təzzar iras Yaqub akal ən Masar, s ənta a daɣ t-aba, aba daɣ-as deɣ imarawan-nana.

¹⁶ Emmewaynat təxəswen-nasan s əxrəm ən Šəkem, tawanbalnat daɣ əzəkka wa izzənza Ibrahim azrəf wa ibalalaɣan xur maddanəs ən Xamor daɣ Šəkem, y ad iqqəl tanbəlt-net.

¹⁷ As d-ihoz alwaq wa daɣ z'assandu Məššina arkawal wa fəl ihad y Ibrahim, tamattay-nana tətətəy, təmôs taxlək tagget daɣ Masar,

¹⁸ har *"iggaz iyyan əmənokal wər nəssen fəl Yusəf taɣmar [ən Masar]."*

¹⁹ Ikkərras kəl-tamet-nana, iga i marawan[-nana] əzəxəzzəb labâsan har âs išahhaššal-tan a din-tayyin bararan-nasan win əs səket əhəwan daɣ əsuf fəl ad wər əddəran.

20 Azzaman en da a daɣ ihəw Musa, imos barar ihossayan, igrâwan arraxmat ən Məššina. Ettafan-tu marwan-net daɣ ahan-nasan har iga karadat təlil.

21 Oyyan-t-in marwan-net ɣas fəl afay n Ənnil, tənay-tu tabarart ən Firɣawna, təkcal-tu təg-ay barar-net, təg-as əsədwəl wa za tagu i barar ən tədist-net.

22 Itawasasaɣru Musa masnat kul ta n Kəl-Masar, iqqal aləs ilân tənna daɣ awa igannu d awa itaggu.

23 As iga əkkozat təmərwen n awatay əd təhəwt, iggaz-t-id a din-asu imədrayan-net Kəl-Israyil inəy awa dər t-əllan.

24 Inay iyyan daɣ-san tawagginat-as taršəxšad, oɣ-as šinayən, iga iman n aw Masar wa das-itaggin ark aratan.

25 Iɣil ad agrin mədrayan-net Kəl-Israyil as Məššina a t-id-izammazalan sər-san fəl a tan-assafsu, mišan wər əgren awen.

26 Əzəl wa ilkaman i wen, osa-du əššin daɣ-san əknâsan. Igməy d a tan-aknu, nəməggin alxer, inn-asan: "Meddan, kawanay əmosnen imədrayan, mafel as tətinəmənɣim?"

27 Mišan ibdaq-q-in aləs wa itaggin taršəxšad y əmidi-net, inn-as: "*Ma kay-igan əmuzar-nana wala əmašray-nana?*

28 *Əngəm a tareɣ a di-taga tenaɣay ta təgeɣ y aw Masar wa n əndazəl?"*

29 Isla Musa i batu ten ɣas, təggaz-tu tasa, igmad Masar ilɣas daɣ akal wa n Midəyan, iqqal daɣ-as əxərib, izlaf daɣ-as igraw əššin bararan.

³⁰ As əganat əkkozat təmərwen n awatay dəffər awen, *"inafalal-as-du angalos daɣ təfsəq təbilaglagat daɣ taneray ɣur ədɣaɣ"* wa n Sinay.

³¹ Isammaklal əs Musa arat wa das-d-inafalal den. Itihaz-in za təfsəq fəl ad annaflay daɣ awen, as isla y əməsli n Əməli Məššina as das-inna:

³² *"Nak a imosan Məššina ən marawan-nak, Əməli n Ibrahim, d Isəhaq əd Yaqub."* Təndaw təysəst Musa ab'as ihal ad iləs asawad daɣ təfsəq en.

³³ *Inn-as dey Əməli: "Əkkəs iɣateman-nak, fəlas edag wa daɣ təbdadaɣ əddi amaɗal zəddigan a imos."*

³⁴ *Əɣɣəyyanaɣ aɣazab wa tətəggu tamattay-nin daɣ Masar, əsléy dey i hərərrəkitan-nasan. Əzzəbbe-du fəl a tan-assafsa. Əmərədda ihaz-du, a kay-zəmmizəla əs Masar."*

³⁵ Musa wen da, a ənkuran əs tənna ta das-əgan: *"Ma kay-igan əmuzar-nana wala əmaşraɣ-nana?"* Ənta en da za, a d-izammazal Məššina y ad izar i Kəl-Israyil, isəddərfət-tan, əs tarna n angalos wa das-d-inafalalan daɣ təfsəq.

³⁶ Ənta en da, a tan-d-ikkasan daɣ Masar s aratan simaklalnen win itaggu əd təlməxjujaten əmosnen aɣalamaten ən tarna ən Məššina. Iga aratan wiyyad simaklalnen əd təlməxjujaten əmosnen aɣalamaten ɣur aradaɣ wa əgan daɣ Agaraw was itawannu wa Zaggayən, igla itaggu awen da daɣ taneray har iga əkkozat təmərwen n awatay.

³⁷ Musa en da, a innan i Kəl-Israyil: *"Ilkâm a sər-wan d-izəmmizəl Məššina ənnəbi iyyan ən šilat-in, a kawan-du-z-igmədan."*

³⁸ As təddew tamattay n Israyil day taneray ən Sinay, ənta en da a ibdadan gər marawan-nana win den d angalos wa das-işşewalan fəl ədyağ wa n Sinay, təzzar ikf-ay Məşşina awalan hakkinen təməddurt y a dana-tan-iməl.

³⁹ Mişan ugayan marawan-nana s ad əlkəman y awa inna Musa, ugayan sər-əs, saddaranan ad əqqəlan Masar.

⁴⁰ Ənnan i Harun: *"Ag-ana imalan a z'əməlnen dat-na, fəlas Musa wa dana-d-ikkasan day akal ən Masar da, wər nəssen awa day-as in-igan."*

⁴¹ Adan en da a day əgan əssənəm igân təməwit a n abarkaw, əkatan fall-as. Isidawat-tan wəllen arat wa əgan əs fassan-nasan.

⁴² Təzzar inamaggag dər-san Məşşina, oyy-en əd man-nasan, əğbadan təfuk əd təllit d etran, imos awen arat ənnân İlkəttaban, as ənnan: *"Ya Kəl-Israyil, awak nak as tətəggim şizəgzam əd təkutawen day əkkozat təmərwen n awatay şin təgam day teneray?"*

⁴³ *Wərgex ahaket n əssənəm wa igan Molox a tewayam, əd şaşşelan n ətri wa igan Rəmfan wa n əssənəm-nawan, əmosnen əssənəman win təgam" fəl a tan-təğbədəm! "Adi fəl kawan-z-əstəya har takəyam"* Babəylon.

⁴⁴ Amaran imarawan-nana win d-ikkas Məşşina day Masar əggazan teneray, əlân əhaket wa n əmənəy əd Məşşina, was omar Məşşina Musa s ad t-əgu s əmmək wa t-issəkna.

⁴⁵ Ahaket en, iggaz-du əs marawan-nana win dəffər win den, azzaman win day dasan-azzar Joswe, ewayan-tu s akal wa əbazan, s ənta a day istağ Məşşina tawşeten dat-san. Iggaz ahaket

wen akal en da har azzaman n ənnəbi Dawəd.

⁴⁶ Ənnəbi Dawəd igrâw arraxmat ħur Məššina. Ənta a igmayan daħ Məššina turagat n ad ikrəs ehan y Əməli ən Yaqub.

⁴⁷ Mišan ənnəbi Suliman a igrawan turagat ten, ikras ehan y Əməli Məššina.

⁴⁸ Dər iga awen da ya, Məššina di n Amadkol wər ixser daħ a əkrasan fassan n aytedan. Adi a inna ənnəbi Isayas as inna:

⁴⁹ Inna Əməli Məššina: *"İjənnawan a əmosnen təxawit-in ta n taymar, amadal wər imos ar arat illan daw daran-in. Daħ adi ma imos əzzənəf n ahan wa di-za-təkrəsam? Madəx edag wa daħ z'assanfa?"*

⁵⁰ *Wərgəx əfus-in a d-ixlakan adi kul?"*

⁵¹ Harwa inn-asan Əstefanos: «Ya meddan win əqqəssatnen, təxfâlam iwallan-nawan, tədbâħam šiməzzugen-nawan wər təzlayam d aytedan wər nəksud Məššina, faw tugâyam s Infas wa Zəddigan. Adi da a əgan marawan-nawan.

⁵² Məni daħ ənnəbitan wa wər zaħħazzaban marawan-nawan? Əgan iman ən nəmmuzal ən Məššina win əmalnen dat alwaq assa ən Wa Oħadan, as kawanay əmərədda a t-ikkəddalan təgam iman-net.

⁵³ Kawanay win d-issoka Məššina angalosan ewâynen əlqanun-net, mišan tugayam s a das-təlkəmam.»

Tamattant n Əstefanos

⁵⁴ As əslan i batu ten, iggaz-tan alham labasan, ad samadadan fəl alham n Əstefanos.

⁵⁵ Mišan ənta idkâran Infas wa Zəddigan, idkal asawad-net sa sər jənnawan, inay tanaya ən Məššina, inay deḡ ʔaysa ibdâd daḡ əḡil ən Məššina.

⁵⁶ Təzzar inn-asan: «Ənəyat, ijənnawan ənnolaman! Hannayəḡ Ag Aggadəm ibdâd daḡ əḡil ən Məššina.»

⁵⁷ Əslan y awen ḡas, ad zayyakan ədbâḡan šiməzzugen-nasan, əggadan-in ketnasan s Əstefanos, əbazan-tu.

⁵⁸ Əkkasan-tu daḡ əḡrəm, ad t-əggaran əs təhun. Amaran meddan win fall-as əgəyyatnen, aləs n ammas igân esəm Talut a ḡur əssənsan ibərnaz-nasan.

⁵⁹ Əggâran Əstefanos əs təhun as ittar inna: «Ya Əməli ʔaysa, əqbəl iman-in!»

⁶⁰ Dəffər awen, igaraffat, idkal əməsli-net s afalla, inna: «Ya Əməli, a tan-wər-təssəwaray abakkad wa!» As inna awen, əgmadan-tu man.

8

¹ Amaran Talut ənta, iha win ərdanən s ətəwənyə n Əstefanos.

Təttəyt n Əlkənisat - Šiggəyyawen daḡ Yahudəyya əd Samarəya

Ətəwədgaz d əwəziwəz ən məzzəgzan əs ʔaysa

Əzəl wen da ad tənta təssust labasat fəl Əlkənisat ta təhat Yerusalam; təzzar wazawazan əlməsixitan ketnasan daḡ kallaan win Yahudəyya

əd Samarəya. Wər d-iqqim daɣ Yerusalām ar inəmmuzal.

² Osan-du meddan ən miksadan ən Məššina, ənbalan-in Əstefanos. Əyyəwanan fall-as tala.

³ Talut ənta, issənta daɣ əhluk n Əlkənisat. Irzag inan, ilabbay-du daɣ-san meddan əd tədoden, iggar-tan daɣ kasaw.

Emel ən Filibus isalan win Əlinjil daɣ Samarəya

⁴ Amaran iməzzəgzan əs Ƴaysa win təwazawaznen den, ərzagan akal ketnet əmmâlan y aytedan isalan win əhanen Əlinjil.

⁵ Awen da a d-ewayan Filibus s əxrəm iyyan n akal ən Samarəya a daɣ-as immâl y aytedan isalan n Əlməsix.

⁶ As təsla aljamaxat tagget tənimmannakat y awal ən Filibus, tənay dəɣ təlməxjujaten šin itaggu əmosnen aɣalamaten ən tarna ta igraw, təssoɣal-in ənnəyat-net aratan win igannu.

⁷ Fəlas aytedan aggotnen a əgmadan kələsuf. As tan-du-gammadan, takkasan imaslan labasnen. Tawazozayan dəɣ nəbdan əd məggudal aggotnen.

⁸ Eway-du awen tədəwit agget daɣ əxrəm en.

⁹ Amaran əxrəm en, ih-ay aləs iyyan n amasaxar igân esəm Simxon itaggin išaxawan simaklalten s aytedan ən Samarəya. Igannu ənta awedan zəwwəran a imos.

¹⁰ Aytedan kul sasaman-as s əlluɣ, gər za win wər nəla almaqam, wala win t-ələnən, gannin: «Aləs wa, tarna n Əməli tas itawannu ta togarat a imos.»

¹¹ Aytedan win sasaman-as s əlluχ, fəlas irəw itagg-asan išaxawan sər-san simaklalnən.

¹² Mišan as əzzəgzanan i Filibus a dasan-immâlan isalan ən taymar ta n Məşşina əd tarnan esəm ən Ƴaysa Əlməsix, tawasalmaχan daχ aman, meddan harkid tədoden.

¹³ İzzəgzan Simχon ənta da, itawasalmaχ daχ aman; iltay daχ Filibus. Əqqânnat alχalamaten ən tarnə əd təlməχjujaten zawwarnən šin itaggu Filibus eχaf-net.

¹⁴ As əslan nəmmuzal daχ Yerusalam as Kəl-Samarəya əqbalan awal ən Məşşina, zammazalan sər-san Butros əd Yaxya.

¹⁵ As tan-in-osan, əttaran-asan a fall-asan d-izazzabben Infas wa Zəddigan,

¹⁶ fəlas harwa da wər tan-iha i fəl d-izzibbat, ətəwəsəlmaχ χas a tawaggan daχ aman s esəm n Əməli Ƴaysa.

¹⁷ Təzzar a tan-isawar Butros əd Yaxya ifassanasan, garrawan Infas wa Zəddigan.

¹⁸ As inay Simχon as, Infas wa Zəddigan əsəwər ən fassan ən nəmmuzal as itawagraw, igmay daχ-san a tan-akfu azrəf, inn-asan:

¹⁹ «Akfiwat-i nak da tarnə tədi, tas i əssəwara ifassan-in ad igrəw Infas wa Zəddigan.»

²⁰ Inn-as Butros: «Təhləkəχət kay d əzrəf-nak, zama təχila təfrâgəχ a tazzanza təhəkkut ən Məşşina.

²¹ Batu ta, wərmad tat-təheχ za wala tələχ daχ-as tanat fəlas əwəl-nak wər oχed dat Məşşina.

²² Daχ adi utab daχ əşşur-nak, tansəya Məşşina a dak-issurəf ark ənnəyat ta təhat əwəl-nak, kud immikkan adi.

23 Fəlas hannayağ as, əwəl-nak wər idker ar tara n əddənet labasat d iba n aqqad.»

24 Təzzar inn-asan Simyon: «Ansəyat-i Əməli kawanay iman-nawan fəl a di-wər-abəz s awa tənnam.»

25 Butros əd Yaxya win nəmmuzal, as əmalan y aytedan awa əggəyyen fəl Yaysa Əlməsix, əməlan-asan değ awal n Əməli, əqqalan Yerusalam. Əmalan isalan n Əlinjil dağ tağarmaten aggotnen ən Samarəya šin əhanen tarrayt-nasan.

Filibus d aləs iyyan n Etəyofəya

26 Dəffər awen işşewal angalos n Əməli i Filibus, inn-as: «Ənkər tawəya əd tarrayt təkəkât agala ta təğmadat Yerusalam təras təkka Gaza.» Tarrayt ten, təssuf.

27 Inkar Filibus, igla. Ijiwankat dağ tarrayt as immənay d aləs n ənazum n akal n Etəyofəya imosan awedan zəwwəran dağ tağmar ən Kandas ta n təmənokalt n Etəyofəya s ənta a innəttafan d ərrəzəğ kul wa n təmənokalt en. Osâ-du Yerusalam fəl a dağ-as iğbəd Məššina.

28 Iqqâl akal-net, iqqîm dağ amalankay-net, iğarru əlkəttab n ənnəbi Isayas.

29 Inna Infas wa Zəddigan i Filibus: «Ihaz-in amalankay en, təmmudəğax i məššis»

30 Ozal-in sər-əs Filibus. Isl-as iğarru əlkəttab n ənnəbi Isayas, inn-as: «Awak təğrey almağna n awa təğarra əddi?»

31 Inn-as aləs wen: «Manəmmək as tu-z-agra, wər t-illa awedan a di-t-iffəssaran?» Təzzar igmay dağ Filibus a d-iwən, aqqam dəğma-net.

³² Edag wa iḡarru daḡ əlkəttab en, ənta da awa inna: «*Ittilway zun tilay s adag n agazam, təfastit a itaggu əjayol y aytedan lazzinen təduft-net a iga, wər d-igmed əlxərəf imi-net.*

³³ *Itiwasaras, wər das-əgen əşşəriḡa wa dər ihor. Ma ifragan igi ən salan kul ən hayawan-net, id tətihazaraz təḡrəst-net daḡ əddənət?»*

³⁴ Təzzar issəstan aləs wa n Etəyofəya Filibus, inn-as: «*Kay ak əməl-i, was iha ənnəbi šin-net da. Ənta iman-net meḡ awedan iyyan?»*

³⁵ Ibaz Filibus ḡur batu ten da, imal-as isalan n Əlinjil ən Үaysa.

³⁶ Əḡlân za, as d-osan edag əhân aman, təzzar inna aləs wa n Etəyofəya: «*Aman da, ma di-z-igdəlan ad təwəsəlməḡ?»*

³⁷ [Inn-as Filibus: «*wər t-illa, kud təzzigzana s əwəl iyyanda.*» Inn-as aləs wen: «*Əzzigzanəḡ as Үaysa Əlməsix Barar ən Məşşina a imos.*»]

³⁸ Omar alwaḡ wen da s ad itəwəsəbdəd amalankay, əzzəbben ənta əd Filibus, əḡgazan aman, issəlmaq-qu Filibus.

³⁹ Da da ḡas a d-əḡmadan aman, ənta ad idkal Infas n Əməli Filibus, ab'as t-ihannay aləs wen, mišan igla daḡ tarrayt-net, ikna tədəwit.

⁴⁰ Filibus ənta, as din-igra iman-net iha aḡrəm n Azot. As t-igmad illil akal en itaggu daḡ ḡərman kul win əhanen tarrayt isalan n Əlinjil har osa aḡrəm ən Qaysarəya.

9

Talut ihdad-du

¹ As itaggu awen, Talut harwada isamahad fəl igi ən man ən nəttulab n Əməli Ҳaysa. Ikka Əlimam wa Zəwwəran,

² igmay daḡ-as a das-agu šira əs nan n əlxibada ən Kəl-Əlyəhud win əḡrəm ən Damas əmosnen šira a t-əkfânen turagat s as, as igraw aytedan, gər za meddan wala šidoden, win əhanen tar-rayt ta n Ҳaysa, a tan-ikrəd ilwəy-tan-du əs Yerusalam.

³ Ikkâ za aḡrəm ən Damas, as t-in-ihoz, wər isla a igan as fall-as ibalazzat ənnur a d-igmâdan ijənnawan.

⁴ Ifataqqat, isla y əməsli wa das-innan: «Talut, Talut mafel as di-təzaḡazzaba?»

⁵ Inn-as Talut: «Ma təmosaḡ, Əməli?» Isla i wa das-innan: «Nak Ҳaysa wa təzaḡazzaba.

⁶ Əbdəd əggəz aḡrəm a dak-attamal awas kay-iwar igi-net.»

⁷ Meddan win əddəwnen əd Talut əbdâdan, təgdal-asan tərəmməq awal, sallan y əməsli mišan wər hənnəyan awedan waliyyan.

⁸ Ibdad-du Talut, ora šittawen-net, mišan indar-as anay ən wala. Kundaba as əbazan midawan-net əfus-net, əlwayan-tu har dər-əs əggazan Damas.

⁹ Har iga karad adan wər ihənnəy arat, wər itša za wər işwa.

¹⁰ Amaran Damas ih-êt ənalkim ən Ҳaysa igân esəm Ananəyâs. Iḡr-ay Əməli daḡ tərgət inn-as: «Ananəyâs!» Ikkəwan-as inn-as: «Nak da, Əməli!»

¹¹ Inn-as Əməli: «Ənkər, təssəwəla əd tar-rayt tas itawannu "ta toḡadat", takkaḡ ehan ən

Yahuza, təssəstənaɣ d aləs n əxrəm ən Tarsa igân esəm Talut, id itansay-i daɣ alwaq wa da.

¹² Amaran inay [daɣ tərɣət] aləs igân esəm Ananəyâs as t-id-osa, issəwar-tu ifassan-net fəl a t-id-iqqal asawad-net.»

¹³ Təzzar inn-as Ananəyâs: «Ya Əməli, aytedan aggotnen əgân-i isalan n aləs di, əd talbast tagget ta issəkna imizdagan-nak win əhanen Yerusalam.

¹⁴ Da da ila turagat n abbaz n aytedan kul win tattarnen s esəm-nak, amaran imuzaran ən limaman a t-əkfanen turagat ten.»

¹⁵ Mišan inn-as Əməli: «Aglu, aləs di nak a t-isannafran fəl a di-iməl y aytedan wər nəmos Kəl-Əlyəhud əd mənokalan-nasan, iməl-i deɣ i Kəl-İsrayil.

¹⁶ Nak iman-in as das-z-agax əzəɣxəzzəb kul wa t-iwaran fəl əddəlil-in.»

¹⁷ Təzzar igla Ananəyâs har din-osa ehan, iggaz-tu, inay Talut, issəwar-tu ifassan-net, inn-as: «Amadrəy-nin Talut, Əməli Ƴaysa wa dak-inafalalan daɣ tarrayt ta du-təgeɣ, ənta a di-d-izammazalan fəl a kay-d-iqqəl asawad-nak, idnəy-kay Infas wa Zəddigan.»

¹⁸ Tamazayt ten da a daɣ d-ərtakan aratan olanen əd təfərənkawen daɣ şittawen ən Talut, təzzar iqqal-t-id asawad-net. İbdad, itawasalmaɣ daɣ aman.

¹⁹ Dəffər awen itša, əqqalnat-t-idu təɣurad-net.

Tewaylay ta iga Talut təgəyya ən Ƴaysa Əlməsix

Talut iha Damas

Iga arat n adan xur nalkiman ən Yaysa win əhanen Damas.

²⁰ Tarmâd as ikka Talut inan n əlxibada win Kəl-Əlyəhud a daɣ-san immâl as Yaysa Barar ən Məşşina a imos.

²¹ Isammaklal awen s aytedan ad gannin: «Ak wərgex ənta, as kala ibbənbay daɣ aytedan win tattarnen s esəm ən Yaysa daɣ Yerusalam ihallak-kan? Wərgex wər t-id-eway s əxrəm wa, ar a tan-abəz, ilwəy-tan əs muzaran ən limaman?»

²² Mişan Talut ənta itisuhit əzəzgzan-net. Wər əssenən Kəl-Əlyəhud win Damas a das-ənnan daɣ əsəkni wa tan-itaggu as Yaysa ənta a imosan Əlməsix.

²³ As irəw Talut daɣ Damas, namaggan Kəl-Əlyəhud eɣaf fəl ad agin iman-net,

²⁴ mişan ittəmal-as awen. Ewadan daɣ tara ən tənaxay-net as das-ənkadan ehad ezal xur mawan n əxrəm.

²⁵ As ahad iyyan, ənkarən nəttulab-net əgan-tu daɣ əzmam zəwwəran, ərdafan daɣ-as aɣan, zazzabben-tu fəl aganna wa hadan n ayalla wa iɣlayan əxrəm.

Talut iha Yerusalam

²⁶ As osa Talut Yerusalam, igmay d ad irtəy əd nalkiman ən Yaysa, mişan əwafan-tu ketnasan fəlas harwa da wər əzzəgzanan as iyyan daɣ-san a imos.

²⁷ Ibaz-t-idu Barnabas əs man-net, iddew dər-əs əs nəmmuzal, təzzar ig-asan isalan kul n əmmək was inay Talut Əməli Yaysa daɣ tarrayt ən Damas d awal wa das-iga, imal-asan deɣ igi

wa iga isalan n Əməli Ҷaysa daҗ Damas wər t-illa i as tu-təha tasa-net.

²⁸ Alwaq wədi a dər-san irtay, itidaw dər-san daҗ Yerusalām. Itaggu isalan n Əməli Ҷaysa ši wala tasa ən waliyyan.

²⁹ Itiməšiwil Talut əd Kəl-Əlyəhud win əššewalnen təlyunant, itamazax deҗ dər-san; ad gammayan d igi ən man-net.

³⁰ As əslan mədrayan-net daҗ əzəgzan awen, əddewan dər-əs wiyyad daҗ-san s əҗrəm ən Qaysarəya, amaran əssokan-tu wa n Tarsa.

Tagadezt ta n Butros iməzzəgzan win Yahudəyya

³¹ Azzaman en, əgrâwan daҗ-san nalkiman ən Ҷaysa d Əlkənisaten alxer daҗ akal kul wa n Yahudəyya əd wa n Galilaya əd wa n Samarəya. Itasahat əzəgzan n Əlkənisaten, tagginat imazalan əssiğmarnen Əməli, tittəynat deҗ əs tilalt n Infas wa Zəddigan.

Təmməzzəyt n Enəyas

³² Illil za Butros akal ketnet har iras taҗrəmt ta n Ludda fəl ad inəy imizdagan win daҗ-as əxsarnen.

³³ Inay daҗ-as aləs igân esəm Enəyas, igân əttam elan əd bəddən, wər kala igmad təssut-net.

³⁴ Inn-as Butros: «Enəyas, əbdəd tada təssut-nak, Ҷaysa Əlməsix izzozay-kay.» Ibdad Enəyas tamazayt ten da.

³⁵ Ənayan-tu aytedan kul win təҗrəmt ən Ludda əd win azawax wa n Šaron, təzzar əhdandu s Əməli.

Ətəwəsənkər ən Tabita dağ tamattant

³⁶ As itaggu awen əxrəm ən Yaffa təxsâr dağ-as tənalkimt ən Ƴaysa tégât esəm Tabita, almağna n esəm wa dağ təlyunant Dorkas, almağna «Tenert». Wər tégmed ar s igi ən mazalan olaynen əd təkutawen i maddararan.

³⁷ Adan en da a dağ tərin, aba-tat. Tətawaşarad, tətawasansa dağ ahan wa n afalla ən şuru.

³⁸ Dad imos as Ludda wər təggug Yaffa, as əslan nalkiman ən Ƴaysa win əhanen Yaffa as Butros iha Ludda, zammazalan sər-əs əşşin meddan fəl ad t-ansəyan a tan-d-akku tarmâd.

³⁹ Inkar Butros iddew dər-san. As dinosa, ewayan-tu əs suru wa təha təxəssa ən təntut, əkkanat-idu tədoden şin as wər ədderan meddan-nasnat hallinat, sakninat-tu şikadkaden əd səlsa wiyyad a dasnat-təga Dorkas harwa təddâr.

⁴⁰ Issərdağ Butros awedan kul, igaraffat ad itattar. As issənda təwatray-net, imalallay-du təxəssa ən təntut ta aba, inna: «Tabita, ənkər-du», təzzar tora şittawen-net, tənay Butros, təqqim-du.

⁴¹ Izzal-as-in əfus-net, illil-as əs tebadday, amaran iğra-du imizdagan əd tədoden şin as wər ədderan meddan-nasnat, issəkn-asan-tat təddâr.

⁴² Itawasla awen dağ əxrəm ən Yaffa ketnet, təzzar əzzəgzanan aytedan aggotnen s Əməli.

⁴³ Iha Butros Yaffa har irəw, illa çur aləs iyyan igân esəm Simyon as imos əşşəxəl-net əşifəl ən gəşkan.

Əlkənisat əd təgəyya dat aytedan wər nəmos Kəl-Əlyəhud

10

Butros əd Korniləyas

¹ Ayrəm ən Qaysarəya ih-ay aləs iyyan ən Kəl-Ərrum igân esəm Korniləyas, imos iyyan dağ kabtanatan win azzarnen y agan ən sojitan was itawannu «Italəya».

² Imos aləs iksudan Məşşina, ixbâd-tu ənta d aytedan n ahan-net ketnasan, itaggu şikutawen aggotnen i Kəl-Əlyəhud, faw değ itattar əs Məşşina.

³ As əzəl iyyan çur amaçal ən karad al-waqan win tazzar, inafalal-as-du angalos ən Məşşina, inay-tu as d-iggaz ehan-net, inn-as: «Korniləyas!»

⁴ Irmağ Korniləyas, igar şittawen dağ angalos, inn-as: «Ya Məşşi, ma tareğ?» Inn-as angalos: «Şiwatriwen-nak əd təkutawen-nak əggəzzaynat əs Məşşina, iqbâl-tanat.

⁵ Dağ adi əmərədda, zəmmizəl meddan s əyrəm ən Yaffa a dak-d-idawan d aləs iyyan igân esəm Simyon as itawannu Butros,

⁶ inniftayan i Simyon wa išafalan igəşkan s ehan-net ihâ tagadamayt n agaraw.»

⁷ Ifal-tu angalos wa das-işşewalan ças, iğra-du imaşşaxalan-net əşşin d iyyan dağ sojitan win išaşçal imosan awedan iksudan Məşşina,

⁸ issoğal-asan awa igan kul, amaran izammazal-tan əs Yaffa.

⁹ Ʒhōzan-in aƷrəm əzəl wa hadan, as iwar Butros afalla ən taƷazamt attayan n ammas n azal fəl ad agu šiwatriwen.

¹⁰ Itattar den da as t-iggaz gələk, isaddaran a itša. Tawaggin-as-du mensewan as tu-tobaz tarnu n Infas wa Zəddigan.

¹¹ Ogga ijənnawan as əmmoran, itawasaras-du daƷ-san arət olân d əfər zəwwəran itiwattafan s əkkozat təsəlkad-net, har dat-əs imal.

¹² Ʒhân-tu əzzənəfan ən mudaran kul win jawankatnen fəl amaɖal əd dəmərdəmaran əd gəɖad.

¹³ Təzzar isla y əməsli iyyan as das-inna: «Butros, ənkər, təgzəma, tatša!»

¹⁴ Mišan inn-as Butros: «Kala kala Ʒməli, id wər kala ad ətšəƷ a xaraman wala a immidasan.»

¹⁵ Ilas tesalay y əməsli en as inna: «Awa issəxlal Məššina, wərgəƷ kay a tu-z-agin i xaraman!»

¹⁶ Har iga əməsli en y awen karadat tənnawen, amaran immədkal əfər en əs jənnawan.

¹⁷ Harwada iqqân awen eƷaf ən Butros, isamadran daƷ awa z'iqqəl almaƷna-net n awa das-d-inafalalan den, as d-əbdadan meddan win d-izammazal Korniləyas daƷ əmi n ahan ən SimƷon, dəffər as əssistanan əd dad illa.

¹⁸ ƷƷran-du məssawəs n ahan, əssəstanan-tan kud den da ad izzəbbat SimƷon was itawannu Butros.

¹⁹ Harwada isamadran Butros daƷ awa z'iqqəl almaƷna n arət wa das-d-inafalalan as [das]-inna Infas wa Zəddigan: «Ʒnəy! Meddan den karad a dər-ək sastannen.

²⁰ Ad wər təzləyax aytedan, əbdəd, tazzabbex, tidawa dər-san; id nak a tan-d-izammazalan.»

²¹ Təzzar izzəbbat-du sər-san Butros inn-asan: «Nak da as təsaggadam. Ma imos əddəlil wa kawan-d-ewayan da?»

²² Ənnan-as: «Korniləyas wa n kabtan ən Kəl-Ərrum a dana-d-izammazalan, imosan aləs oğâdan, n əmiksad ən Məşşina, əssiğmaran-tu Kəl-Əlyəhud ketnasan. Ənta as inafalal angalos zəddigan ən Məşşina omar-tu s a kay-issəgməy, tasax-in ehan-net fəl ad aslu y awa za tanna.»

²³ Amaran izzogaz-tan-du Butros, isammagarat-tan. As affaw, iddew dər-san. Əddewan dər-əs arat dağ nalkiman ən Ƴaysa win n əğrəm ən Yaffa.

²⁴ As əzəl wa hadan ewadan ağrəm wa n Qaysarəya. As din-osan da, iqqâl-asan Korniləyas ənta əd marwan-net d aytedan win dər ikna təmmidwa s ənta a tan-d-iğran.

²⁵ As zama din-iggâz Butros ehan, issəlkad-as-du Korniləyas, igaraffat ɣur daran-net, issəjad-as.

²⁶ Mişan issəbdad-tu Butros, inn-as: «Əbdəd! Nak aggadəm ɣas a əmosa.»

²⁷ Əggazan ehan mişawalan, os-in dağ-as Butros aljamağat tagget.

²⁸ Təzzar inn-asan: «Təssânam kawanay iman-nawan as issixram əlqanun ən Kəl-Əlyəhud y iyyan dağ-san tassağ madəğ iguz n ahan n awedan wər nəmos iyyan dağ Kəl-Əlyəhud. Mişan nak issosan-i Məşşina dağ as ad wər ağax y awedan waliyyan iduf n as i xaraman wala immidas.

29 Adi da fəlas, as di-təssəgməyam, əkkeq-qawan-du əddi da wər əgeɣ asarəw waliyyan. Amaran əmərədda əməlat-i əddəlil wa fəl di-təssəgməyam.»

30 Inn-as Korniləyas: «Əzəl iyyan tattara daɣ ahan-in, ila adi əmərədda karad adan, wər əsley a igan as dat-i ibdad aləs ilsân isəlsa bilazlaznen.

31 Təzzar inn-i: "Korniləyas! Təwatray-nak təqbâl, šikutawen-nak deɣ iqbâl-tanat Məššina.

32 Daɣ adi, zəmmizəl əs Yaffa, təssəgməya Simɣon was itawannu Butros. Inniftaɣ y aləs igân Simɣon wa išafalan igəşkan ihân tagadamayt n agaraw."

33 Təzzar əssəgməyaq-qay tamazayt tədi da, olâɣ deɣ as du-toseɣ. Amaran əmərədda ketnana nəlla da dat Məššina, fəl ad nəssəsəm y arat kul was kay-omar Əməli s a danaq-qu-tanna.»

Talxutbat ən Butros daɣ ahan ən Korniləyas

34 Išşewal Butros inna: «Əmərədda əgreɣ as, tidət daɣ a imos as Məššina wər izlay aytedan.

35 Kalar awedan kul wa t-iksudan, itaggu awa oɣadan, awedan wədi, ad t-iqbəl Məššina, a təqqal tawşet-net.

36 Issoka-du Kəl-İsrayil awal-net imosan isalan n Əlinjil, əmmâlnen isalan n alxer wa ihakku Ƴaysa Əlməsix, ənta wa n Əməli n awedan kul.

37 Təssânam daɣ awa igan daɣ akal kul ən Yahudəyya, intâ-du adi daɣ wa n Galilaya dəffər təlxtutbat ta iga Yaxya y aytedan daɣ batu n alamaɣ daɣ aman;

38 d əmmək was issəkna Məššina aytedan as Ƴaysa wa n Nazaret a issannafran əs tahakkay

ta t-iga Infas wa Zəddigan əd tarnə. Təssānam dəx dəx tilalt ta iga akal itamazal əlluḡ, izuzəy aytedan kul win dəx innoda Iblis, id tarnə ən Məššina a igraw.

³⁹ Nakkanay inəmmuzal nəggəyat awa iga ketnet dəx əxrəm wa n Yerusalam d akal sa hadan wa n Kəl-Əlyəhud. Ənta wa itawataytayan fəl təgəttawt, aba-tu;

⁴⁰ issənkar-t-idu Məššina əzəl wa n karad dəffər iba-net, ikf-ay turagat n ad itəwənəy iddār.

⁴¹ Wərgəḡ aytedan kul a t-ənaynen, kalar wər t-inay ar šigəyyawen šin isannafran Məššina harwa dat alwaq, a tanat-imosan nakkanay win dər-əs ədrawnen tettay əd tassay dəffər tanakra ta d-iga dəx tamattant.

⁴² Təzzar omar-ana Ƴaysa s ad nəməl Əlinjil y aytedan, naggayyat-asan as, ənta da, a isan-nafran Məššina ig-ay əmašray n id t-illa awedan, gər za win əddarnen wala win aba.

⁴³ Ənta en da as əggəyyen ənnəbitan kul as, i sər-əs izzəgzanan ad igrəw təsureft ən bakkadan-net s esəm-net.»

Agaraw wa əgan aytedan wər nəmos Kəl-Əlyəhud Infas wa Zəddigan

⁴⁴ Harwada iššewal Butros as d-izzəbbat Infas wa Zəddigan fəl aljamayət ketnet ta təssəsamat i təlxutbat-net.

⁴⁵ Ikna awen əsəmməkləl əs nalkiman ən Ƴaysa win Kəl-Əlyəhud win d-əddewnen əd Butros, âs, wala aytedan win wər nəmos Kəl-Əlyəhud da garrawan s igət təhəkkut ta n Infas wa Zəddigan.

⁴⁶ Fəlas sallan-asan əşşewalan awalan wər nətawazday, əmmâlan adkul ən Məşşina. Təzzar inna Butros:

⁴⁷ «Awak ma z'igdəlan y aytedan əgânen y Infas wa Zəddigan agaraw wa das-nəga ad təwəsəlməxan daḡ aman?»

⁴⁸ Amaran omar s ad təwəsəlməxan daḡ aman s esəm ən Ƴaysa Əlməsix. Dəffər awen əgmayan daḡ Butros a Ƴur-san agu adan.

11

Isalan win iga Butros dat nalkiman ən Ƴaysa win Yerusalam

¹ Əslan nəmmuzal əd mədrayan daḡ əzəgzan win əhanen akal wa n Yahudəyya as, əllân-tu aytedan wər nəmos Kəl-Əlyəhud əzzigzannen əntanay da s awal ən Məşşina.

² Alwaq wad iggəzzay Butros əs Yerusalam, əşşewalan fall-as inalkiman ən Ƴaysa win Kəl-Əlyəhud win əttafnen alḡadat-nasan ta n əmənəkəd.

³ Ənnan-as: «Manəmmək as tətəggaza ehan n aytedan wər nəmmənəkəd, wala tədarraw dər-san imensewan.»

⁴ Təzzar issoḡal-asan Butros awa igan kul, wa n ənətti, inn-asan:

⁵ «Tattara daḡ əḡrəm ən Yaffa as di-tobaz tarna n Infas wa Zəddigan, inafalal-i arət iyyan. Arat wa, itawasaras-du daḡ jənnawan, olâ d əfər zəwwəran itiwattafan s əkkozat təsəlkad-net, har dat-i d-imal.

⁶ Əswada daḡ-as, zaggazdaq-qu, ənayaḡ daḡ-as eharay, əd təwaqqast əd dəmərdəmaran əd gəḡad.

⁷ Təzzar əsleḡ y əməsli wa di-innan: "Butros, ənkər, təgzəma, tatša!"

⁸ Mišan ənnex-as: "Kala kala Əməli, id iminin wər kala t-iggaz arat xaraman wala iyyan immidasan."

⁹ Əlasa tesalay y əməsli en as inna daḡ jənnawan: "Awa issəxlal Məššina, wərgex kay a tu-z-agin i xaraman!"

¹⁰ Har iga əməsli en y awen karadat tənnawen, amaran itawarkab-in awen ketnet əs jənnawan.

¹¹ Tamazayt ten da a d-əbdadan karad meddan s ahan wa daḡ əssəgana, sər-i d-əmmozałnen daḡ əḡrəm ən Qaysarəya.

¹² Təzzar inn-i Infas wa Zəddigan a dər-san idawa əddi da. Ad wər əzləyaḡ aytedan. Əddewa deḡ əd mədrayan-nana sədis win, har nəggaz ehan n aləs wa di-d-issəgməyan.

¹³ Isoḡal-ana əmmək was das-inafalal angalos daḡ ahan-net, ibdad dat-əs inn-as: "Zəmmizəl awedan s əḡrəm ən Yaffa y a dak-d-idaw əd Simḡon was itawannu Butros.

¹⁴ A dak-agu amagrad a sər-ək du-z-awəyan efsan kay d aḡaywan-nak ketnet."

¹⁵ Harwada wər əhoga əššewala as fall-asan d-iga Infas wa Zəddigan əzəbbi wa fall-ana d-iga nakkanaḡ daḡ tizarat.

¹⁶ Təzzar əkteḡ-du tənna ta iga Əməli: "Yaxya, aman a daḡ issəlməḡ aytedan, mišan kawanay, Infas wa Zəddigan a daḡ za tətəwəsəlməḡam."

¹⁷ Daḡ adi, dad zamas ig-asan Məššina təhəkkut zun ta danaḡ-iga as nəzzəgzan s Əməli ḡaysa Əlməsix, ma əmosa nak as gaddala i Məššina igi n awa ira?»

¹⁸ As təsla aljamaḡat i salan win, təffəsta, təzzar ad təmmal Məššina təgannu: «Daḡ adi aytedan win wər nəmos Kəl-Əlyəhud, da issəfrak-kan Məššina ad utaban, əgrəwan təməddurt ta təylalat.»

Ətaməl n Əlinjil i Kəl-Əlyəhud daḡ Antəyoxəya ta n Surəya

¹⁹ Inalkiman ən Ƴaysa win izawwazawaz aḡazab wa d-izrayan ətəwənḡa n Əstefanos, əḡlan wiyyad har osan akal wa n Fenisəya, wiyyad osan akal imosan gərwətlan as itawannu Qibrus, wiyyad osan aḡrəm wa n Antəyoxəya. Əmmâlan awal ən Məššina, eges i Kəl-Əlyəhud ḡas.

²⁰ Dər iga awen da ya, wiyyad daḡ-san n akal wa n Qibrus əd wa n Qərwan, as din-osan aḡrəm wa n Antəyoxəya əššəwalan y aytedan win wər nəmos Kəl-Əlyəhud win əššəwalnen təlyunant, əmmâlan-asan isalan n Əlinjil n Əməli Ƴaysa.

²¹ Tədhal-tan tarna ən Məššina daḡ awa taggin, təzzar əzzəgzanan aytedan aggotnen əs Ƴaysa Əlməsix, ətuban, əlkaman y Əməli imosan əmənokal-nasan.

²² Isalan n awen ewadan-in Əlkənisat ta təhat Yerusalam, təzzar təzammazal Barnabas s aḡrəm n Antəyoxəya.

²³ As din-osa inay arraxmat ən Məššina ta du-təzzəbbet den, iddəwat. Təzzar ig-asan ketnasan ənnəsixa imosan ad əlkəman y Əməli.

²⁴ Ənta iman-net Barnabas, aləs olâḡan a imos, itkâran Infas wa Zəddigan, issohat deḡ əzəgzan-net. Əzzəgzanan aytedan wiyyad aggotnen s Əməli Ƴaysa.

²⁵ Amaran ikka Barnabas aḡrəm ən Tarsa, isaggad i Talut.

²⁶ As t-igraw, iddew-du dər-əs s Antəyoxəya. Əgan daḡ-as awatay iḡrâdan osâḡan əd nalkiman ən Ƴaysa win əhanen Əlkənisat ten, sasaxrin aytedan aggotnen. Aḡrəm wen da n Antəyoxəya en a daḡ əssəntan aytedan teḡaray nalkiman ən Ƴaysa s esəm wa n «əlməsixitan».

²⁷ Adan en da a daḡ əḡmadan ənnəbitan wiyyad Yerusalam, ərasan s əḡrəm wa n Antəyoxəya.

²⁸ İbdad iyyan daḡ-san igân esəm Agabus, imal dat alwaq əs tarna n Infas wa Zəddigan as, ilkâm ad agu laz labasan daḡ əddənət ketnet. Laz en da deḡ osa-du s əmmək was t-imal daḡ azzaman n əmənokal Klawdəyus Qaysara.

²⁹ Təzzar namardan nalkiman ən Ƴaysa win Antəyoxəya fəl tanat təmosat ad irəḡ akkiyyan daḡ-san awa ifrag səssiwəyan tadhəlt ta i mədrayan-nasan daḡ əzəḡzan win əhanen akal ən Yahudəyya.

³⁰ Əgan awen da, əgan širgitan-nasan daḡ əfus ən Barnabas əd Talut y a tanat-awəyan i muzaran n Əlkənisat ta təhat Yahudəyya.

12

Tamattant ən Yaqub d iguz ən Butros kasaw

¹ Azzaman en da a daḡ issənta əmənokal Herod əzəḡḡəzzəb n arat daḡ aytedan n Əlkənisat.

² Isassanḡa əs takoba Yaqub wa n amadray ən Yaxya.

³ As inay as oggaman Kəl-Əlyəhud awen, isat-tarmas Butros. Itaggu awen adan n əmud wa daɣ tattin aytedan šigəlwen šin wər iha xamira.

⁴ Isassag-ay daɣ kasaw, issəwəq-qu i maraw sojitan əd sədis a tu-tinəməzrəynen s əkkoz əkkoz. Otâs a das-išrəɣ dat awedan kul dəffər əmud wa n Akkay.

⁵ A iha Butros kasaw den, Əlkənisat ənta tədgâz wəllen tətansay-as Məššina.

⁶ As ahad wad z'ifaw išrəɣ-as Herod, insâ Butros gər əššin sojitan a t-əttâfnen s əššin sassaran, əbdâdan deɣ magazan wiyyad dat əmi ən kasaw.

⁷ Wala a ihogan inafalal-du angalos iyyan n Əməli, imalawlaw adag wa daɣ insa Butros daɣ ammas ən kasaw. Təzzar idas angalos tasaga ən Butros, issənkar-tu inn-as: «Əbdəd tarmâd!» Ərtakan sassaran win as əkradan fassan-net daɣ tamazayt ten.

⁸ Harwa inn-as: «Əzləg isəlsa-nak, təsələɣ iɣateman-nak.» Iga Butros awen da. «Əmərədda əzləg əbərnuz-nak, təlkəməɣ-i-du.»

⁹ Igmad-du Butros ilkâm y angalos, wər issen as awa itaggu angalos den tidət a imos, iɣil targət awen.

¹⁰ Okayan fəl magazan win azzarnen əd win əllanen dənnəg-san, amaran osan-du təsəhərt ən təzoli təswâdat sa sər əyrəm. Tənnolam dat-san šin man-net, ərdəyan. Əssəwalan əd tarrayt iyyat, wala a ihogan ifal-tu angalos.

¹¹ Təzzar iggaz Butros annawalat n aɣaf-net, inna: «Əmərədda əkkasəɣ aššak daɣ-as, Əməli Məššina a d-izammazalan angalos-net, ikkas-i-

du daɣ fassan n əmənokal Herod əd talbast kul tas ərən Kəl-Əlyəhud a di-təgrəw.»

¹² Amaran igra taɣara-net, ikka ehan ən Maryama ta n anna ən Yaxya was itawannu Markus. Əmminayan ɣur-əs aytedan aggotnen tansayan Məşşina.

¹³ Ikawkaw imi n aɣalla, təgla-du tamaşşaxalt təgât esəm Ƴoda y ad təssən awa imos awedan.

¹⁴ As təzday əməsli ən Butros, awa təga daɣ tədəwit, edag n a das-taləm, tozal təqqal ammas n ahan, təmal as Butros illa dat əmi n aɣalla.

¹⁵ Ənnan-as: «Kam, əmməskəl a təgeɣ!» Mişan təzazzayyar-asan daɣ-as ənta daɣ awen. Amaran ənnan-as: «Daɣ adi angalos-net adi.»

¹⁶ A əgannin awen, Butros ənta itakawkaw-asan imi n aɣalla. As olaman, ənayan-tu, iga sər-san awen əsəmməkləl labasan.

¹⁷ Isaddagan-asan s əfus-net ad affastin, təzzar imal-asan təməwit kul tas t-id-ikkas Əməli Məşşina daɣ kasaw. Inn-asan dəɣ: «Əmələt adi i Yaɣub əd mədrayan-nana win hadatnen.» Amaran ifal-tan, ikka edag iyyan.

¹⁸ As affaw, təga tənajarwayat labasat daɣ sojitan; akk iyyan isastan əmidi-net d awa iga Butros.

¹⁹ As t-id-aba y aytedan win as t-issəswad Herod, issəstan sojitan win t-ogaznen, amaran omar s ad tawənɣin kərəz. Dəffər awen igmad Herod akal wa n Yahudəyya, izagaday ikka aɣrəm ən Qaysarəya y a daɣ-as agu tamert.

²⁰ Awen as itaggu, Herod ih-ay alham labasan n aytedan n əxrəm wa n Tir əd wa n Sidon. Idhaltan Blastus wa n əməššewwər ən Herod, naman-nakan zammazalan əs Herod almawakkilan-nasan, fəl a dər-əs aknin, fəlas akal-net a dugammadan sudar-nasan.

²¹ As d-osa əzəl wa itawasanafranan, izlag Herod isəlsa-net win taɣmar təzzar iqqim fəl təxawit-net ta n taɣmar, amaran iššewal i tamat-tay.

²² Ad saɣaren aytedan, gannin: «Əməsli wa in əməli iyyan, wərgex in awedan!»

²³ Wala a ihogan iwət-tu angalos n Əməli fəlas igi a iga iman-net daɣ adag ən Məššina, wər iga y Əməli adkul wa dər ihor; təzzar ətšanat-tu təwakkawen, aba-tu.

²⁴ Awal ən Məššina ənta, igla itiwəzəwiz, tigatan aytedan win sər əzzəgzannen.

²⁵ Amaran Barnabas əd Talut as əɣradan əššəxəl wa tan-d-ewayan s əxrəm ən Yerusalam, əqqalan s as d-əhan, əddewan əd Yaxya was itawannu Markus.

Şigəyyawen daɣ Asəya əd daɣ akal ən Kəl-Əlyunan

13

Ətəwəsənnəfrən ən Barnabas əd Talut y ad əššikəlan

¹ İlkənisat ta təhat aɣrəm n Antəyoxəya əhântat ənnəbitan əd məsəssəɣra əmosnen Barnabas əd Simɣon was itawannu "Akawel" əd Luqəyus wa n akal ən Qərwan əd Manahin

wa inamadwalan d əmənokal Herod daɣ ahan iyyanda amaran əd Talut.

² Əzəl iyyan ad əmminayan əxbâdan Əməli əzuman deɣ, inn-asan Infas wa Zəddigan: «Səwərat-i Barnabas əd Talut aganna fəl ad agin əššəxəl was tan-d-əxreɣ.»

³ Əzuman əgan šiwatriwen təzzar, amaran əssəwaran Barnabas əd Talut ifassan-nasan əgan-asan šiwatriwen, dəffər adi əssəqlan-tan.

⁴ Issoka Infas wa Zəddigan Barnabas əd Talut aɣrəm ən Salukəya. Əggazan daɣ-as aɣlal n aman əkkan akal imosan gərwətlan as itawannu Qibrus.

⁵ As osan aɣrəm ən Salamin, ad əmmâlan awal ən Məššina daɣ nan n əlɣibada win Kəl-Əlyəhud. Iddew dər-san Yaxya was itawannu Markus. Illil-asan idhâl-tan.

Əmənəy d Eləymas wa n amaššaxaw daɣ Qibrus

⁶ Ərzagan Qibrus, sannaqqaban-tu har osan aɣrəm ən Bafus. Den da ad əmmənayan d aləs iyyan ən Kəl-Əlyəhud igân esəm Bar-Ƴaysa n amaššaxaw, igannin ənta ənnəbi.

⁷ Amaran osâɣ əd Sarjəyus Buləs wa n ənaxkim n akal, imosan awedan ilân əgərri. Issəgməy əmuzar wa Barnabas əd Talut fəlas ikna əsənnəhəl ən tara n ad aslu y awal ən Məššina.

⁸ Mišan inkar Eləymas wa n amaššaxaw – awen da a imosan almaɣna n esəm-net daɣ təlyunant – iqqal əllid-nasan, ad igammay d ad igdəl y ənaxkim wen əzəgzan.

⁹ Təzzar ijajjançal daḡ-as Talut, as itawannu deḡ Buləs, igrâwan s igət Infas wa Zəddigan,

¹⁰ inn-as: «Agg Aşşaytan, azangaw n arat kul wa oḡadan. Wər t-illa əzzənəf ən təkərras a kay-wər-nəha, əməkkerrəs n ənallabus a təmosaḡ. Əmmay ad za tammazzayaḡ d agamay n əsəfrəḡ ən tarrayt toḡâdat n Əməli Məşşina?»

¹¹ Əmərədda ənəy, a fall-ak assansu Əməli əfus-net, taddaryala. Ad tagaḡ azzaman wər təlesay anay n ənnur ən təfuk.» Tamazayt ten da a fall-as əganat şiyay, idalammat fall-as amaḡal, təzzar ad iddâz, igammay i t-ilwayan.

¹² As inay ənaxkim wen awa igan den, izzəgzan. Isimaklal sər-əs əsəssəḡri was isla daḡ batu n Əməli.

Təlxutbat ta iga Buləs daḡ əḡrəm wa n Antəyoxəya wa n Bissidəya

¹³ Iggaz Buləs aḡlal n aman ənta əd midawan-net daḡ Bafus, əkkan əḡrəm ən Bərge ihân akal ən Banfiləya. Den da a dər-san imməzzay Yaxya was itawannu Markus, iqqal Yerusalam.

¹⁴ Əntanay amaran əḡmadan Bərge, əkkan əḡrəm n Antəyoxəya wa n akal ən Bissidəya. As iga əzəl wa n təsənfawt, əggazan ehan n əḡyibada ən Kəl-Əlyəhud, əqqiman.

¹⁵ As tawaḡran daggan daḡ Əttəwret d Əlkəttaban win Ənnəbitan sa hadan, ənnan-asan-in muzaran n ahan n əḡyibada wen: «Imədrayan-nana, kud təll-ay batu as za təsəssuhet əzəgzan n aytedan, tagim-tat.»

¹⁶ İbdat Buləs, isaddagan-asan s əfus-net ad affastin, amaran inna: «Meddan win Kəl-İsrayil

əd kawanay win miksadan ən Məššina, səsəmat-i!

¹⁷ Məššina di n Əməli ən tamattay ta da n Israyil a isannafranan imarawan-nana, təzzar issəgat-tan daḡ elan win daḡ əmosan inaftaxan daḡ akal ən Masar, dəffər adi ikkas-tan-du daḡ-as əs tarna n əfus-net.

¹⁸ Iga edag n əkkozat təmərwen n awatay, šin əgan daḡ taneray, izizaydar dər-san.

¹⁹ Ikf-en as ərzan əssayat tawšeten daḡ akal ən Kanan, ikf-en akal-nasan, iggaz təkasi-nasan.

²⁰ Awen ketnet, edag n əkkozat təmad n awatay əd səmmosat təmərwen a daḡ iga. Dəffər awen a dasan-izuzir əlqalitan taqqalan-asan imənokalan har azzaman n ənnəbi Saməwel.

²¹ Azzaman en da a daḡ əgmayan əmənokəl, təzzar ikf-en Məššina Talut ag Kiš wa n tawšet ta n Benyamin. Iga əkkozat təmərwen n awatay ixkâm fall-asan.

²² Dəffər adi ikkas-tu Məššina da taḡmar, iga Dawəd daḡ adag-net s ənta a fəl inna Məššina: "Əgrawa Dawəd ag Yasay, imosan aləs ilkâman i tara-nin, wa z'ammazalan əs tara-nin ketnet."

²³ Ihayawan-net a daḡ d-ikkas Məššina Ƴaysa s ənta a imosan Əmaylas was iga arkawal-net i Kəl-Israyil.

²⁴ Dat assa-net ad iga Yaxya i tamattay n Israyil ketnet isalan əmosnen ad utaban, təwəsəlməxan daḡ aman, assaknu adi tətubt-nasan.

²⁵ As ibuk Yaxya y əsəndi n əššəxəl-net, ad igannu: "Ma təxilam, ma əmosax? Wər əmosax za awedan was təxilam. Kala, kala! İlkâm-i-du,

nak wər əweda wala arra ən suyan ən xateman-net."

²⁶ Imədrayan-in kawayay win hayawan n Ibrahim əd kawayay win wər nəmos Kəl-Əlyəhud təksudam Məşşina, isalan n əlxillas wa, nakkanay as tan-d-issoka Məşşina.

²⁷ Amaran aytedan ən Yerusalam əd muzaran-nasan wər əgren awa imos Yaysa, wər əgren dəx wala dəx awa ənnan ənnəbitan dəx Əlkəttaban win tawaxrinen akk əzəl wa n təsanfawt dəx nan n əlxibada, əssəndan awa ənnan ənnəbitan win di s abbaz wa t-əgan s əşşəriya.

²⁸ Wər əgrewan arat waliyyan a t-issiwaran tamattant, mişan harkid awen, əgmayan dəx Bilatəs a dəx-as təwəkkəsən man.

²⁹ As əssəndan arat kul awa fall-as ənnan Əlkəttaban, əkkasan-t-idu fəl təgəttawt, əgan-tu dəx əzəkka.

³⁰ Mişan issənkər-t-idu Məşşina dəx tamattant.

³¹ Iga adan aggotnen itinəfilil y aytedan win dər-əs d-əddawnen dəx akal ən Galilaya əgəzzayyan s əxrəm ən Yerusalam. Əntanay a əmosnen əmərədda şigəyyawen-net xur tamattay n Israyil.

³² Amaran nakkanay da, nətagg-awan isalan n Əlinjil, əmosnen isalan win as itawagga arkawal-nasan i marawan-nana.

³³ Arkawal wen issənd-anaq-qu Məşşina nakkanay win hayawan-nasan s əsənkər wa d-iga Yaysa s əmmək was iktab dəx təsarnat ta n sanatat n Azzabur, as inna dəx salan ən Yaysa: *"Kay Barar-in, əqqalaş azalada Abba-nak."*

³⁴ Ʒsənkər wa t-id-iga Məššina daɣ tamattant, da wər tərqa təxəssa-net daɣ əzəkka imâl-tu Məššina daɣ Ʒlkəttaban əs təməwit ta, as inna: *"A kawan-akfa arraxmaten zaddognen, ətiddanen šin as əgeɣ arkawal-nasnət i Dawəd."*

³⁵ Iktâb deɣ as: *"Wər za tayya Ʒmizdag-nak arku daɣ əzəkka."*

³⁶ Dawəd amaran, dəffər as immozal daɣ azzaman-net s aratan win ixtas Məššina, abatu, itawanbal dəgma ən marawan-net, tərqa təxəssa-net;

³⁷ mišan Ʒaysa, ənta a d-issənkər Məššina daɣ tamattant, wər tərqa təxəssa-net.

³⁸⁻³⁹ Daɣ adi imədrayan-in əssənət as təsureft ən bakkadan, təttimal-awan əs tarrayt-net; amaran i sər-əs izzəgzanan ad igrəw tədarfit daɣ aratan kul win as wər ifreg tədarfit daɣ-san əs tarrayt ta n ləkkum y əššəriɣa wa d-izzəbben fəl ənnəbi Musa.

⁴⁰ Adi a fəl za tənəkədam y a kawan-igrəw awa əmalan ənnəbitan, as ənnan:

⁴¹ *"Ʒnəyat kawanay win nujaban; səmməkləlat, təhləkam; fəlas ad ammazala arət daɣ azzaman-nawan, as kud dawan-iga awedan isalan-net kul da, wər das-za-təzzəgzənam."*»

⁴² Igammad Buləs əd Barnabas as daɣ-san əgməyan aytedan ad d-ələsan tewaxlay əzəl ən təsanfawt wa d-izayan fəl a dasan-əššitin daɣ igi ən salan win den.

⁴³ As təwazawaz əljəməyat, əddewan Kəl-Ʒlyəhud aggotnen d aytedan wiyyad ad d-əhdânen s əddin wa n Kəl-Ʒlyəhud əd Buləs əd Barnabas. Maşawalan dər-san, gamməyan daɣ-

san ad zəzzəwen day arraxmat ən Məššina ta əgrawan.

⁴⁴ As d-iɣlay əzəl wa n təsanfawt, təddew-du taššam n əɣrəm ketnet y ad issəsəm y awal n Əməli.

⁴⁵ As ənayan Kəl-Əlyəhud igət ən tamattay, əggaznat-tan təsmiten labasnen, ad sabahawan Buləs, rabbadan-tu.

⁴⁶ Təzzar inn-asan Buləs əd Barnabas wər təha tasa ən wala: «Kawanay a iddəran s a dawan-attamal awal ən Məššina əs tizarat, mišan dad zamas tugayam sər-əs, wər təssəharam iman-nawan əd təməddurt ta təɣlalat, wədi ad nəmələlləy s aytedan win wər nəmos Kəl-Əlyəhud.

⁴⁷ Fəlas awen da as danax-omar Əməli Məššina s əmmək was inna day Əlkəttaban as ənnan: *"İgeq-qay ənnur i tawseten šin wər nəmos Kəl-Əlyəhud fəl ad tawəyax isalan n əɣyllas har d a du-təraz əddənət."*»

⁴⁸ As əslan aytedan win wər nəmos Kəl-Əlyəhud y awen, əddəwen, əzzəzwəran awal n Əməli Məššina, əzzəgzanan aytedan kul win as itawatas ad əgrəwan təməddurt ta təɣlalat.

⁴⁹ Ad itiwəziwiz awal n Əməli day akal ketnet.

⁵⁰ Mišan ənkarən Kəl-Əlyəhud əgan ark-man day tədoden šiyyad tiwasaxmarnen əhānen əddin ən Kəl-Əlyəhud əd muzaran n əɣrəm, ewayan-du əs Buləs əd Barnabas ətəwədgaz labasan, təzzar əstaxan-tan, əkkasan-tan day akal-nasan.

⁵¹ Əbbəkbakan aboqqa ən daran-nasan day batu n əɣrəm wen, təzzar əkkan aɣrəm wa n İkonəyum.

⁵² Inalkiman ən Ҷaysa win d-oyyan dəffərsan daҗ Antəyoxəya amaran, əknân təfalawist, idnay-tan deҗ Infas wa Zəddigan.

14

Buləs əd Barnabas daҗ Ikonəyum

¹ Iga Buləs əd Barnabas daҗ əҗrəm n Ikonəyum arat wa da taggin fawda, a t-imosan iguz n ahan n əlyibada ən Kəl-Əlyəhud; təzzar əgan daҗ-as awal a d-ewayan as əzzəgzanan aytedan aggotnen daҗ Kəl-Əlyəhud əd Kəl-Əlyunan əs Ҷaysa.

² Mişan ənkarən Kəl-Əlyəhud win ugaynen s əzəgzan əs Ҷaysa, əgan daҗ aytedan win hadatnen wər nəmos Kəl-Əlyəhud ark-man əs məzzəgzan əs Ҷaysa.

³ Harkid awen iga Buləs əd Barnabas tamert tagget daҗ Ikonəyum. Taggin awal a daҗ-qan wər təha tasa, tagayyen fəl Əməli. Ikf-en Əməli fərregat n igi ən təlməxjujaten əmosnen alyalamaten d aratan simaklalnen sataddinen tidət a mosan salan win əqqalnen arraxmat-net.

⁴ Mişan təzun tamattay n əҗrəm. Wiyyad əwaran aganna wa n Kəl-Əlyəhud, wiyyad aganna wa n nəmmuzal.

⁵ Ənkarən aytedan win wər nəmos Kəl-Əlyəhud əd Kəl-Əlyəhud əd muzaran-nasan sam-markasan ad agin tarşəxşad labasnen i Buləs əd Barnabas, anҗin-tan kərəz əs təgur ən təhun.

⁶ As isla Buləs əd Barnabas awen, əgmadan aҗrəm wen, əkkan Lustra əd Derbe əmosnen

iḡərman n akal wa n Lukawnəya əd kallan win tan-əḡlaynen,

⁷ a daḡ-san əmmalan isalan n Əlinjil.

Buləs əd Barnabas daḡ Lustra

⁸ Aḡrəm ən Lustra ih-ay aləs n anabdon s as d-ihəw da, əmmutan daran-net, wər kala təwer takkolt-net amaḡal.

⁹ As əzəl iyyan ad issisam i Buləs iṣṣewal, idaku Buləs s asawad, inay daḡ-as as, ila əzəḡzan a t-izzozayan;

¹⁰ təzzar inn-as s afalla: «Ənkər, taḡəda tebadday-nak!» Iggad aləs, iggaz šin teklay.

¹¹ As tənay tamattay təḡget awa iga Buləs den, ad gannin aytedan s afalla daḡ awal wa n təlukawnəysat: «Imalan əhânen šaššelan an aytedan, a fall-ana d-əzzəbbatnen.»

¹² Əgan i Barnabas esəm n iyyan daḡ əssənaman-nasan as gannin «Zus», Buləs əgan-as esəm n iyyan as gannin «Hərmes» fəlas ənta a imosan əməššewəl.

¹³ Inkar əlimam n əssənəm wa igan «Zus» âs ehan n əḡibada-net iha imi n əḡrəm, isassalway-du əs mawan n əḡrəm izəgran əd tətəltəla ən təjigay, ira ənta əd tamattay tagget a tan-agin šizəḡzam i Buləs əd Barnabas.

¹⁴ Mišan as əslan nəmmuzal win əganen Barnabas əd Buləs awen, zazzarren šikadkaden-nasan fəl man-nasan, ozalan əs tamattay təḡget ədkâlan imaslan-nasan s afalla gannin:

¹⁵ «Xa meddan! Ma tətəḡḡim da? Nakkanay wər nəmos ar aytedan ən šilaten-nawan. Isalan n Əlinjil a dawan-du-neway fəl ad tammazzayam

d əlχibada n əssənəman, tutabam əs Məššina di n Amaylol a d-ixlakan ijənnawan d amaḍal əd gərwan d awa tan-ihan kul.

¹⁶ Daχ elan win ərəwnen, oyya šimattiwen kul, əlkamnat i tara ən man-nasnat.

¹⁷ Mišan dər iga awen da ya, iga i man-net təgəyya id issəkna əlluχ-net imosan: əsufəy wa dawan-d-itaggu akonak daχ jənnawan, ihakk-iwan šimeren olaχnen əd sudar, isifəliwis-kawan.»

¹⁸ Gərrid as sahhadarren aytedan əs batu ta əgan den, əgdalan-asan a dasan-agin šinagzamen.

¹⁹ Osan-du Kəl-Əlyəhud wiyyad a d-əfalnen aχrəm n Antəyoxəya əd wa n Ikonəyum, əššewalan y aytedan har tan-əssəwaran aganna wa-nasan. Ad əggaran Buləs əs təhun, dəffər adi zarorawan-tu har dər-əs əgmadan aχrəm, əχilan aba-tu.

²⁰ Mišan as sər-əs d-əddewan nalkiman ən Ƴaysa, χalayχalayan-tu, ibdad-du iqqal aχrəm. As affaw, iddew əd Barnabas əkkan aχrəm ən Derbe.

Tewaχlay ən Buləs əd Barnabas Antəyoxəya

²¹ As əmalan isalan n Əlinjil daχ aχrəm wen, əlkaman aytedan aggotnen i Ƴaysa; iqqal Buləs əd Barnabas aχrəm ən Lustra əd wa n Ikonəyum əd wa n Antəyoxəya,

²² ad gammayan daχ nalkiman ən Ƴaysa win χərman win ad zəzzəwen daχ tarrayt-nasan. Šāwalan-asan, talaman-asan fəl man s ad zəzzəwen daχ əzəgzan-nasan, gannin-asan:

«Illikan as, iguz ən Taymar ta n Məššina, idded əd təssust tagget.»

²³ Əkkulluk n Əlkənisat sinafranan-as imuzaran, əššedawan awen əd təwatriwen d əzum, amaran agin-tan dağ təxlift ən Məššina di as əzzəgzanan.

²⁴ Dəffər awen ərzagan akal wa n Bissidəya, okayan əs wa n Banfiləya.

²⁵ Əmalan isalan n Əlinjil dağ əxrəm wa n Bərge, amaran ərasan əs wa n Attaləya.

²⁶ Əggazan aɣlal n aman dağ Attaləya, ənnəmadan Antəyoxəya, aɣrəm was ənta as kala dağ-as tawaggan dağ təxlift ən Məššina y əššəxəl wa əssəndan den.

²⁷ As din-osan, sassaxran-du aytedan kul n Əlkənisat, təzzar əsoɣalan-asan isalan n arat kul was tan-ikfa Məššina turagat n igi-net, d əmmək was olam Məššina tarrayt n əzəgzan i təmattiwen šin wər nəmos Kəl-Əlyəhud.

²⁸ Dəffər awen əmalan ɣur nalkiman win den har əgan tamert tagget.

15

Əmənəy ən məzzəgzan əs ɣaysa dağ Yerusalam

¹ Osan-du meddan wiyyad a d-əgmadnen akal ən Yahudəyya aɣrəm n Antəyoxəya ad sasaxrin inalkiman ən ɣaysa, gannin-asan: «As wər təlkemam y aɣadat n əmənəkəd ta d-oyya ənnəbi Musa, wər za təgrəwam əɣillas.»

² Wər irda Buləs əd Barnabas əs batu ten, eway-du awen tamazaq labasat gar-essan əd Buləs əd Barnabas. Təzzar tətawagga tanat

n ad aggazzay Buləs əd Barnabas əd nalkiman ən Ҳaysa wiyyad əs Yerusalām fəl ad ənəyan inəmmuzal əd muzaran n Ҳлкənisat daḡ batu ten.

³ Təkf-en Ҳлкənisat ta n Antəyoxəya arat kul was əddərarān, amaran əglaṅ. Ҳrzagan akal wa n Fenisəya əd wa n Samarəya suḡulaṅ isalan kul ən tətubt ta d-əganat təmattiwen šin wər nəmos Kəl-Ҳlyəhud əs Məššina. Isifilawas awen wəllen inalkiman kul win kallaṅ en.

⁴ As osan Yerusalām təg-asan Ҳлкənisat ketnet marxaba əd nəmmuzal əd muzaran. Təzzar əgan daḡ-san isalan n arat kul was tan-ikfa Məššina igi-net.

⁵ Mišan əggadan-du meddan wiyyad ən nalkiman ən Ҳaysa əhanen taggayt ta n Farisaytan ənnan: «Ҳmənkəd əd ləkkum y əlqanun wa n ənnəbi Musa fərəḍ a imos fəl aytedan win wər nəmos Kəl-Ҳlyəhud.»

⁶ Təzzar əmmənayan nəmmuzal əd muzaran n Ҳлкənisat fəl ad əssənan awa z'agin daḡ batu ten.

⁷ As ərəwan əmmizayān, ibdad Butros inn-asan: «Imədrayan-in, təssānam as irəw as di-sannafran daḡ-wan Məššina fəl ad aslin aytedan win wər nəmos Kəl-Ҳlyəhud isalan n Ҳlinjil daḡ imi-nin, əzzəgzənan əs Məššina.

⁸ Məššina issānan awa ihan əwəl n awedan kul, issikna tərəddawt ta sər-san iga əs təhakkay ta tan-iga Infas wa Zəddigan əs təməwit tas dana-t-ikfa nakkanay win Kəl-Ҳlyəhud.

⁹ Wər danay-izannamazlay dər-san fəlas Məššina a izazdagan iwallan s əzəgzan sər-əs.

¹⁰ Daḡ adi əmərədda ma fel tətəggim

tənağmayt i Məşşina s igi wa tətəggim fəl rawan ən nalkiman əzuk əs wərməd əfrâgan marawan-nana adakal-net wala deɣ nəfrâk-ku nakkanay?

¹¹ Wərgəɣ arraxmat n Əməli Ƴaysa as nəzzəgzan, təssəfs-ana? Əntanay da za, əntanay win wər nəmos Kəl-Əlyəhud, təməwit ta da as əfsan!»

¹² Təzzar təffəsta tamattay ketnet, əssəsaman aytedan i Barnabas əd Buləs suɣulan isalan kul ən təlməɣjujaten əmosnən aɣalamaten d aratan simaklalnen win as tan-ikfa Məşşina igi-nasan daɣ təmattiwen šin wər nəmos Kəl-Əlyəhud.

¹³ As iffəsta Barnabas əd Buləs, işşewal Ƴaqub, inna: «Imədrayan-in, səsəmat-i.

¹⁴ Simɣon Butros issôɣal-ana təməwit tas issənta Məşşina harwa daɣ tizarat əsəkni ən tara ta iga i təmattiwen šin wər nəmos Kəl-Əlyəhud s əsənnəfrən wa daɣ-asnat iga aytedan as z'əqqələn tamattay-net.

¹⁵ Amaran inimannak awen d awa ənnan ənnəbitan daɣ Əlkəttaban as ənnan:

¹⁶ *"Ad d-əqqəla dəffər awa, ələsaɣ i Dawəd akaras n ahan-net ibirajjen, əkrəsəɣ iməggulaz-net, əssəbdədaq-qu,*

¹⁷ *fəl ad əgməyan aytedan win d-əqqimnen Əməli. Awalla šimattiwen kul šin wər nəmos Kəl-Əlyəhud, ad əqqəlnat tamattay-nin, əɣbadnat-i. Adi a inna Əməli wa igan aratan di kul",*

¹⁸ fəl təga masnat harwa irəw.

¹⁹ Awen da fəlas nak Ƴaqub, ərdêɣ s ad nayyu əsəmməɣitər n aytedan win wər nəmos Kəl-Əlyəhud win du-tutabnen əs Məşşina.

20 Mišan əktəbatana y-asan širawt, nann-asan ad ammazzayan d əsəmmədəs ən man-nasan s arat ad d-immâran əssənəm, ammazzayan d igi n əzzəna əd tattay ən şan n əmudar tənxa tarzam əd təssay n əzni.

21 Fəlas irəw ad t-əmalan əlfəqqitan sasaxrinen Əttawret daɣ əkkulluk n əɣrəm, itawayru deɣ akk əzəl ən təsənfawt daɣ nan ən Kəl-Əlyəhud win əlyibada.»

Širawt ta tətawasokat i nalkiman ən Ƴaysa win wər nəmos Kəl-Əlyəhud

22 Təzzar ərđan nəmmuzal əd muzaran d Əlkənisat ketnet s ad sənəfrənan wiyyad daɣsan, zəmmizələn-tan s əɣrəm n Antəyoxəya, idawan əd Buləs əd Barnabas. Sannafranan Yahuza was itawannu Barsabbas əd Silas, əmosnen imuzaran daɣ məzzəgzan əs Ƴaysa.

23 Əssəwaran-tan ad awəyan širawt s ənta da awa daɣ-as əktaban: «Awa nakkanay inəmmuzal əd muzaran ən nalkiman ən Ƴaysa win mədrayan-nawan. Nəhul-in imədrayan-nana win wər nəmos Kəl-Əlyəhud, win əhanen aɣrəm n Antəyoxəya əd win əhanen akal ən Surəya əd wa n Kilikəya.

24 Nəslâ assa wa kawan-in-əgan meddan danay-in-əfalnen ši wala turagat-nana, əɣşadan iman-nawan, əşşəwaşan-kawan s awa gannin.

25 Adi a fəl nənəmannak ketnana, nəga tanat ad nəsənəfrən meddan, nəzəmmizəl-tan-in sərwan, idawan-in əd maran-nana Barnabas əd Buləs,

²⁶ əmosnen meddan əgânen iman-nasan daɣ alɣarar fəl əddəlil n esəm n Əməli-nana Ƴaysa Əlməsix.

²⁷ Adı da fəl din-nəzammazal Yahuza əd Silas fəl a dawan-ələsan əsuyəl ən salan win imi s imi.

²⁸ Fəlas issîbdad Infas wa Zəddigan əd nəkkanay iman-nana tanat n as wər kawan-za-nəssəwər əzuk waliyyan ar wa n aratan win əwwəjjabnen,

²⁹ əmosnen: ad tammazzayam əd tattay n amensay itiwakfan y əssənəman əd tassay n əzni əd tattay ən şan n əmudar tənɣa tarzam d igi n əzzəna. As təttafam iman-nawan fəl igi n aratan win di, ad tagim a olâɣan. Nəhul-kawan-in wəllen.»

³⁰ Dəffər awen tawasallaman, əzagadayyan, əqqalan Antəyoxəya, ewâyan şirawt. As din-ewadan əşşədawan-du inalkiman ən Ƴaysa, əkfan-tan şirawt ten.

³¹ Tətawayra, təzzar saddawen-tan salan talammen fəl man win əgrawen den.

³² Amaran işşewal Yahuza əd Silas əmosnen əntanay iman-nasan ənnəbitan ad taggin ənnəsixa aggen i mədrayan talaman-asan fəl man, sisuhen əzəgzan-nasan.

³³ As iga Yahuza əd Silas tamert den, əsəllaman-tan mədrayan win Antəyoxəya fəl ad əqqəlan Əlkənisat ta tan-du-təzammazalat. [

³⁴ Mişan issof Silas ad aqqam den da, iqqal əs Yahuza ɣas a iqqalan Yerusalam.]

³⁵ Ixsar Buləs əd Barnabas daɣ Antəyoxəya, xattaban əntanay əd wiyyad imədrayan aggotnen y aytedan Əlinjil n Əməli, sasayrin-asan-tu deɣ.

Əməzzəy ən Buləs əd Barnabas

³⁶ As əgan tamert dəffər awen, inna Buləs i Barnabas: «Əqqələna imədrayan-nana dağ əzəgzan win əhanen iyərman kul win dağ nəmal awal n Əməli, ad nəssən awa dağ-san in-igan.»

³⁷ Ira Barnabas ad idawan əd Yaxya was itawannu Markus.

³⁸ Mişan inna Buləs wər ihor ad idawan d aləs as dat awen a dağ-san ixtas iman-net dağ Banfiləya, wər xur-san iqqim har səkkəsəwan əşşəxəl-nasan.

³⁹ Təkkus talğa gar-essan har d-eway awen as əmməzzayan. İddew Barnabas əd Markus əggazan aylal n aman əkkan Qibrus.

⁴⁰ Buləs ənta isannafran Silas, iddew dər-əs. As t-əgan mədrayan dağ təxlift ən Məşşina, igla.

⁴¹ Illil Buləs akal wa n Surəya əd wa n Kilikəya isisuhit əzəgzan n Əlkənisaten.

16*Tidawt ən Timotay əd Buləs əd Silas*

¹ Osa Buləs ayxəm ən Derbe, as t-ifal ikka wa n Lustra. Amaran Lustra ih-et ənalkim ən Yaysa igân Timotay s anna-net iyyat dağ Kəl-Əlyəhud təzzigzanat əs Yaysa, mişan abba-net iyyan dağ Kəl-Əlyunan.

² Əmmâlan-tu mədrayan dağ əzəgzan win Lustra d İkonəyum əlluğ.

³ Ira Buləs tidawt-net, inkar isammankad-tu fəl əddəlil ən Kəl-Əlyəhud win əhanen akal wen, fəlas əssânan ketnasan as abba-net iyyan dağ Kəl-Əlyunan a imos.

⁴ Ayrəm a d-osa Buləs əd Silas a daḡ-as əməlan i nalkiman win t-əhanen šinaden šin əgan nəmmuzal əd muzaran n Ēlkənisat ta n Yerusalām, əgməyan daḡ-san a dasnat-əlkəman.

⁵ Ad itasahat əzəgzan n Ēlkənisaten, təyttəynat akk əzəl.

Ətəwəyra ən Buləs əs Masedonəya

⁶ Irzag Buləs əd Silas akal wa n Frijəya əd wa n Galatəya əqlan okāyan, fəlas Infas wa Zəddigan a dasan-igdalan emel n awal ən Məššina daḡ akal wa Asəya.

⁷ As osan əgogas n akal wa n Məsəya, əgmayan d iguz n akal wa n Bitinəya, mišan igdal-asan-tu Infas wa Zəddigan.

⁸ Təzzar ərzagan Məsəya, əzagadayyan s əyrəm wa n Trowas.

⁹ As iga ahad orga Buləs: Inay aləs iyyan n akal ən Masedonəya ibdād dənnəg-əs, itansay-tu, igann-as: «Akka-du Masedonəya, tədhələḡ-ana.»

¹⁰ Iga Buləs targət ten ḡas, nəsammatag y iki ən Masedonəya fəlas nəkkās aššak as Məššina a danax-iḡran fəl a daḡ-as nəməl isalan n Ēlinjil.

Əzəgzan ən Lidəya s Əməli daḡ Filib

¹¹ Nəggaz aḡlal n aman daḡ Trowas, nənnəmad akal imosan gərwətlan as itawannu Samotras. As affaw nəkka ayırım ən Neyabolis.

¹² Ənta nəgmad-tu əs wa n Filib imosan ayırım fəl təxkām Ērrum; imos deḡ ayırım wa azzaran daḡ akal ən Masedonəya. Nəga daḡ-as adan.

¹³ As d-ewad əzəl wa n əssəbət, əzəl wa n təsanfawt ən Kəl-Əlyəhud, nəgmad-in

aḡrəm əs tēgadamayt ən tēsəssəngəyt iyyat as norda as, ih-et adag a daḡ taggin Kəl-Əlyəhud šiwatriwen. Nogaz-in šidoden əmminaynen den, təzzar nəqqim, nəššewal-asnat, nəg-asnat deḡ təlxtutbat.

¹⁴ Təssəsam-ana iyyat daḡ-asnat ən təmiksət ən Məššina tēgât esəm Lidəya n əḡrəm ən Təyatir tətəggit jola ən tēbəddəḡ zaggaḡnen hossaynen. Ora Əməli əwəl-net, tēga əsəsəm olāḡan y awa igannu Buləs, təzzar təzzəgzan əs Ƴaysa.

¹⁵ As tətawasalmaḡ daḡ aman ənta d aytedan n aḡaywan-net, tonsay-ana, tənn-ana: «Zama tēhannayam as əzzigzana s Əməli, wədi akkiwat-du ehan-in tazzabbem daḡ-as.» Təgraw-du daḡ-na as nərḡa.

¹⁶ Əzəl iyyan nəkkâ edag ən təwatriwen wen as nəmmənay əd tēmawat iyyat ən təkliṭ iha aggəsuf a das-immalan awa d-izayan, garrawan sər-əs məssawəs tənfa tagget daḡ awen.

¹⁷ Təlkam-ana nakkanay əd Buləs təsiḡarat tēgannu: «Meddan win, eklan ən Məššina di n Amadkol a əmosan. Isalan ən tarrayt ta n əlḡillas as d-osan y a dawan-tan-agin.»

¹⁸ Tēga adan aggotnen tətəggu awen. Iḡla Buləs har t-išəḡaššašat awen, imalallay-tat-in inna y aggəsuf wa tat-ihan: «Omaraq-qay əs tarna ta tēhat esəm ən Ƴaysa Əlməsix, əgməd-tat!» Təzzar igmad-tat aggəsuf daḡ tamazayt ten da.

¹⁹ As ənayan məssawəs as ab-as sər-san tat-du-təgammad tənfa, əbazan Buləs əd

Silas, əlwayan-tan s asammanay n əxrəm, əssəbdadan-tan dat naxkiman.

²⁰ Ənnan i naxkiman: «Məddan win jannajarwayan əxrəm-nana. Kəl-Əlyəhud a əmosan,

²¹ sasayrinen aytedan alxadaten as nakkanay Kəl-Ərrum wər nəla turagat ən tərəddawt sər-əsnat wala ləkkum y-asnat.»

²² Tənkər tamattay ənta da təzzan əs Buləs əd Silas. Ənnan naxkiman a fall-asan təwəzəzərren səlsa, omaran s a dasan-təwəgginat təwit.

²³ As tan-əyyəwanan šiwwit, əgaran-tan dəy kasaw, omaran əmuzar ən kasaw s a dasan-əgu əggaz olâxan.

²⁴ Əmuzar ən kasaw dəy əs das-itawanna awen, inkar ig-en dəy adangaya ən kasaw, inday idaran-nasan dəy şiləlt.

²⁵ As isəggaraygaray əhad, ad itattar Buləs əd Silas sihaken imaslan-nasan taggin dəy təmmalen i Məşşina, əssisaman-asan məskəsa win hadatnen.

²⁶ Wala a ihogan iga amaḍal ənəgəynəgəy s awa iga dəy əssahət hər inəgəynəgəy əhan ən kasaw ketnet, ənnolamnat təsəhar ən kasaw kul taməzəyət ten da, zalabben sassaran dəy məskəsa kul.

²⁷ Inkər-du əmuzar n əhan ən kasaw dəy etəs. As inəy şisəhar ən kasaw ənnolamnat, ilbay-du takoba-net y sər-əs anxu iman-net fəlas a ixil iməskəsa əddəggəgan.

²⁸ Mişan isəxarat-əs Buləs inn-əs: «Ad wər tanxay iman-nak, ketnana nəlla da.»

²⁹ Inna əmuzar ən kasaw ad d-ammawaynat fətəlaten, iggaz ammas ən kasaw tarmad igla

har ewad adangaya-net təndaw-tu taysəst har issəjad i Buləs əd Silas.

³⁰ Təzzar ikkas-tan-du inn-asan: «Meddan, mas di-iwar igi-net əgrəwəx əlxillas?»

³¹ Ənnan-as: «Zəgzən s Əməli Yaysa ad təxləsa kay d aɣaywan-nak.»

³² Amaran əmalan-as awal n Əməli ənta d aytedan kul n aɣaywan-net.

³³ Eway-tan alwaq wen da adawannay n ahad, išşorad ibusan-nasan. Den da ad itawasalməx dəx aman, ənta d aytedan n aɣaywan-net ket-nasan.

³⁴ Təzzar iddew əmuzar ən kasaw əd Buləs əd Silas s ahan-net, isammagarat-tan. Isidawat-tu wəllen ənta d aɣaywan-net ketnet əzəgzan wa əgan əs Məššina.

³⁵ As affaw, zammazalan naxkiman sojitan s əmuzar ən kasaw y a das-annin ad ikkəs Buləs əd Silas.

³⁶ Imal əmuzar ən kasaw əmazal wen i Buləs, inn-as: «Inaxkiman n əyrəm ənnan-du ad tətəwəkkəsam. Dəx adi əgmədat, taglim dəx alxer.»

³⁷ Mišan inna Buləs i sojitan: «A danaɣ-agin šiwwit dat awedan kul da wala əšşəriɣa, ənta nakkanay nəmos Kəl-Ərrum; əgəran-ana dəx kasaw, amaran əmərədda iren a danaɣ-əkkəsən wər t-illa i issanan! Kala kala! Asinet-du iman-nasan, əkkəsən-ana.»

³⁸ Əqqalan sojitan əssoɣalan batu ten i naxkiman. As əslan as Buləs əd Silas Kəl-Ərrum a əmosan, ərməyan.

³⁹ Osan-tan-du a tan-taləxden, təzzar əkkəsantən dəx kasaw, a dəx-san gammayan ad

əgmədan aɣrəm-nasan.

⁴⁰ Ifal Buləs əd Silas kasaw, əkkən ehan ən Lidəya. As əmmənayan əd mədrayan daɣ əzəgzan, əşşewalan-asan, olaman-asan fəl man, amaran əqlan.

17

Tugəyt ən Kəl-Əlyəhud win Tesalonik s ad əqbəlan əsəssəɣri ən Buləs əd Silas

¹ Iga Buləs əd Silas tarrayt ta tərzagat Anfibolis d Abollonəya har din-osan aɣrəm ən Tesalonik a daɣ əlân Kəl-Əlyəhud ehan n əlɣibada.

² Os-en-in Buləs, awa da itaggu fawda. Iga den karadat əssəbətən itiməšiwil əd Kəl-Əlyəhud daɣ salan n awa ənnan Əlkəttaban.

³ Isassagr-asan-tan, issosan-tan âs, Əlməsix ilzâm-tu ad aɣɣazzab iba-tu, təzzar inkər-du daɣ təmattant. Igann-asan deɣ: «Xaysa wa dawan-əmmala da, ənta Əlməsix.»

⁴ Əzzəgzanan wiyyad daɣ-san s awa igannu, təzzar əwaran aganna ən Buləs əd Silas, əntanay əd Kəl-Əlyunan əknanen igət ən miksadan ən Məşšina əd tədoden aggotnen əlânen esəm daɣ aɣrəm.

⁵ Mišan əggaznat təsmiten labasnen taşşam ən Kəl-Əlyəhud, əşşədawan-du ark aytedan win əssuk, əqqalan tiddawat təzzar jannajarwayan aɣrəm. Əstaban y ahan ən Yason gammayan Buləs əd Silas fəl a tan-əssəbdədan dat aljamaxat təsrəɣ-asan.

⁶ Wər ɣur-əs tan-əgrewan, təzzar əlwayan Yason ənta d arat daɣ mədrayan daɣ əzəgzan har tan-əssəbdədan dat naxkiman n əɣrəm, ad

gannin s afalla: «Aytedan win, əddənət ketnet as sər-əs d-ewayan iba n alxer, əmərədda əntanay da.

⁷ Amaran Yason a tan-igan daɣ aɣaywanet. Ketnasan tamazrayan əlqanun n əmənokalnana Qaysara fəlas tənna a taggin ill-ay iyyan əmənokal igân esəm Ƴaysa.»

⁸ Isalan win den as dasan-təsla tamattay əd naxkiman n əxrəm əgan aššawaša labasan.

⁹ Əgan azrəf daɣ Yason d aytedan win ɣur-əs əllanen, har t-ərzaman as tawayyan.

Buləs əd Silas daɣ Berawya

¹⁰ Tarmad as əssokan mədrayan daɣ əzəgzan Buləs əd Silas aɣrəm ən Berawya ahad wenda. As t-in-osan, əggazan ehan ən Kəl-Əlyəhud wa n əlyibada.

¹¹ Əssəknan-tan Kəl-Əlyəhud win Berawya əlləllu ogaran wa tawasaknan daɣ Tesalonik. Əntanay əknân əlqəbulat n awal ən Məššina. Əzəl kul ɣarran Əlkəttaban, taşaggaran kud awa igannu Buləs tidət a imos wala.

¹² Eway-du awen as əzzəgzanan wiyyad daɣsan aggotnen, əntanay əd tədoden ən Kəl-Əlyunan tiwasaxmarnen əd meddan aggotnen ən Kəl-Əlyunan.

¹³ Mišan as əslan Kəl-Əlyəhud win Tesalonik as aɣrəm wa n Berawya ənta da immâl daɣ-as Buləs awal ən Məššina, əkkan-tu ənta da, əgan arak man daɣ aytedan, jannajarwayan aɣrəm.

¹⁴ Den da ad ənkarən nalkiman ən Ƴaysa əssəglan Buləs, əssokan-tu tama n agaraw. Silas əd Timotay əntanay əqqiman-du daɣ Berawya.

¹⁵ Aytedan win məššidaw ən Buləs, əddewan dər-əs har tu-šaššawadan aḡrəm n Atena, amaran əqqalan ewâyan əmazal ən Buləs i Silas əd Timotay n as, a das-d-əlkəman tarmâd.

Buləs daḡ Atena

¹⁶ A iqqal Buləs i midawan-net daḡ aḡrəm n Atena, tamatšin man-net fəl alham n igət wa əgan əssənəman daḡ aḡrəm wen.

¹⁷ Təzzar ad itakku ehan ən Kəl-Əlyəhud wa n əlḡibada itiməšiwil dər-san əntanay d aytedan wiyyad ən miksadan ən Məššina, itakku deḡ akk əzəl asammanay n aḡrəm, itiməšiwil əd win dər itamanay.

¹⁸ Itiməšiwil deḡ Buləs əd meddan wiyyad ən musanan ən taggayt ta n Efikurəyan d Əstoyisəyan. Tamazaḡan dər-əs wiyyad daḡsan gannin: «Wa akk tawalaqqat, ma igannu?» Wiyyad gannin: «Əs tanna imalan wiyyad wər nəzday as immâl isalan-nasan.» Wər tanisassanna awen ar, a fəl dasan-immâl Buləs isalan n Əlinjil, itagg-asan isalan ən Ƴaysa əd tanakra-net daḡ təmattant.

¹⁹ Təzzar əkkan dər-əs s asaggawar n aḡrəm n Atena as itawannu Aryofagəs, ənnan-as: «Aḡana isalan ən masnat təzrâyat ta dər du-toseḡ da,

²⁰ fəlas təssislaḡ-ana aratan wər nəzday, as nərə ad nəssən almaḡna-nasan.»

²¹ Əntanay Kəl-Atena kul əd naftaḡan win tanəhanen, wər əgmedan ar s awal d əsəsəm i salan win d-əzraynen.

22 Ibdad Buləs day ammas n Aryofagəs inna: «Hannaya wəllen as, kawanay Kəl-Atena təddinam wəllen,

23 fəlas əssiylaya day əyrəm-nawan, zigazday idaggan win day təxabbadam imalan-nawan, əssiha fadda fəl adag a day tawakfinat təkutawen fəl iktâb: "Edag n əlɣibada n əməli wər nətawassan". Əməli wa təxabbadam da wər tu-təssenam, ənta as dawan-əmmâla isalan-net da.

24 Məššina wa d-ixlakan əddənet d arat kul wa tat-ihan, ənta a imosan Əməli ən jənnawan d amaḍal, wər ixser day nan n əlɣibada əkrâsan fassan n aggadəm,

25 wala iddirar s a ikna aggadəm fəlas wər iddərər əs wala. Ənta a isuduran, ihakku infas, ihakku arat kul.

26 Ixlak-du tawšeten n əddənet kul day awedan iyyanda, y ad əxsərnat fəl əruru n amaḍal ketnet. Ixtas-asnat azzaman, iga deɣ šizərəz i kallaan win day əxsaran.

27 Igâ Məššina awen fəl ad t-əgməyan aytedan kuddeɣ s adez, mijas a t-əgrəwan; kuddeɣ as wər danaɣ-iha i iggug,

28 fəlas ənta a ittafan təməddurt-nana d əmətəkwəy n akk iyyan day-na d awa nəmos. Adi da a ənnan arat day məssiway-nawan wiyyad əs tənna ta əgan: "Awalla, nakkanay da nəmos bararan-net."

29 Day adi dad zamas nəmos bararan ən Məššina, wər imməkkan ad narḍu as iha šaššelan n əssənam igân day urəɣ, wala azrəf, wala təhunt, a d-inzâm awedan gar-es əd man-net.

³⁰ Əljəhəl wa əgan aytedan daɣ aratan win di, wər fall-asan t-ixseb Məşşina daɣ elan win təljuhəla, mišan əmərədda omar aytedan kul, edag əhan, əs tətubt,

³¹ fəlas ilkâm əzəl igâ təmastant, wa daɣ z'agu y əddənet ketnet əşşərixa oɣâdan. Isinafran aləs wa z'agu daɣ əşşəxəl wədi. Issikna adi y awedan kul s əsənkər wa t-id-iga daɣ təmattant.»

³² As əslan i Buləs išşewal daɣ batu ən tanakra daɣ tamattant, əgan daɣ-as wiyyad tamakkakkayt, wiyyad amaran ənnan-as: «Nəra a dak-nələs əsəsəm daɣ batu tədi əzəl iyyan.»

³³ Den da a tan-ifal Buləs, igla.

³⁴ Dər iga awen da osaxan dər-əs wiyyad daɣ-san təzzar əzzəgzanan. Aytedan win, ih-en Dəyonusəyəs ihân asaggawar wa n Aryofagəs əd təntut təgât Damaris əd wiyyad aytedan.

18

Buləs daɣ Korent

¹ Dəffər awen igmad Buləs aɣrəm n Atena, ikka wa n Korent.

² Den da ad immənay d aləs ən Kəl-Əlyəhud igân esəm Akilas n akal ən Fontəs, a d-osân səket ifâl-du akal wa n Italəya ənta əd hannes Friska; fəlas əmənokal Klawdəyus Qaysara a omaran s ad təwəstəxan Kəl-Əlyəhud kul daɣ əɣrəm n Ərrum. Osax dər-san Buləs.

³ Amaran dad imos as ola dər-san əşşəxəl - ketnasan əşşəxəl-nasan igi ən həktan - imal ɣur-san Buləs, išxal.

⁴ Akk əzəl ən təsanfawt, itaggu Buləs isalan daɣ ahan ən Kəl-Əlyəhud wa n əlɣibada, igam-may d ad əzzəgzənan Kəl-Əlyəhud əd Kəl-Əlyunan.

⁵ As d-osa Silas əd Timotay Buləs əfâlan-du Masedonəya, igmad Buləs ənta s amel n awal ən Məşşina ɣas, itagayyat i Kəl-Əlyəhud as Ƴaysa a imosan Əlməsix.

⁶ Mišan ugayan sər-əs Kəl-Əlyəhud, a turabbadan. Ibbəkbak Buləs isəlsa-net, almaɣna ab'as dər-san idraw wala. Inn-asan: «Təlmanam iman-nawan; iwəret alxaq-nawan iɣafawan-nawan, nak ab'as di-iwar alxaq n iba n əlɣillas-nawan. A obazan ɣur əmərədda aytedan win wər nəmos Kəl-Əlyəhud a z'akkaɣ.»

⁷ Təzzar ifal-tan, iggaz ehan n aləs igân esəm Titəyus Yustus imosan əmiksad ən Məşşina as illa ahan-net dəgma n ahan wa n əlɣibada ən Kəl-Əlyəhud.

⁸ Krisbəs wa n əmuzar n ahan ən Kəl-Əlyəhud wa n əlɣibada ənta izzigzan s Əməli, ənta harkid aytedan n aɣaywan-net kul. Əslan Kəl-Korent aggotnen i salan win itaggu Buləs, əzzəgzanan əntanay da, təzzar tawasalmaɣan daɣ aman.

⁹ As ahad iyyan iga Buləs targət a daɣ das-inna Əməli: «A kay wər təggəz tasa, kalar šawal ad wər taffasta,

¹⁰ əllec-qu dər-ək, wər t-illa i z'ifrəgan a dak-ixşəd arat, fəlas ələɣ aytedan aggotnen daɣ əɣrəm wa.»

¹¹ Ixsar Buləs daɣ əɣrəm ən Korent har iga awatay d aganna, isasaɣru aytedan awal ən Məşşina.

12 Azzaman win daɣ imos Galləyyun ənaxkim n akal wa n Akayya, ənkaran Kəl-Əlyəhud əgan eɣaf fəl Buləs, əbazan-tu, ewayan-tu s adag n əššəriɣa,

13 ənnan: «Aləs wa, igammaɣ d ad əɣbədan aytedan Məššina əs təməwit təmmizrayat əššəriɣa.»

14 As zama issinta Buləs daɣ awal, inna Galləyyun i Kəl-Əlyəhud: «Kawanay Kəl-Əlyəhud, ənnaɣ assa a di-du-təgam daɣ batu n arat immizrayan əššəriɣa madeɣ ark amazal labasan, iməl-tu əddəlil wa fəl dawan-z-əssəsəmaɣ;

15 mišan zama awa tamazaq təgât fəl təfir d əsmawan d əššəriɣa-nawan, əsrəɣat-tan kawanay iman-nawan, nak wər areɣ ad əqqəla əmašraɣ n aratan zun win di.»

16 Amaran isassardaɣ-qan ehan wa n əššəriɣa.

17 Təzzar ənkaran ketnasan, əbazan Sustinəs wa n əmuzar n ahan ən Kəl-Əlyəhud wa n əlɣibada, ad t-əggatan da da dat ahan wa n əššəriɣa; mišan wər izlay Galləyyun daɣ awen.

Iqqal Buləs aɣrəm n Antəyoxəya

18 Iqla Buləs ixsâr daɣ əɣrəm ən Korent har irəw. Dəffər adi inamagga əd nalkiman ən Ƴaysa šiwatriwen, iggaz aɣlal n aman ikka Surəya, iddew əd Friska d Akilas. Harwada wər iggez aɣlal n aman daɣ Qankrəya inimahazan əd Korent akku Surəya ad ilza eɣaf-net y ad assaknu s awen aɣdawal wa iga.

¹⁹ As osan aḡrəm n Efez, imməzzay dər-san Buləs. Iгла ənta iggaz ehan ən Kəl-Əlyəhud wa n əlḡibada imašawal dər-san.

²⁰ Eḡmayan daḡ-as a ḡur-san ihag, ugay-asan.

²¹ Mišan as tan-ifal inn-asan: «[Wər imməkkan a di-wər-iga əmud wa d-izayan daḡ Yerusalam.] A kawan-d-əqqəla kud Məššina irda.» Iḡmad Efez iha aḡlal n aman.

²² As izzəbbat daḡ əḡrəm wa n Qaysarəya, iggəzzay, ikka Yerusalam issəslam Əlkənisat, dəffər adi izagaday, ikka aḡrəm n Antəyoḡəya.

²³ As daḡ-as iga tamert, iḡmad-tu, illil akal wa n Galatəya əd wa n Frijəya, isisuhit əzəgzan ən nalkiman ən Ḣaysa kul.

Assa n Abbolos Efez d əššəḡəl ən Buləs daḡ Akayya

²⁴ As itaggu awen, aḡrəm n Efez os-ay-du aləs ən Kəl-Əlyəhud igân esəm Abbolos n əḡrəm n Alaskandrəya, imosan aləs issânan awal wəllen, igân masnat tagget y Əlkəttaban.

²⁵ Itiwasasaḡra tarrayt ta n Əməli, amaran ikf-ay Infas wa Zəddigan gəlleyat daḡ igi ən təlḡutbat, isasaḡru deḡ s əlluḡ daḡ batu ən Ḣaysa; dər iga awen da ya, isalan n əsəlməḡ wa itaggu Yaxya aytedan daḡ aman ḡas a t-əhanen.

²⁶ Ad itaggu awal daq-qu wər təha tasa daḡ ahan ən Kəl-Əlyəhud wa n əlḡibada. As das-təsla Friska d Akilas, əddewan dər-əs, sassaqran-tu s əlluḡ, əššotan-as masnat ta iga tarrayt ta n Məššina.

²⁷ Dəffər awen isammarkas Abbolos iki n akal wa n Akayya, təzzar ədhalan-tu mədrayan-net

daḡ əzəgzan s awen. Ǝktaban širawt i nalkiman ən Ƴaysa win t-əhanen fəl a das-agin təməwit tolâḡat as tan-in-osa. As din-osa, təggaz-tu tənfa zəwwərat a du-təfâllat arraxmat ən Məššina y aytedan win əzzəgzannen,

²⁸ fəlas isabbahaw s assahat dat tamattay iduf wa əgan Kəl-Ǝlyəhud. Issəkn-en daḡ Ǝlkəttaban as, Ƴaysa a imosan Ǝlməsix.

19

Buləs daḡ Efez

¹ Azzaman win daḡ iha Abbolos Korent, ad irzag Buləs akal n ədḡaḡan har iras fəl aḡrəm n Efez. Inay daḡ-as inalkiman ən Ƴaysa wiyyad,

² inn-asan: «Awak kawanay, as təzzəgzanam təgrâwam Infas wa Zəddigan?» Ǝnnan-as: «Wər nəsla fadda as t-illa Infas wa Zəddigan.»

³ Inn-asan Buləs: «Daḡ adi ma imos əzzənəf n əsəlməḡ wa tətawaggam daḡ aman?» Ǝnnan-as: «Ǝsəlməḡ wa n Yaxya.»

⁴ Amaran inn-asan Buləs: «Yaxya, aytedan win ətubnen daḡ bakkadan a isalməḡ daḡ aman, assaknu adi tətubt-nasan, immâl-asan ad əzzəgzənan əs wa du-z-asin dəffər-əs, almaḡna Ƴaysa.»

⁵ As əslan y awen, tawasalməḡan daḡ aman daḡ esəm n Ǝməli Ƴaysa.

⁶ Təzzar issəwar Buləs akk iyyan daḡ-san ifassan-net, əgrawan deḡ Infas wa Zəddigan, əššewalan daḡ awalan wər nətawazday, əgrawan emel ən salan a d-izizabbat Məššina.

⁷ Meddan en, marawessan d əššin.

⁸ Amaran ad itakku Buləs ehan wa n əlyibada ən Kəl-Əlyəhud, itaggu daḡ-as təlɣutbat wər t-illa is tu-təha tasa-net har iga karadat təlil. Igammay d ad isəttəddu i Kəl-Əlyəhud isalan win itaggu daḡ batu ən Taḡmar ta n Məššina.

⁹ Mišan saggarmaman wiyyad daḡ-san iwallan-nasan, ugayan s ad əzzəgzənan s awa igannu, fadda ad gannin dat tiddawat aratan wər noleḡ əs tarrayt ta n Əməli. Imməzzay dər-san Buləs, iddew əd nalkiman ən Ƴaysa; a tan-isasaḡru akk əzəl daḡ ahan ən taḡaray n aləs iyyan igâ esəm Turanus,

¹⁰ har iga əššin elan; har as aytedan win akal n Asəya, gər za win Kəl-Əlyəhud wala win Kəl-Əlyunan, ketnasan əslan y awal n Əməli.

¹¹ Isisugu Məššina Buləs təlməxjujaten wər nətawazday,

¹² har as, tamawayan əlkəšifatan əd təsəwad ən təbdoq ədasnen Buləs fəl a sər-san təwədəsan miranan. Tazzayan aytedan en daḡ təwərnawen-nasan; win daḡ-san əhan kələsuf deḡ gammadan-tan.

¹³ Ənkaran Kəl-Əlyəhud wiyyad əllâmnən gər kalla, takkasan kələsuf daḡ aytedan, ad gammayan əntanay da d-ikus ən kələsuf daḡ aytedan s esəm ən Ƴaysa, gannin daḡ təməgraw-nasan: «Əhâdaḡ-awan əs Ƴaysa, was itaggu Buləs isalan-net ar, ad təgmədam awedan a!»

¹⁴ Əssa meddan ən mədrayan əmosnen mad-danəs n əmuzar iyyan n əlimam igân esəm Sewa a tagginen awen.

¹⁵ As ənnan awen y aggəsuf, a dasan-annu: «Əzdâyaḡ Ƴaysa, Buləs deḡ əššânaḡ awa imos,

kawanay amaran, ma təmosam?»

¹⁶ Təzzar ifətəqqət daḡ-san awedan wa əhan kələsuf da, əggəznat-tu təḡurad a tu-sisarnanen meddan en ketnasan, iḡləb-tan əs təwit, har as, as gammadan ehan wen, ozâlan, əzzâfan, əbbôsan.

¹⁷ Əslan aytedan n Efez kul awen, gər za win Kəl-Əlyəhud wala win Kəl-Əlyunan. Təggaz-tan tasa ketnasan, təzzar əzzəzwaran wəllen esəm n Əməli Ƴaysa.

¹⁸ A du-tasin aytedan aggotnen əzzigzannen əs Məşşina, suḡulan ark mazalan win as kala tan-taggin.

¹⁹ Ewayan-du massaxaran aggotnen əlkəttaban-nasan, əssəqqadan-tan dat awedan kul. Itawaxsab awa d-ənzan, iqqal səmmosat təmərwən n əgim ən tamma n əzrəf.

²⁰ Emmək en da əs təzawwazawaz tarna n Əməli awal ən Məşşina, təssəkna assahat ta təhat awal ən Məşşina.

²¹ Dəffər awen, isammarkas Buləs daḡ man-net iki ən Yerusalam, immər akal wa n Masedonəya əd wa n Akayya. Igannu daḡ man-net: «Dəffər as oseḡ Yerusalam, kundaba əkkeḡ aḡrəm wa n Ərrum ənta da.»

²² Təzzar izammazal Timotay d Erastus win madhalan-net s akal ən Masedonəya, mişan ənta iman-net igla iha akal wa n Asəya har daḡ-as ihog.

Şiməḡutar šin d-eway əlyibada n əssənəman daḡ Efez

²³ Azzaman en inijarway daḡ-san aḡrəm n Efez wəllen fəl əddəlil ən tarrayt ta n Əməli.

24 Ill-ay anad iyyan igân esəm Demetrəyəs, itaggin daɣ əzrəf fototan n ahan n əssənəm iyyan imosan tantut təgât esəm Artemis. Igarraw daɣ awen tənfa təknât igət i nadan win midawan-net.

25 İşsedaw-tan-du ketnasan, əntanay əd nadan wiyyad win əddarnen daɣ awen, inn-asan: «Ya meddan, təssânam as təgərgist-nana, təqqân daɣ əşşəxəl wa da.

26 Mişan təhannayam kawanay iman-nawan, təslâm deɣ awa itaggu aləs wədi as itawannu əddi Buləs. A igannu: "Imalan win əgan fassan n aytedan, wər əmosan fadda imalan." Izazzagzan awen y aytedan aggotnen, wərgə da da daɣ Efez ɣas ad issəxrak aytedan, kalar harkid taşşam n aytedan win akal n Asəya kul.

27 Arat wa, wərgəx əşşəxəl-nana ɣas as du-z-awəy iguz ən tazak n ad itəwəlku, kalar ehan n əlyibada wa n Artemis di maqqarat, ta təmosat təməlit-nana ənta da ad irtək almaqam-net, tammazzay fadda d ətəwəsəxmar, ənta əxbâdan aytedan kul win akal n Asəya, d əddənet ketnet.»

28 As əslan aytedan win das-əssəsammen y awen, iggaz-tan alham labasan, əssokan imaslan-nasan ijənnawan gannin: «Artemis ta n Kəl-Efez di maqqarat!»

29 Təga tənajarwayat daɣ əxrəm ketnet. Tənkar tamattay təggag s ahan zəwwəran wa n əmənəy, təlwây Gayəs d Aristarxus win akal ən Masedonəya əmosnen imidawan ən Buləs dər iddew daɣ əşikəl.

30 Təzzar ira Buləs ad akku tamattay ten, mişan əgdalan-as-tu nalkiman ən Ƴaysa.

³¹ Wala arat daɣ muzaran n akal n Asəya ən midawan-net da, zammazalan sər-əs aytedan y a daɣ-as əgməyan ad wər ikka ehan en.

³² As itaggu awen, tamattay ta təddewat daɣ ahan en, ketnet tənijarway. Siɣaren aytedan daɣ jənnawan gannin aratan wər nola, fəlas taššam-nasan wər əssenana fadda əddəlil wa fəl əddewan den.

³³ Əbdaxan-in Kəl-Əlyəhud aləs igân esəm Alaskandər əs tiddawat, ittəmal-as awa igan den. Təzzar ad isidugin s əfus-net i tamattay təfastit, y a dasan-iššiwəl s esəm ən Kəl-Əlyəhud.

³⁴ Mišan as əgran as awedan ən Kəl-Əlyəhud a imos əssokan imaslan-nasan ijənnawan jajjayan gannin: «Artemis ta n Kəl-Efez di maqqarat!» Har din-əkkan edag ən sanatat assaxaten gannin awen.

³⁵ Aləs wa imosan ənaktab n əɣrəm en, ənta a isahhadarren tamattay en, inn-as: «Ya meddan n Efez, awak ill-ay awedan wər nəssen as, aɣrəm wa n Efez ənta a imosan əmagaz n ahan wa daɣ tətawaybad Artemis di maqqarat əd šaššelan-net igân daɣ təhunt as jənnawan a daɣ du-tərtak?

³⁶ Zama wər t-illa awedan as ijhâl awen, wədi ihôr ad təhədərrem, ad wər tagim arat waliyyan daɣ tararada,

³⁷ fəlas meddan win du-təlwayam da, wərmâd əmôsan ibaydagan ən nan win əlɣibada, wala deɣ ənnan a labasan əs təməlit-nana.

³⁸ Amaran kud Demetrəyəs əd nadan win midawan-net ill-ay a dasan-iɣšâd awedan, wədi əllân-tu jilan win daɣ itaggu əššəriɣa, əllân-tu

deḡ naxkiman win tu-tagginen. Akkinet-tan.

³⁹ Kud deḡ wiyyad aratan a dər təssəstanam, ad tətəwəknu taḡawšay tədi daḡ asaggawar wa iskatan s awen.

⁴⁰ Nakkanay da əmərədda əhanen tazak n ad itiwənnu əfəlləḡ a nəḡa fəl əddəlil n awa igan azalada; fəlas wər t-illa əsarū nəḡa as nənna ənta a fəl təḡa tənajarwayat ta.» Iḡrad ənaktab n əḡrəm awal wen ḡas, inna i tamattay ad təwəziwəz.

20

Əššəḡəl ən Buləs daḡ Masedonəya d akal ən Kəl-Əlyunan

¹ As ədraran aytedan, isassayra-du Buləs inalkiman ən Ḡaysa ig-asan ənnəsixa issəsmad iwallan-nasan, amaran inamagga dər-san šiwatriwen, igla ikka akal ən Masedonəya.

² Irzag akal en itaggu ənnəsixatan aggotnen i nalkiman ən Ḡaysa, italam-asan fəl man, dəffər awen ikka akal wa n Kəl-Əlyunan.

³ Iḡa daḡ-as karadat təlil. Isimutug y iguz n əḡlal n aman s akal ən Surəya as t-əggazan salan n as əḡân Kəl-Əlyəhud əḡaf fəl a t-anḡin, təzzar iḡa tanat n ad iqqəl dəffər-əs, agu tarrayt ta n Masedonəya.

⁴ Iddew əd Sofatrəs ag Fərəs wa n əḡrəm ən Berawya, d Aristarxus əd Səkəndus win n əḡrəm ən Tesalonik, əd Gayəs wa n əḡrəm ən Derbe, əd Tişik əd Trofiməs win n akal n Asəya amaran əd Timotay.

⁵ Əḡlan meddan win, azzaran-anay, əqqalan-anay daḡ əḡrəm ən Trowas.

⁶ Amaran nakkanay as fall-anax okay əmud wa daɣ tattin aytedan ſigəlwen ſin wər iha xamira, nəggaz aɣlal n aman daɣ Filib nəkka Trowas. As nəga səmmos adan fəl agaraw nos-en-in, nəga den əssa adan.

Assa ən Buləs i Trowas

⁷ As əzəl wa n alxad imosan əzəl wa azzaran daɣ jilan, nəmmənay daɣ adag iyyanda y ad nədrəw imensewan wiŋ saktan. İſſewal Buləs i nalkiman ən Ƴaysa wiŋ əllanen den har isig-garayaray ahad fəlas əſikəl a fəl insa.

⁸ Əhanat fətəlaten aggotnen ehan imosan suru wa daɣ nəmmənay.

⁹ A iſſewal Buləs den, iqqim aləs iyyan n əmawad igân esəm Ƴutəxos fəl fənətər. İlla den har t-iggaz etəs ad itanaddam. İgla har daɣ-as igla etəs wəllen, ifataqqat, ikka amaɣal. Fənətər ən suru wa n karad a fəl d-ifataqqat den. As d-immədkal, wər idder.

¹⁰ İzzəbbat-du sər-əs Buləs ənta da, ifataqqat fall-as, izalammat-tu, inna: «Ad wər təſſəwəſam, iddâr.»

¹¹ Təzzar iqqal Buləs ehan wa d-izzəbbat, izun imensewan wiŋ saktan, as ətſan, ilas Buləs iſſewal-asan har du-təgmad təfuk, əddi amaran ad igla.

¹² Əmawad ənta, əddewan dər-əs aytedan s aɣaywan iddâr, wər ila əxəli. Ketnasan olam-asan awen wəllen fəl man.

ſiwatriwen ſin əlkamnen inamagga Buləs əd muzaran n Əlkənisat n Efez

¹³ Nakkanay nəgla nəggaz aɣlal n aman nəkka aɣrəm n Assos, nazzar i Buləs. Den da a fall-ana

du-z-iggəz aɣlal, imos as awen da as otas igi-net. Ɛnta iman-net a ira a din-ijəwənkət.

¹⁴ As dana-d-osa daɣ Assos, nənamaggaz dər-əs aɣlal n aman, nəkka aɣrəm ən Mitilenəs.

¹⁵ Nəgmad Mitilenəs nəhâ aɣlal n aman, as əzəl wa hadan nəmmodaɣ y akal imosan gərwətlan as itawannu Xəyyaw, əzəl wa dəffər wədi newad wa n Samos, əzəl wa dəffər wədi nosa aɣrəm ən Miletəs.

¹⁶ Igâ Buləs tanat n as, wər z'immər Efez fəl ad wər allalat daɣ akal n Asəya, fəlas irrorad Yerusalām fəl a daɣ-as t-agu əmud wa n Fantəkawt, kud adi ifrâg igi.

¹⁷ Ɛzəbbi wa nəga daɣ Miletəs a ɣur iza-mmazal Buləs awedan, issəgməy imuzaran n Ɛlkənisat n Efez.

¹⁸ As t-id-osan inn-asan: «Kawanay iman-nawan əhân-kawan salan ən tassaɣ ta dərwan əgeɣ, wa d-əggazaɣ akal n Asəya əzəl w'azzaran, har awas kawan-əfala;

¹⁹ d əmmək was tagga əššəɣəl n Ɛməli əssirasay iman-in daɣ arat kul, iddew-i awen əd məttawan əd təməɣutar šin sər-i du-tawaynat ark tənagmayen šin di-taggin Kəl-Ɛlyəhud.

²⁰ Təssânam deɣ as, wər kala a dawan-əɣbara arat waliyyan a dawan-təha tənfa, aqqama wər dawan-t-əmela, sassayr-awan-tu, gər za dat aytedan wala deɣ daɣ nan-nawan.

²¹ Wər kala əmməzzaya d agamay daɣ Kəl-Ɛlyəhud əd win tan-wər-nəmos ad utaban əs Məššina, əzzəgzənan s Ɛməli-nana ɣaysa.

²² Amaran əmərədda nak da izzəlzam Infas wa

Zəddigan iki n Yerusalam, wər əssenax awa di-iqqalan daḡ-as.

²³ Arat iyyanda ḡas a daḡ əssanax as, ig-i Infas wa Zəddigan ta daw aḡaf as, aḡrəm oseḡ da ilkâm daḡ-i kasaw d alḡazab.

²⁴ Wər ḡur-i təmos təməddurt-in fadda wala, arat wa ḡur-i t-imosan a d-əssəxsəla arat wa dəffər ozala, əḡrəda əššəḡəl wa daḡ-i iga Əməli Ḡaysa, imosan emel n Əlinjil a əhan salan n arraxmat ən Məššina.

²⁵ Amaran əmərədda əssâna daḡ-as, kawanay win gər əllama da, əmmâla Taḡmar ta n Məššina, wər di-za-tələsam anay.

²⁶ Adi a fəl kawan-əgeḡ azalada šigəyyawen n as, ab'as di-iwar alxaq n əzni ən waliyyan daḡ-wan.

²⁷ Fəlas wər kala a dawan-əḡbaraḡ arat waliyyan, əmâlaḡ-awan tarrayt kul ta d-iktab Məššina.

²⁸ Daḡ adi ənəkədat əd man-nawan, təssənam deḡ daḡ tamattay ketnet tas kawan-iga Infas wa Zəddigan imagazan-net, tagim y Əlkənisat ən Məššina təmədint tolâḡat, ənta di da a d-izzənza Əlməsix s əzni wa-net iman-net.

²⁹ Əssânaḡ as, nak as əgley a kawan-d-əggəzan aytedan wər nəzlay əd təzoriyawen labasnen, wər za nayyu Əlkənisat-nawan wər tat-ədesan.

³⁰ Kawanay iman-nawan da, əhân-kawan aytedan as za safraḡnen tidət fəl ad əssəxrəkan inalkiman ən Ḡaysa.

³¹ Daḡ adi agat ənnəyat, a du-təkattim as karad elan a əgeḡ sasaxraq-qawan s iyyan iyyan ehad ezal, əssirtayaḡ awen əd məttawan.

³² Amaran əməredəda əssiylafaq-qawan i Məşşina əd salan win əmmalnen arraxmat-net. Məşşina ifrâg əsəssuhi n əzəgzan-nawan d əsəttəddi n agaraw wa za tagim day təkasit ta issənsa y aytedan kul win zaddognen.

³³ Wər di-ides as əgêx attama-nin day əzrəf wala urəx wala isəlsa n awedan waliyyan.

³⁴ Kawanay iman-nawan təssānam as, ifasan win-da-nin as əşxala, əkneç s əşşəxəl-nasan tuməxlaten-in əd šin midawan-in win dər əddəwa.

³⁵ Faw saknaq-qawan as, əmmək en da as kawan-iwar kawanay da, ad təşxəlam fəl ad tilalam i maddararan, a du-təkattim batu ta iga Əməli Yaysa ənta iman-net, as inna: "Əbbələl wa itaggu awedan wa ikfan, oğar wa itaggu awedan wa igrawan."»

³⁶ As inna Buləs awen, igaraffat ənta dər-san ad itattar.

³⁷ Ketnasan hallin, tizələmmen Buləs, tamallen-as.

³⁸ Arat wa ixsadan iman-nasan wəllen, tənna ta dasan-iga, wər tu-z-ələsan anay. Amaran əntagan-tu har osa aylal n aman.

Şigəyyawen day Ərrum

21

Iki ən Buləs əd midiwan-net Yerusalam

¹ As dər-san nəmməzzay gərrid, nəggaz aylal n aman, izzal dər-na s akal imosan gərwətlan as itawannu Kos. As əzəl wa dəffər wen, nəgmad-tu s akal imosan gərwətlan as itawannu Rodəs. Nəgmad Rodəs nəkka ayrəm ən Fatara.

² Nogaz-in daḡ-as aḡlal n aman itakkin akal wa n Fenisəya, təzzar nəggaz-tu, nəgla.

³ As nogga akal imosan gərwətlan as itawannu Qibrus, nəḡlay-tu fəl aganna wa n agala, nədag sa sər akal wa n Surəya har nəzzəbbat daḡ əḡrəm ən Tir s ənta a daḡ za təwəzəzəbben lalan win eway əḡlal.

⁴ Nəgmay inalkiman ən Ƴaysa har tan-nəgraw, nəzzəbbat ḡur-san har nəga əssa adan. Nəlla ḡur-san as tan-issosan Infas wa Zəddigan daḡ ad annin i Buləs, ad wər akku Yerusalam.

⁵ Dər iga awen da ya, as əndan adan win den, nəmatakway nəgla. Əntagan-ana ketnasan, harkid tədoden-nasan əd bararan-nasan har nəgmad əḡrəm, amaran nəgaraffat daḡ tama n agaraw, nəttar.

⁶ As dər-san nənamagga šiwatriwen, nəggaz aḡlal n aman; əntanay əqqalan iḡawnatan-nasan.

⁷ Nəgla daḡ əššikəl-nana, nəgmad Tir nəkka Bətolemayəs. As daḡ-as nəzzəbbat, nəkka imədrayan-nana win t-əhanen y a tan-nəssəsləm, nəga ḡur-san əzəl.

⁸ As əzəl wa dəffər wen nəkka əḡrəm ən Qaysarəya. As t-in-nosa nəzzəbbat daḡ ahan ən Filibus wa n əməggi ən salan n Əlinjil imosan iyyan daḡ meddan win əssa, win as kala tawasanafranan fəl ad tilalan y Əlkənisat ta n Yerusalam.

⁹ İla əkkozat təbararen wər nəzday meddan. Šibararen šin əmosnat tənnəbiten.

¹⁰ As nəga adan aggotnen den, osa-du ənnəbi iyyan igân esəm Agabus, a d-ifalan akal ən Yahudəyya.

11 Os-ana-du, idkal əsatəb ən Buləs, ikrad sər-əs idaran win-net iman-net əd fassan-net, amaran inna: «Ənta da awa inna Infas wa Zəddigan: "Aləs wa ilan əsatəb wa, əmmək wa da as tu-z-əkrədan Kəl-Əlyəhud dəx Yerusalam, agin-tu dəx fassan n aytedan wər nəmos Kəl-Əlyəhud."»

12 As nəsla y awen, ad nətansay Buləs, nakkanay əd nalkiman ən Yaysa win əxrəm en fəl ad wər aggazzay akku Yerusalam.

13 Mišan inn-ana Buləs: «Ma fel təhallim, təsimələşsem əwəl-in? Nak, wərgex kerrad xas as sammataga, kalar tamattant da simatagax-as dəx əxrəm ən Yerusalam fəl əddəlil n esəm n Əməli Yaysa.»

14 As nənay as wər t-idu-za-nəssuxəl dəx awas ira igi-net, noyy-ay, nənna: «Aget Əməli taranet!»

15 Dəffər adan win den ad nasammatag i teklay, nəgla nəggəzzay əs Yerusalam.

16 Əddəwan dər-na arat dəx nalkiman ən Yaysa win əxrəm ən Qaysarəya. Ewayan-ana s ahan n aləs igân esəm Mənason n akal imosan gərwətlan as itawannu Qibrus, irəwan imos analkim ən Yaysa, nəzzəbbat xur-əs.

Əmənay ən Buləs əd muzaran n Əlkənisat ən Yerusalam

17 As din-nəggaz Yerusalam, əgan-ana mədrayan-nana dəx əzəgzan win əllanen den marxaba, əddəwen.

18 As affaw iddew dər-na Buləs s ahan ən Yaqub xur əddəwan əmḡaran n Əlkənisat ket-nasan.

¹⁹ Issəslam-tan Buləs, təzzar iḡrad-asan əsuxəl n aratan kul win iga Məşşina əs tarrayt n əşşəḡəl wa itaggu Buləs daḡ aytedan win wər nəmos Kəl-Əlyəhud.

²⁰ As əslan y aratan win inna, ad əmmâlan Məşşina. Dər iga awen da ya ənnan i Buləs: «Amadray-nana, ənəy igiman əs giman n aytedan win əzzəgzannen əs Ƴaysa daḡ Kəl-Əlyəhud, ketnasan zizawen wəllen daḡ iduf n əşşəriḡa wa n Əttəwret.

²¹ Ewâdan-tan-du za salan wizawaznen daḡ batu-nak, əmosnen as: əsəssəḡri wa tətəgga, itaway-du əs Kəl-Əlyəhud kul win əhanen şimattiwen şin wər nəmos Kəl-Əlyəhud əməzzəy d əşşəriḡa wa n Əttəwret, təgannaḡ-asan ad ammazzayan d əsəmmənkəd ən bararan-nasan əd ləkkum y alḡadaten ən Kəl-Əlyəhud.

²² Daḡ adi ma za naku? Fəlas igmâd aşşak as ad aslin as tosêḡ-du.

²³ Əddəlil wədi a fəl za taga a wa dak-zannu da: Əhân-anax əkkoz meddan ədkâlnen aḡḡawal.

²⁴ Idaw dər-san s adag wa daḡ zazdagan aytedan, təzzəzdəga iman-nak kay dər-san, tərzəmaḡ fall-asan arat wa tan-ihan, fəl a dasan-təwəlzın ḡafawan-nasan. Əddi ad z'əssənan aytedan kul as, awa sər-ək itawannin wər t-ihā a igân, kalar kay da təlkâmaḡ y əşşəriḡa wa n Əttəwret.

²⁵ Amaran aytedan win wər nəmos Kəl-Əlyəhud win əlkammen i Ƴaysa, nəktâb-asan şirawt əhânat tənaden şin nəga əmosnen as, ad wər atşin isan əmosnen takutay y əssənam,

wala ašwin azni, wala atšin isan n əmudar tənxa tarzam, wala agin əzzəna.»

²⁶ Təzzar iddew Buləs əd meddan win əkkoz en. As əzəl wa dəffər wen izzəzdağ iman-net ənta dər-san, amaran iggaz Ehan wa Zəwwəran n Əlyibada, imal i limaman əzəl wa dağ za tandu tazdak-nasan, əzəl wa dağ za tətəwəkfu təkutay fəl akk iyyan dağ-san.

Ətərməs ən Buləs dağ Ahan wa Zəwwəran n Əlyibada

²⁷ As zama dağ-san əkmâlan əssa adan, tandu tazdak-nasan, ənayan Kəl-Əlyəhud wiyyad n akal n Asəya Buləs dağ Ahan wa Zəwwəran n Əlyibada; təzzar jannajarwayan tamattay, əgan dağ-as arak man əs Buləs, əbazan-tu.

²⁸ Gannin s afalla: «Ya Kəl-İsrəyil, agəzat! Ənta da aləs wa itaggin dağ təlxtutbaten šin itaggu y aytedan kul dağ adag kul ark awalan fəl tamattay-nana, d əššərixa wa n Əttəwret d Ahan wa Zəwwəran n Əlyibada wa. Iгла har as, iga-du Kəl-Əlyunan dağ Ahan wa Zəwwəran n Əlyibada, isammadas edag zəddigan wa.»

²⁹ Gannin awen fəlas dat awen ənâyan Trofiməs wa n Efez dağ əxrəm iddew əd Buləs; təzzar ordan as izzogaz-tu Buləs Ehan wa Zəwwəran n Əlyibada.

³⁰ Inajarway əxrəm ketnet, ozalan-du aytedan dağ təsədag kul. Əbazan Buləs, əlwayan-tu əgmadan dər-əs Ehan wa Zəwwəran n Əlyibada, təzzar tawaharan mawan-net dəffər-san tamazayt ten da.

³¹ Gammayan ad agin iman ən Buləs as din-ewadan salan kumanda ən sojitan n Ęrrum n as, aȝrəm ən Yerusalām ketnet inijarway.

³² Iȝra-du sojitan əd kabtanatan-nasan daȝ tamazayt ten da, ozalan sər-san. As togga tamattay kumanda əd sojitan, tərāz daȝ təwit ən Buləs.

³³ Təzzar ikka-du kumanda Buləs, ibaz-tu, omar s ad itəwəkrəd s əššin sassaran, amaran issəstan d awa imos, d awa iȝsad.

³⁴ Təsəȝarat tamattay ketnet, gannin aratan əmmizraynen. Indar i kumanda ad issən awa imosan tidət daȝ takat ten, təzzar omar s ad ammayay Buləs əs barəki wa n sojitan.

³⁵ As ewad Buləs šisəffəttan n ahan wa n barəki, awa sər-əs təga tamattay daȝ əwəjjən, kundaba as t-ədkalan sojitan s afalla.

³⁶ Təlkâm-as tamattay ketnet, təsiȝarat təgannu: «Ammatet, ammatet!»

Aljawab wa iga Buləs dat əljəmayat

³⁷ As zama dər-əs əggâzan sojitan barəki, inna Buləs i kumanda: «Awak ələȝ tarrayt n a dak-annay arat?» Inn-as kumanda: «Ko! Kay təssana təlyunant?»

³⁸ Daȝ adi wər təmosay aw Masar was kala isaffallag aytedan, təzzar iggaz teneray ənta d əkkoz gim n awedan ən maggan ən man?»

³⁹ Inn-as Buləs: «Nak, Ag-Ęlyəhud a əmosay, ihəwan daȝ əyrəm ən Tarsa daȝ akal ən Kilikəya imosan aȝrəm fəl təga masnat. Onsayaq-qay a di-takfa turagat n ad əššiwəla i tamattay ta.»

⁴⁰ Ikf-as-tat kumanda, ibdad Buləs fəl təsəffəttan, isaddagan s əfus-net i tamattay

ad təssəsəm. Təffəsta tamattay ketnet, təzzar išşewal-asan Buləs daḡ təlḡibrit, awal wa-danasan, inn-asan:

22

¹ «Imədrayan-in d abbatan-in, səsəmat əmərədda a kawan-sassagra tadləmt ta tawagga.»

² As das-əslan išşewal-asan daḡ təlḡibrit, əşşotan daḡ əsəsəm y-as; təzzar inn-asan:

³ «Nak Ag-Əlyəhud a əmosa, ihəwan daḡ əḡrəm ən Tarsa ihân akal ən Kilikəya, mišan aḡrəm wa daḡ a daḡ ədwala, əḡrəḡ daw Gamaləyel. Isassaḡr-i s əlluḡ ləkkum y əlqanun n aljad-nana. Əgeḡ gəlleyat daḡ ləkkum i Məşşina šilat ən ta təgam azalada.

⁴ Əzaḡazzabaḡ aytədan win əhanen tarrayt ta da ən Ƴaysa, har əgmadan man wiyyad, karrada meddan əd tədoden, əggaraq-qan daḡ kasaw.

⁵ Əlimam wa Zəwwəran d Asaggawar wa n əḡmaran əggəyyen fəl adi. Əntanay fadda a di-əkfanen šira əkkanen imədrayan-nana, Kəl-Əlyəhud win Damas, fəl ad əgrəwa as din-oseḡ tarrayt n abbaz ən nalkiman ən Ƴaysa kul win t-əhanen, awəyaq-qan-du əs Yerusalam əkrâdan fəl ad awwaddaban.

⁶ Əşşokala za daḡ awen da, as din-əhozaḡ aḡrəm ən Damas attayan n ammas n azal, wala a ihogan, ibalazzat ənnur labasan a d-igmâdan ijənnawan daḡ ḡələyyḡəlayan-in.

⁷ Udeḡ, əsleḡ y əməsli iyyan as di-inna: "Talut, Talut ma fel as di-təzaḡazzaba?"

8 Ənnəy: "Əməli, ma təmosax?" Inn-i: "Nak awa, Ƴaysa wa n Nazaret, wa təzaxazzaba."

9 Ənâyan aytedan win dər əddəwax ənnur wen, mişan wər əslən y əməsli wa di-işşewalan.

10 Təzzar ənnəy: "Əməli, mas di-iwar igi-net?" Inn-i Əməli: "Əbdəd, takkax aƣrəm ən Damas, a dak-daƣ-as-attamal arat kul was kay iwar igi-net."

11 Əddərƣala fəl təllabəst n ənnur en, təzzar əbazan aytedan win dər əddəwa əfus-in, əlwayan-i əs Damas.

12 Amaran Damas ih-et aləs iyyan igân esəm Ananəyâs iksudan Məşşina wəllən, ilkâm y əlqanun-nana, as Kəl-Əlyəhud kul win Damas əssiƣmaran-tu.

13 Os-i-du, ibdad dəƣma-nin, inn-i: "Amadray-nin Talut, iqqələt-kay-du asawad-nak." Iqqal-i-du asawad-in tamazayt ten da, ənayaq-qu.

14 Inn-i dəy: "Məşşina wa əƣbadan marawan-nana a kay-isannafranan harwa dat alwaq, y a kay-issusən tara-net, tənəyax Alƣadil-net, tasla dəy y əməsli wa-net iman-net,

15 id ad təqqəla təgəyya-net dat aytedan kul, təmələx-asan awa tənəyax d awas təsləx.

16 Əmərədda mas təqqala? Əbdəd, tətəwəsəlməxa dəx aman, tansəyax Əməli a kay-izzəzdəg dəx bakkadan-nak."

17 Dəffər awen əqqala Yerusalam. Tattara əzəl iyyan dəx Ahan wa Zəwwəran n Əlƣibada as di-tobaz tarna n Infas wa Zəddigan.

18 Ənəyax Əməli, inn-i: "Ətrəb, təgməda Yerusalam tarmâd, fəlas wər z'əqbəlan aytedan-net təgəyya ta fall-i tətəgga."

19 Təzzar ənneḡ-as: "Ya Əməli, wərgəḡ əntanay iman-nasan əssânan daḡ əmmək was kala ad tilala inan n əlḡibada s iyyan iyyan, saḡfalay aytedan win sər-ək əzzəgzannen, əggataq-qan?"

20 As itawanyal dey əzni n Əstefanos imosan təgəyya-nak, nak iman-in əlley den, ərdêḡ s ətəwənyaxa-net, nak a ogazan ibərnaz n aytedan win əganen iman-net."

21 Amaran inn-i: "Aḡlu, nak a kay-z-izəmmizəlan s igəḡ, əssukaq-qay aytedan win wər nəmos Kəl-Əlyəhud."»

Buləs əd kumanda ən sojitan win Ərrum

22 Əssisaman-as aytedan har d-idkal batu n aytedan win wər nəmos Kəl-Əlyəhud, təzzar saḡaren daḡ jənnawan gannin: «Itəwəkkəset awedan wa fəl amaḡal! Awedan šilat ən wa, wər immək ad iləs təməddurt.»

23 Takkasan imaslan saksodnen, əggaran-in ibərnaz-nasan, əggaran aboqqa daḡ alhawa.

24 Omar kumanda s ad itəwəzugəz Buləs ammas ən barəki, təwəgginat-as təwit s ələkkud fəl a dasan-iməl əddəlil wa fall-as təsaḡarat tamattay.

25 Mišan as t-əkradan y a das-agin šiwwit, inna i kabtan wa illan den: «Awak təlâm tarrayt ən təwit n iyyan daḡ Kəl-Ərrum wər ibez əššəriḡa harwada?»

26 As isla kabtan en y awen, igla imal i kumanda, inn-as: «Ma tətəḡḡa da? Aləs a, in Ərrum!»

27 Ikka-du kumanda Buləs, inn-as: «Tidət as kay in Ərrum?» Inn-as Buləs: «Awalla!»

²⁸ Təzzar inna kumanda: «Nak, azrəf aggen a əzzənza tišit n iyyan daɣ Kəl-Ərrum.» Inn-as Buləs: «Nak ələsəl-in a təmos.»

²⁹ Tarmâd as fall-as əzzənkazan sojitan win as zama a t-əggazan šin tanaxay y a tu-šəššiwəlan. Kumanda iman-net as issan as iyyan daɣ Kəl-Ərrum a isassakrad den əs sassaran, təggaz-tu tasa.

Tebadday ən Buləs dat Asaggawar wa Zəwwəran

³⁰ As əzəl wa dəffər wen, omar kumanda imuzaran ən limaman d Asaggawar wa Zəwwəran ən Kəl-Əlyəhud ketnet s ad ammanay, fəlas ira ad ikkəs aššak daɣ əddəlil wa fəl sattarmasan Kəl-Əlyəhud Buləs. Təzzar issokas-du Buləs, issəbdad-tu dat-san.

23

¹ Idag Buləs Asaggawar s asawad-net, inna: «Imədrayan-in, wər di-təha tərək waliyyat n as ill-ay arat a iqqal wər ira Məššina as kala ad t-əmmozala har awas əbdada da.»

² Mišan omar Ananəyâs wa n Əlimam wa Zəwwəran iyyan daɣ aytedan win əllanen dəgma ən Buləs s a das-infəz.

³ Təzzar inn-as Buləs: «Məššina a dak-z-infəzan, əlmunafiq! Wər təqqimay əddi ar y a di-təšrəxa s awa inna əššərixa, kay təmməzrayaq-qu ad təsawatay imi-nin.»

⁴ Ənnan-as aytedan win əllanen dəgma-net: «Kay, Əlimam wa Zəwwəran ən Məššina a tərabbada?»

⁵ Inn-asan Buləs: «Wər əssenay imədrayan-in as ənta a imosan Əlimam wa Zəwwəran; tidət

dağ as iktâb as: *"Ad wər tannaç a labasan s əmənokal ən tamattay-nak."*»

⁶ Issân Buləs as təzunt n Asaggawar en iyyat Sadusaytan a dağ təga, ta hadat Farisaytan; adi a fəl idkal əməsli-net wəllen dat Asaggawar, inna: «Imədrayan-in, nak Farisay a əmosa, erâwan wiyyad Farisaytan, wər d-əmmewaya s adag n əşşəriça wa, ar fəlas əgeç attama dağ as inəməttan ilkâm a d-ənkəran dağ tamattant.»

⁷ Inna awen ças tənkar tamazaq gər Farisaytan əd Sadusaytan, təzun tiddawat,

⁸ fəlas Sadusaytan əttâfan as wər tu-təlla tanakra dağ tamattant, wala əllân-tu angalosan, wala kələsuf. Farisaytan amaran əntanay əzzigzanan as awen kul ill-ay.

⁹ Təkkus tamazaq wəllen. Inkar arat dağ musanan win Farisaytan əbbəllanan fəl awen, əwaran aganna ən Buləs, ad gannin: «Aləs wa, wər fall-as nəhənnəy lahan waliyyan! Mijas tidət dağ as işşêwal-as aggəsuf madex angalos.»

¹⁰ Awa təga tamazaq-nasan dağ tuksay, təggaz tasa kumanda n ad agin Buləs tankət-tankət. Adi a fəl omar sojitan s ad azzabben fəl a dağ-san d-əxtəsan Buləs, awəyan-tu əs barəki-nasan.

¹¹ As iga ahad, inafalal Əməli i Buləs, inn-as: «Buləs, a kay-wər-təggəz tasa! Əmmək wa dağ as fall-i təggəyyey dağ əçrəm ən Yerusalam, əmmək di da as kay-iwar a fall-i taggayyey dağ wa n Ərrum ənta da.»

Əgan Kəl-Əlyəhud eçaf fəl ad ançin Buləs

¹² As affaw, namaggan Kəl-Əlyəhud eɣaf, əhadan as wər z'atšin, wala ašwin iket wər əgen iman ən Buləs.

¹³ Aytedan win əhadnen den, ogaran əkkozat təmərwen.

¹⁴ Əkkan imuzaran ən limaman d əmɣaran ən tamattay, ənnan-asan: «Nəhâd as, wər z'iggəz arat imawan-nana iket wər nəga iman ən Buləs.

¹⁵ Daɣ adi əmərədda kawanay d Asaggawar wa Zəwwəran əgməyat daɣ kumanda a datwan issəbdəd Buləs, tassaknim as, a təräm ad taššaggaram taɣara-net s əlluɣ. Amaran nakkanay, nasimatag y igi ən man-net harwa duwər-ewed da.»

¹⁶ Mišan isla tagazay ən Buləs i taftaw ten, ikka barəki ən sojitan, iggaz-tu, imal i Buləs.

¹⁷ Təzzar iɣra-du Buləs iyyan daɣ kabtanatan, inn-as: «Əlwəy abi di əs kumanda, ila isalan a das-z-agu.»

¹⁸ Iddew dər-əs kabtan, eway-tu əs kumanda, inn-as: «Amaskasaw wa igan Buləs a di-d-iɣran, igmay daɣ-i a sər-ək d-əlwəya abi a, ilân isalan a dak-z-iməl.»

¹⁹ Ibaz kumanda əfus n əbi, igmad dər-əs aytedan, issəstan-tu, inn-as: «Mas tareɣ a di-tu-təməla?»

²⁰ Inn-as əbi: «Kəl-Əlyəhud əgân eɣaf fəl a daɣ-ak əgməyan tufat ad təssəbdəda Buləs dat Asaggawar-nasan wa Zəwwəran, almat ərân ad aššaggaran taɣara-net s əlluɣ.

²¹ A dasan-wər-tarɗa fəlas wiyyad daɣ-san ogarnen əkkozat təmərwen n aləs a das-za-bəkəmmətnen y ad agin iman-net. Əhâdan as wər z'atšin za wər z'ašwin iket wər əgen adi.

Simatagan əmərədda, wər əqqəlan ar y a t-id-tayya sər-san.»

²² İrşam kumanda y əbi wen fəl amel y awedan waliyyan isalan win das-iga den, amaran issəgl-ay.

Əməwəy ən Buləs s əmuzar ən Qaysarəya

²³ Dəffər awen iğra-du kumanda əşšin kab-tanatan, inn-asan: «Səmmutəgat sanatat təmad ən soji d əssayat təmərwen ən soji dəx win əggannen əggəsan əd sanatat təmad dəx win əttafnen allaxan; y ad akkin Qaysarəya dəffər təsüdəsen.

²⁴ Təsəmmutəgam dəx şisənay šin z'iwən Buləs, təşəšsiwədam-t-in Felikəs wa n ənaxkim dəx alxer.»

²⁵ Amaran iktab-as-in kumanda širawt inn-as-in:

²⁶ «Awa nak Klawdəyus Lusəyas din-ihulan ənaxkim Felikəs əknêx saşmar.

²⁷ Aləs di, a əbazan Kəl-Əlyəhud, as zama əgân iman-net as tan-in-osex əddəwəx əd sojitan. As di-əggazan salan n as awedan n İrrum a imos, əgeq-qu dəx adag a daq-q-in wər ikka arat.

²⁸ Dəffər awen ewayaq-qu s Asaggawar-nasan wa Zəwwəran fəl ad əssənəx lahan wa t-əssəwaran.

²⁹ Ənayaş as, arat iqqâlan əşşərixa wa-nasan şas a fəl tu-şattasan, wərgəx arat a t-issiwaran tamattant wala iguz ən kasaw.

³⁰ Mişan as əsləx as əgân Kəl-Əlyəhud eşaf fəl ad agin iman-net, əssokəx-ak-in əddi da, əntanay amaran ənneş-asan a sər-ək in-awəyan kay şixəttas šin t-əgan.»

³¹ Ǝgan sojitan awas tawamaran. Ǝglan ahad wen da, əddewan əd Buləs har osan aƣrəm n Antifatris.

³² As əzəl wa dəffər wen əqqalan-du sojitan win jawankatnen barəki-nasan, əglan win əwannen əggəsən əd Buləs.

³³ As din-osan aƣrəm ən Qaysarəya, əgan širawt tanad daƣ əfus n ənaxkim, əssəbdadan dat-əs deƣ Buləs.

³⁴ Iƣr-et, amaran issəstan Buləs d akal wa t-ilan. As issan as akal ən Kilikəya a t-ilan,

³⁵ inn-as: «As d-osan aytedan win kay-əƣtasnen, a kay-du-sassaƣra.» Təzzar omar s ad itəwəttəf Buləs daƣ ahan ən təmənukəla was kala t-issəkras əmənokal Herod.

24

Itəwəsəbdad ən Buləs dat ənaxkim Felikəs

¹ Səmmos adan dəffər awen, osa-du Ananəyâs wa n Əlimam wa Zəwwəran, iddew-du d arat daƣ əmƣaran ən Kəl-Əlyəhud d aləs a d-əwwikkalan Kəl-Əlyəhud igân esəm Tertuləs. Ǝxtasan Buləs ƣur ənaxkim n akal Felikəs.

² Təzzar itawaƣra-du Buləs, amaran issənta Tertuləs daƣ amel n aratan win as ənnan Kəl-Əlyəhud iƣşâd-tan, inna: «Ya əmizwar Felikəs, əddəlil-nak d əddəlil n aratan win təgeƣ a fəl igraw akal wa alxer aggen, amaran təgeƣ ənnizam olaƣan i tamattay-nana fəl aššaddat ən təla-nak əgərri.

³ Nətigudəy-ak wəllen daƣ adag kul aratan olaƣnen kul win təgeƣ, ya əmizwar Felikəs!

4 Wər arex a kay-səllulex, batu-nana ši gəzzulat, mišan əgmâya daɣ-ak fəl əddəlil n əllux-nak a dər kay-nəzdây a dana-təssəsəma.

5 Nənây as aləs a, əlməssibat a imos, igam-mayan d əsəffəlləg ən Kəl-Əlyəhud edag əhan daɣ əddənət, imos deɣ əmuzar ən taggayt n arət n aytedan as itawannu Nazaritan.

6 Wala Ehan wa Zəwwəran n Əlyibada da, igmây d əsəmmədəs-net; nəbaz-tu. [Nərâ a das-nagu əşşərixa wa-nana,

7 mišan os-ana-du kumanda Lusəyas, ibaz-tu daɣ-na s assahət,

8 omar deɣ a dat-ək əbdədan aytedan win əxtasnen Buləs.] Kay iman-nak as tu-təssəstana, ad tənəya tidət ən təxəttas kul šin das-nəga.»

9 Təzzar ərdən Kəl-Əlyəhud əd batu ən Ter-tuləs, ənnan tidət a təmos.

10 Isaddagan ənaxkim i Buləs ad iššiwil. Inna Buləs: «Isidawat-i a dat-ək aga batu tas əgməyax aggaz ən man-in, fəlas əssânax əmənokal-in as, irəw təmosax amaşrax ən tamattay n akal wa.

11 Kay iman-nak təfrâgax ad təssənax kud tidət wala bahu as, a ilân maraw adan d əşšin ad əggəzzayax əs Yerusalam y a daɣ-as əxbəda Məşšina.

12 Wərmâd a di-ənâyan daɣ Ahan wa Zəwwəran n Əlyibada, wala daɣ nan win əlyibada, wala deɣ daɣ əxrəm, mişawala d awedan waliyyan za wala jinajarwayax tamattay.

13 Aytedan win, wər əfregan əsəbdəd ən təxəttas šin di-əgan da.

14 Mišan ya ərdeş s arat iyyanda, amaran ad t-anna dat-ək, a t-imosan as: Məşşina di n Əməli ən marawan-nana as əlkama əs təməwit tas tu-tənna tarrayt ta n Əlməsix Ƴaysa, tas gannin əntanay taggayt. ƏzzigzanaƳ s arat kul wa iktaban daƳ Əttəwret d Əlkəttaban n Ənnəbitan.

15 ƏgêƳ attama wa daƳ Məşşina, amaran əntanay da əgân-tu, a t-imos as təll-ay tanakra daƳ tamattant, gər za y aytedan win oƳadnen wala win wər noƳed.

16 Adi a fəlas faw da gammaya nak da wəllen a di-wər-təggəz tərək n a labasan dat Məşşina wala deƳ dat aytedan.

17 A ilan elan ad əgmadaƳ Yerusalam, as əmərədda əqqala-du y a d-awəyaƳ i tamattay-nin şirgiten, aga deƳ şikutawen şin izzəlzam Məşşina.

18-19 Awa da a əheƳ as di-d-osan Kəl-Əlyəhud win Asəya daƳ Ahan wa Zəwwəran n ƏlƳibada, əssindaƳ arat wa di-issəwar əşşəriƳa daƳ salan n əzəzdəg-in; wərmad Ƴur-i təlla tamattay za wala əssinkara ajeqqaqƳ n aytedan. Əntanay as ihor a dat-ək əbdədan, əƳtəsan-i Ƴur-ək, kud ənta əlân əddəlil waliyyan,

20 madəƳ əməlan aytedan win əllanen da lahan was inna Asaggawar wa Zəwwəran əgêq-qu alwaq wa dat-əs əbdada,

21 a wər nəmos as ənneƳ gar-essan s afalla: "Wər di-issəbdad dat-wan azalada y a di-təşrəƳam ar fəl as əzzəgzanaƳ as ilkâm a d-ənkəran nəmməttan."»

22 Felikəs əhân salan wəllen ən tarrayt ta n Əlməsix Ƴaysa, as isla i batu ten, izzərəz

əşşərixa har iyyan əzəl, inna: «As d-osa Lusəyas wa n kumanda ad əxtəsa əşşərixa-nawan.»

²³ Təzzar omar Felikəs kabtan s ad agəz Buləs, mišan ad wər itəwədgəz, wala itəwəgdəl y aytedan-net a daɣ-as əssənan.

²⁴ Arat n adan dəffər awen, osa-du Felikəs iddew əd təntut-net Drusilla, təmosat wələt əlyəhud; təzzar isassaɣra-du Buləs, issəsam i salan win itaggu daɣ batu n əzəgzan s Əlməsix Ƴaysa.

²⁵ Mišan as d-ewad Buləs isalan win əqqalnen taqqat d ənudi daɣ man d əşşərixa ən Məşşina wa d-izayan, təggaz tasa Felikəs, inn-as: «Əmərədda aglu, as əgrawa təmazayyat n a dər-ək məşiwala, a kay-d-ələsaɣ əsəssəɣri.»

²⁶ A itaggu Felikəs awen, igâ attama daɣ ad t-akfu Buləs azrəf, adi fəl t-id-isasaɣru itaggu dər-əs takkayt.

²⁷ Awen da a igan har əgan əşşin elan. Igmad Felikəs tizart, iggaz Borkəyəs Festus edag-net. Oyya-du Buləs daɣ kasaw fəl ad agu tənəfust i Kəl-Əlyəhud.

25

Tebadday ən Buləs dat Festus – Buləs issof a das-işrəɣ Qaysara wa n əmənokal wa zəwwəran

¹ As iga Festus karad adan d iguz ən tizart ən Yahudəyya, igmad aɣrəm ən Qaysarəya, iggəzzay əs Yerusalam.

² As din-osa, əmmənayan dər-əs muzaran ən limaman əd muzaran ən Kəl-Əlyəhud, əxtasan ɣur-əs Buləs. A tu-tansayan,

³ a dasan-agu tənəfust n ad d-issuku Buləs Yerusalam y a daḡ-as iṣrəḡ. A gannin awen, əntanay əgân eyaf fəl a das-bəkəmmeṉ daḡ tarrayt, aḡin iman-net.

⁴ Mišan inn-asan Festus: «Buləs kasaw wa n Qaysarəya a daḡ itawattaf, amaran ənta iman-net ad iqqəl tarmâd.

⁵ Daḡ adi idawanet dər-i muzaran-nawan əs Qaysarəya, əḡətəsanet-tu den da kud ill-ay a iḡşâd.»

⁶ Iga Festus daḡ Yerusalam adan əllanen gər əttam əd maraw, amaran iqqal Qaysarəya. As əzəl wa dəffər wen, iqqim daḡ adag wa daḡ iṣṣarraḡ, təzzar omar s a dat-əs itəwəsəbdəd Buləs.

⁷ As d-osa Buləs ḡalayḡalayan-tu Kəl-Əlyəhud win d-əḡmadnen Yerusalam, a tu-ḡattasan sawaran-tu igi n aratan aggotnen labasnen as wər əfregan əsəttəddi-nasan.

⁸ Iṣṣewal Buləs y ad aḡəz iman-net, inna: «Nak wər əḡeḡ ark amazal waliyyan immâran əṣṣəriḡa ən Kəl-Əlyəhud, za wala Ehan wa Zəwwəran n Əlḡibada wala deḡ əḡeḡ-qu i Qaysara əmənokal wa zəwwəran.»

⁹ Festus irân igi ən tənəfust i Kəl-Əlyəhud, inna i Buləs: «Awak tərḡeḡ s ad taggazzayaḡ əs Yerusalam dak-daḡ-as-əṣrəḡa aratan win di?»

¹⁰ Inn-as Buləs: «Kala, kala! Edag n əṣṣəriḡa wa, in Ərrum; daḡ adi da da ad za təwəṣrəḡa. Wər əḡṣeday arat waliyyan i Kəl-Əlyəhud, kay iman-nak təssânay wəllən daḡ adi.

¹¹ Kud əṣṣəriḡa a əmməzraya, madeḡ əḡeḡ arat a di-issiwaran tamattant, ərḡdeḡ əs tamat-

tant. Mišan kud aratan win as itawanna əxşâdaq-qan bahu a əmosan, wədi wər t-illa awedan ilân tarrayt n a di-agu daḡ fassan-nasan. Amaran, dad zamas adi a igan, wədi əmənokal Qaysara as areḡ a di-işrəḡ.»

¹² İmaşşawwar Festus əd məşşewwar-net, amaran inna i Buləs: «Əmənokal Qaysara as təreḡ a dak-işrəḡ, a tu-takka za.»

Tebadday ən Buləs dat Agriffa əd Bernikəs

¹³ Arat n adan dəffər awen, osa-du əmənokal Agriffa ayxəm ən Qaysarəya, iddew əd tamadrəyt-net təgât Bernikəs fəl ad əssəsləman Festus aḡin-as alafəyet d assa.

¹⁴ Adan aggotnen win əḡan den, idkal-du daḡsan Festus y əmənokal Agriffa isalan ən Buləs, inn-as: «İlla aləs da, a d-oyya ənaxkim Felikəs daḡ kasaw.

¹⁵ Alwaq wa d-əkkeḡ Yerusalem, əxtasan-tu xur-i muzaran ən limaman d əmḡaran ən Kəl-Əlyəhud, əḡmayan daḡ-i a t-əzzəbəza s əşşəriḡa.

¹⁶ Mišan ənnex-asan, əşşəriḡa wa n Kəl-Ərrum wər itibəz awedan ar s ad işrâḡ. Kundaba innəbdad awedan d aytedan win t-əxtasnen, aḡəz iman-net daḡ arat wa itawasawar.

¹⁷ Adi a fəl dər-i d-əddewan əs Qaysarəya. Ose-du xas, as əzəl wa dəffər wen əqqima daḡ adag wa n əşşəriḡa omara s a d-ammaway aləs wen.

¹⁸ Əbdadan meddan win t-əxtasnen, mišan wər t-əssəwaran arak əmazal labasan waliyyan daḡ win əxila.

19 Awa zaḡnin təmazaq ḡas tēgât daḡ batu n əddin-nasan əd salan n aləs iyyan igân esəm Ƴaysa abâ, mišan igla Buləs immâl as iddâr.

20 Nak iman-in wər əssenay əmmək was z'əšrəḡa əzzənəf n aratan win den, adi a fəl əssəstanay Buləs kud irḡa s ad akku Yerusalām išrəḡ daḡ-as.

21 Mišan issof a das-išrəḡ Qaysara s ənta əmənokal wa dənnəḡ mənokalan. Adi a fəl omara s ad itəwigəz har t-itəwəsuku.»

22 Amaran inna Agriffa i Festus: «Nak da areḡ ad asla y aləs wədi.» Inn-as Festus: «Tufat a das-taslaḡ.»

23 Əzəl wa dəffər wen iga-du əmənokal Agriffa assa wa n mənokalan ənta əd tamadrayt-net Bernikəs. Əggazan ehan wa n əššəriḡa əddewan əd kumandatan ən sojitan əd mizwaran n əḡrəm. Omar Festus s a d-ammaway Buləs, təzzar immeway-du.

24 Amaran inna Festus: «Əmənokal Agriffa, əd kawanay ketnawan win əmmənaynen da, ənta da aləs was əddəlil-net a fəl di-d-osan Kəl-Əlyəhud kul, daḡ Yerusalām harkid deḡ da da, gannin s afalla wər imməkkan ad iləs təməddurt.

25 Amaran nak za, wər ənayayḡ as iga əmazal waliyyan a t-issiwaran tamattant, mišan dad zamas ənta iman-net a igmayan a das-išrəḡ əmənokal wa dənnəḡ mənokalan, wədi əge tanat təmosat a das-t-əssuka.

26 Dər iga awen da ya, wər əssenay fəl arat waliyyan igmâd aššak daḡ talḡa-net a din-z-əktəba y əmənokal wa dənnəḡ mənokalan. Adi

a fəl t-əssəbdada dat-wan, wəllen kay əmənokal Agriffa, fəl a tu-nəssəstən, əssənaɣ awa z'əktəba daɣ talɣa-net;

²⁷ fəlas wər sər-i ila almaɣna ad əssuka Qaysara amaskasaw as din-wər-əməlay əddəlil wa fəl itawattaf.»

26

Aljawab wa iga Buləs dat Agriffa

¹ Inna Agriffa i Buləs: «Təgrawa turagat n awal, tagəzaɣ iman-nak.» Təzzar izzal Buləs əfus-net y a das-təssəsəm tamattay, inna:

² «Ya əmənokal Agriffa, əbbələl zəwwəran a di-təmos tahakkay ta di-təgeɣ azalada turagat n aggaz ən man-in daɣ aratan kul win as ənnan Kəl-Əlyəhud əɣšadaq-qan,

³ wəllen as əhân-kay salan wəllen n alyadaten-nasan kul d aratan kul win fəl tamazaɣan. Daɣ adi, onsayaq-qay ad taga tazaydart, təssəsəməɣ-i.

⁴ Kəl-Əlyəhud kul əzdâyan-i harwa ɣur təmmədrəyt-in. Əssânan daɣ awa əgeɣ kul daɣ tamattay-nin harkid deɣ daɣ Yerusalam.

⁵ Irəw as di-əzdayan, amaran as imos as ərdân, əfrâgan a dak-aggayyen as, taggayt ta n Fərisaytan a əheɣ, s ənta a togarat əzəzzəwi daɣ əddin-nana.

⁶ Əmərədda nak da ibdadan da šarraɣa fəlas əgeɣ attama daɣ arkawal wa iga Məššina i marawan-nana.

⁷ Attama en da a əganat tawšeten-nana an marawat əd sanatat, eway-du sər-əsnat awen əlxibada ən Məššina əs gəllejat ehad ezal,

əqqâlnat y ad andu. Ya əmənokal-in, Agriffa, attama en da za, a fəl di-əxtasan Kəl-Əlyəhud.

⁸ Ma fel as dawan-orna kawanay Kəl-Əlyəhud əzəgzan âs Məşşina ilkâm ad d-issənkər inəmməttan?

⁹ Nak iman-in, kala a xur-i illa as, iwâr-i igi n arat kul wa əfraga fəl a din-anxa esəm ən Yaysa wa n Nazaret.

¹⁰ Arat wen iman-net a əgey day əxrəm ən Yerusalam. Əkfan-i day-as muzaran ən limaman turagat, təzzar əbazax inalkiman ən Yaysa aggotnen əgeq-qan day kasaw. Əwârax aganna ən win tan-əbaznen s əşşərixa wa n tamattant ta n kərəz.

¹¹ Əyyəwanax ilum gər nan ən Kəl-Əlyəhud win əlxibada tawaddabaq-qan, şahaşşalaq-qan əbudər ən Yaysa. Awa dasan-əge day gezzar, lakkamaş-asan əs xərman ən kallan win tamawen.

¹² Əzəl iyyan əşşokala day awen da əkkeş Damas, əgrâwa turagat xur muzaran ən limaman n igi n awen imos as əntanay a di-əganen day əşşəxəl wen.

¹³ Ya əmənokal-in, ewâyax əd tarrayt ammas n azal wala a ihogan ənayax ənnur a d-igmâdan ijənnawan ogaran wa n təfuk əmələwləw as ibalazzat day xələyxələyan-nana, nak d aytedan win dər əddewa.

¹⁴ Nuda ketnana, təzzar əsleş i wa di-innan day təlxibrit: "Talut! Talut! Mas di-təzaxazzaba? Tugəyt-nak əs ləkkum i tara-nin, wər tənfa wala; wər təzlay əd ta n ays iddag məşşis əs xayman."

¹⁵ Ənnex-as: "Əməli, ma təmosax?" Təzzar inn-i Əməli: "Nak awa, Yaysa wa təzaxazzaba."

16 Mišan ənkar, təbdədaḡ, fəlas ənifalalaḡ-ak fəl a kay-aggay amaššaxal-in əd təgəyya-nin a za taggayet y aytedan anay wa [di-]təgeḡ, taggayeḡ-asan deḡ awa kay-z-assakna dəffər awa.

17 A kay-aggaza daḡ Kəl-Əlyəhud, əd təmattiwen šin tan-wər-nəmos, əzəmmizəlaḡ-qay sər-san,

18 fəl ad tara šittawen-nasan, təkkəsaq-qan-du daḡ šiyyay s ənnur, əgmədan-du tarna ta n Iblis əlkəman i Məššina, fəl ad əgrəwan təsureft ən bakkadan-nasan, əgrəwan deḡ tadagart daḡ mizdagan əs tarrayt n əzəgzan sər-i."

19 Ya əmənokəl Agriffa, əddəlil wədi a fəl wər əmməzrayay awa di-d-inafalalan, igmād-du ijənnawan. Igi ən Məššina a imos.

20 Kalar azzaray əs Kəl-Əlyəhud win Damas əd win Yerusalam, d aytedan win Yahudəyya ketnet, d aytedan win wər nəmos Kəl-Əlyəhud, taggaḡ-asan təlxutbat gannaḡ-asan, iwâr-tan ad utaban, ahdin-du əs Məššina, agin imazalan əssiknanen tətub-nasan.

21 Əddəlil n awen da a fəl di-əbazan Kəl-Əlyəhud daḡ Ahan wa Zəwwəran n Əlxibada, əgmayan əd tanaḡay-nin.

22 Tadhəlt ta di-iga Məššina a di-du-təšaššawadat əzəl wa n azalada, təbadday ta əge da taggaḡ isalan-net y aytedan gər win wər nəla almaqam, wala win t-əlanen, wər d-əššotay wala daḡ salan ən was əmalan ənnəbitan sa hadan d ənnəbi Musa âs a d-asu;

23 a t-imosan as, Əlməsix ilkâm ad inəy alḡazab, iba-tu, izar-du deḡ i nəmməttan

tanakra, iməl ənnur wa ihakku Məššina, imosan isalan n əlğillas, i Kəl-Əlyəhud d aytedan win tan-wər-nəmos.»

24 Harwada iššewal Buləs, išarrağ fəl man-net, as idkal Festus əməsli-net, inna: «Kay Buləs əmməskəl a təgeğ, igət ən tağaray ta təgeğ isammaskal-kay.»

25 Inn-as Buləs: «Əmizwar Festus, nak wər əmməskala. Kalar awa ganna da, tidət a imos, təkfât əs tayttay.

26 Amaran əmənokal Agriffa əhân-tu salan win di. Adi a fəl wər əksudağ igi-nasan dat-əs, fəlas əkkâsağ aššak as, wər tan-iha waliyyan a das-ijhâlan, id wər tawaggan dağ əssir.

27 Əmənokal-in Agriffa awak təzzigzanay s awa ənnan ənnəbitan? Əssânağ as təzzigzanay sər-əs.»

28 Təzzar inna Agriffa i Buləs: «Torda-nak a di-taga əlməsixi fəl arat n amazay!»

29 Inn-as Buləs: «Gər za fəl arat n amazay wala, əgmâya dağ Məššina a kay dər-i išaššalan, kay harkid aytedan kul win di-əssəsammen da azalada, as wər əhen sassaran win.»

30 Təzzar inkar əmənokal Agriffa əd Festus wa n ənaxkim əd Bernikəs d aytedan kul win dər nağaman,

31 əgmadan tinəmənnin gar-essan: «Aləs wen wər iga arat waliyyan as ihor a fall-as ammat wala değ iggəz fall-as kasaw.»

32 Amaran inna Agriffa i Festus: «Aləs wen ənnar wər igmay a das-işrəğ Qaysara əmənokal wa zəwwəran, itəwəyyu.»

27

Əmiway ən Buləs s əyrəm n İrrum

¹ As itawanna ad nəggəz aɣlal n aman nakku akal n Italəya, itawagga Buləs ənta əd wiyyad iməskəsa daɣ əfus ən kabtan iyyan igân esəm Yuləyus ihân egan ən sojitan as itawannu «Wa n Qaysara».

² Təzzar nəggəz aɣlal n aman n əyrəm n Adramutenəs ikkân ikallan n Asəya win əwarnen efay n agaraw. Ih-âna Aristarxus imosan awedan n əyrəm ən Tesalonik n akal wa n Masedonəya.

³ As əzəl wa dəffər wen, nəzzəbbat daɣ əyrəm ən Sidon. Yuləyus imosan awedan isâknin Buləs əlluɣ, ikf-ay turagat n ad akku imidawan-net win əhanen aɣrəm wen fəl a daɣ-as əssənan.

⁴ As dər-naɣ igmad əɣlal n aman Sidon, nəllil əsəlim n agaraw daɣ nəha ifi n akal imosan gərwətlan as itawannu Qibrus fəlas aɣu dər nəmməqqas.

⁵ Dəffər awen, nəşşokal fəl agaraw was iwar akal ən Kilikəya əd wa n Banfiləya tama-net, newad-in aɣrəm ən Mira ihân akal wa n Lukəya, nəzzəbbat daɣ-as.

⁶ Igraw daɣ-as kabtan wa dər nəddew iyyan aɣlal n əyrəm n Alaskandrəya, itakkin akal n Italəya, ig-ana daɣ-as.

⁷ Nəga adan aggotnen nəsilalam fəl aman sollan, gərrid as din-nəhoz aɣrəm ən Kənidos. Təgdal-ana assahat n aɣu ad naglu daɣ anamod wen, təzzar nənnamad akal imosan gərwətlan

as itawannu Kəret. As nokay fəl Salmone, nəmmoday i Kəret, nəggaz ifi-net.

⁸ Gərrid as nəllil əsəlim n agaraw har newad edag igân esəm «Izəzzəbba win Hossaynen n əxlalan» inimahazan d əyrəm ən Lasaya.

Tazafa d alamaz n aman aylal

⁹ Isilalat-ana əşikəl wen wəllen, əşikəl day əxlal n aman deɣ əmərədda iggaz-tu alɣarar, fəlas wala əzum ən Kəl-İlyəhud wa n ɣarat okay. Adi a fəl iga Buləs y aytedan win ənnodanen day əxlal n aman ənnəsixa, inn-asan:

¹⁰ «Meddan, hannayaɣ as əşikəl-nana ad t-iggəz iba ən taɣara d əɣşud zəwwəran. Wərgəɣ aylal n aman ɣas əd lalan-net a z'əhləknən, kalar nakkanay da, ad nəggəz tazak ten.»

¹¹ Mişan issof kabtan iduf ən batu ta dasan-iga aləs wa ewayan aylal n aman əd wa t-ilan, iduf n ənnəsixa wa dasan-iga Buləs.

¹² Dad imos as azazzabbaw n əxlalan n aman wen wər day-as oley ikus ən təgrəst, tənkar taşşam n aytedan win maşşayalan n əxlal əgan tanat ad aglin, əgməyan d aggad n iyyan aɣrəm imosan azazzabbaw n əxlalan n aman igân esəm Fenikəs ihân akal imosan gərwətlan as itawannu Kəret, əkkəsan tagrəst day ɣayanɣayan-net s iyyan iswād sa sər agala day ataram, wa hadan sa sər tamasna day ataram.

¹³ Əllan den da as d-igar arat n aɣu wa n agala, təzzar əkkasan y əxlal anaday, əqlan, sammaɣayan y akal imosan gərwətlan ən Kəret day əhozan təşəşwit-net, əxilan ad əfrəgan əmərədda igi n awa əran.

14 Mišan wər əhogan əd teklay as fall-asan du-təgar tazafa təsohet as itawannu ta n tamasna day dənnəg, təgât esəm Yurakilon, a dasan-du-təgât iguz wa n akal ən Kəret.

15 Təzzar ibat ađu ađlal n aman, indar-ana iduf-net, igla dər-nađ ibât-tu ađu.

16 As nəggaz ifi n arat n akal imosan gərwətlan, igân esəm Kawda, nəga y arat ən təđlalt n aman ilwây ađlal wa nəha, təməwit ta nərə gərrid.

17 Ədkalan-tat-du mašşaxalan n əđlal, əgan-tat day ammas n əđlal, təzzar əssəđlayan-du ađlal n aman ketnet iđunan zawwarnen otaban-as sər-san fəl a tu-wər-zəmməzzəyan aman. Əssərasan afər wa isakaf ađu isəluləm fəl aman fəl ad agu sollan, fəlas əksudan ad istəb əđlal y amadal day adag igân esəm Surtis a day gəzzul agaraw, igla əđlal ibât-tu dər-nađ ađu.

18 Awa təga tazafa en day assahat, as əzəl wa hadan a din-əggaran mašşaxalan n əđlal ilalan day agaraw fəl ad ifsas əđlal.

19 As əzəl wa n karad, əgaran-in day aman əs fassan win-da-nasan isəssəkna n əđlal.

20 Təfuk wala etran nəgâ adan aggotnen wər tan-nənay. Awa təga tazafa en day assahat, nəkkas fadda attama ən man-nana.

21 Adan en nəg-en wər t-illa i itšan arat, təzzar ibdad Buləs day ammas n aytedan, inna: «Meddan, ənnar tətâtâfam ənnəsixa wa dawan-əgeđ, taqqamim da wər du-təgmedam akal wa n Kəret; əddi wər kawan-z-igrəw iba n tađara wa d əhluk wa.

22 Amaran əmərədda əgmâya daḡ-wan ad wər təkkesam attama, fəlas wər kawan-iha i z'əgmədan man-net, mišan ya aḡlal n aman ənta a danaḡ-igməd.

23 Əndod a di-inafalal angalos ən Məššina wa di-ilan, əheḡ əššəḡəl-net,

24 inn-i: "Buləs, a kay-wər-təggəz tasa, Qaysara wa n əmənokal wa zəwwəran, kundaba təbdəda dat-əs išrəḡ-ak. Amaran ənəy, Məššina ig-ak arraxmat təmosat aggaz n aytedan kul win dər tənamaha aḡlal n aman da."

25 Daḡ adi meddan ad wər təkkesam attama, fəlas əzzigzanəḡ əs Məššina. Awa di-inna den, ad agu s əmmək en da.

26 Amaran kundaba istab dər-naḡ əḡlal n aman i təšəšwit n akal iyyan imosan gər wətlan.»

27 As iga adawannay n ahad n əzəl-nana wa n maraw d əkkoz təgâr fall-ana tazafa, ibât dər-naḡ aḡu aḡlal fəl agaraw igân esəm Adrəyatik, ənnəfrayan maššaxalan n əḡlal n aman d as amaḡal wər iggug.

28 Təzzar əgaran daḡ aman aḡan y sər-əs əḡətan təzzəgrət n agaraw. Təqqal təzzəgrət n aman daḡ adag wen əssayat təmərwen n əḡil d əkkoz. As əgan amazay, əlasan taḡḡot, osan-in edag wen təmos təzzəgrət-net səmmosat təmərwen n əḡil əd sədis.

29 Təggaz-tan tasa n ad infəl əḡlal n aman i təhun, təzzar əgaran daḡ aman daḡ ələqqam n əḡlal əkkozat təzoliyawen šin as tu-naddayan, amaran ad tattaran a taḡ-issəknan ezal.

30 Ad gammayan maššaxalan n əḡlal n aman ad addaggagan. Təzzar əssərasan taḡlalt n aman

ta əndərrat dağ agaraw, əgan əsarü âs a ərən ad əndəyan eɣaf n əɣlal əs šiyyad šizoliyawen.

³¹ Mišan inna Buləs i kabtan əd sojitan: «Meddan en, as əgmədan aɣlal wa, wədi wər dawant-illa aɣamad əd man-nawan.»

³² Təzzar olayan sojitan iɣunan win əqqannen təxlalt, əqlan dər-əs aman.

³³ As ibuk azal y igi, igmay Buləs dağ awedan kul ad atšu, inn-asan: «Azalada, əzəl-nawan wa n maraw d əkkoz d aššawaša labasan, wər t-illa arat as tərâm tettay-net, wala iyyan iggâzan imawan-nawan.

³⁴ Dağ adi əgmâya dağ-wan ad tatšim fəl ad tərəgam, fəlas wər kawan-iha i dağ in-z-iba wala anzađ iyyanda n aɣaf-net.»

³⁵ As inna Buləs awen, idkal-du tagəlla iga igodan i Məššina dat-san ketnasan, amaran ikarammat dağ-as, ad itattu.

³⁶ Təgmad-tan tasa ketnasan, ətšan əntanay da.

³⁷ Awa nəmos dağ əɣlal en ketnana, sanatat təmad n awedan d əssayat təmərwen əd sədis.

³⁸ As əyyəwanan a din-naqqalan alkama dağ agaraw fəl ad əssəfsəsan aɣlal n aman.

³⁹ As iga azal, ənayan maššaxalan n əɣlal as akal wa din-əhozan den wər t-əzdayan. Oggan əzazəl dağ təšəšwit, ənnan ad əgməyan d a sər-əs awəyan aɣlal har das-t-əssəstəban kud ad əfrəgan awen.

⁴⁰ Əkkasan šizoliyawen šin əndaynen aɣlal, oyyan-tanat-in s aman, oran deɣ iɣunan ən katakawtan win sanamadnen aɣlal. Dəffər adi əkkasan ađda y əfər wa ihan dat əɣlal fəl

ad t-issəkəf adu, amaran sannamawalan-tu əd təgadamayt iha əzazəl.

⁴¹ Mišan ənfalan i tageft n əzazəl təhât agaraw, ittıtay daɣ-as aɣaf n əɣlal, iməzzay d əmətəkəwəy; təzzar ad tərəzzu assahat [n tənazzamaren] ələqqam-net.

⁴² Ənayan sojitan awen ɣas, namannakan fəl ad əkkəsan iman daɣ məskəsa fəl ad wər išşəf waliyyan daɣ-san, addaggag.

⁴³ Mišan igdal-asan kabtan-nasan igi n awen, fəlas a ira ad agəz Buləs. Təzzar omar kabtan aytedan win əsannen ewet n aman, ad tərəggen daɣ agaraw izaran-in əs təgadamayt.

⁴⁴ Amaran aytedan win hadatnen, əntanay omar-tan s ad əwəran katakawtan əd gannatan n əɣlal win du-nassarnen. Emmək en da as ewadan ketnasan tagadamayt n agaraw əragan-du.

28

Buləs iha akal imosan gərwətlan as itawannu Malta

¹ As du-nərag daɣ awen, nəgmad-du aman, itawann-ana akal wen imosan gərwətlan, esəm-net Malta.

² Əssəknan-anaɣ aytedan n akal wen əlluɣ wər nəla tulat. Əgan-ana ketnana marhaba, əssəryan-ana temsay, fəlas akonak a iffayan, iga deɣ asamed.

³ Išşədaw-du Buləs eɣaf n eškan, ig-en daɣ təmsay, təkkas-du daɣ-san tuksay tašşolt, tədad əfus-net, təkarayray daɣ-as.

⁴ As ənayan kəl akal wen taššolt təkirayray daḡ əfus ən Buləs, ad tinəmännin: «Igmâd aššak as aləs wen əmæggi ən man a imos. Irag-du daḡ agaraw, mišan harwa da ilkâm-as əššəriḡa, wər ira ad iddər.»

⁵ Irsak-in Buləs taššolt, tørtak daḡ təmsay, wər t-illa a t-igrâwan.

⁶ Əqqalan aytedan y ad ihədədəy Buləs, madeḡ ifətəqqət iba-tu tamazayt ten da; mišan as ərəwan wər hənnəyan a t-igrâwan, əqqalan-du daḡ awa ənnan, ad gannin amaran: «Əməli iyyan awa!»

⁷ Edag en əhoznat-tu təwəgas ən Bubləyəs, aləs wa n əmuzar n akal wen. Izazzabbat-ana daḡ ahan-net, nəga karad adan nəniftay-as. Ig-ana marhaba əd məgura əknanen əlluḡ.

⁸ As itaggu awen, təzizalallat tanaday abba ən Bubləyəs, tørtây-as əd tədíst. Os-ay-in Buləs issəwar-tu ifassan-net, onsay-as Məššina. Izzozay-tu.

⁹ Dəffər awen a du-tasin miranan n akal wen win hadatnen, ətiwəzuzəyan.

¹⁰ Əssəknan-anay aytedan n akal wen saḡmar aggen, as nəggaz šin teklay daḡ əḡlal n aman iyyan. Əkfan-anay arat was nəddərər y əšikəl.

Assa ən Buləs ayxəm n Ərrum

¹¹ As nəga karadat təlil daḡ Malta, nəggaz aḡlal n aman a d-igmâdan ayxəm n Alaskan-drəya, as əwâran əssənəman as itawannu "win əknewan" eḡaf-net, s ənta da akal wen da imosan gər wətlan a daḡ ikkas tagrəst, nəgla.

¹² As nosa ayxəm ən Surakusa, nəga daḡ-as karad adan.

¹³ Nəgmad Surakusa nəgla har nosa aḡrəm ən Regəyon. As əzəl wa dəffər wen, igar-du aḡu wa n agala, nəgla. As əzəl wa hadan newad aḡrəm ən Batəyoləs.

¹⁴ Den da ad nəssəha fəl arat day nalkiman ən Ƴaysa, əgmayan day-na a ḡur-san nagu əssa adan. Dəffər awen nənnəmad aḡrəm n Ǝrrum.

¹⁵ As danax-əslan mədrayan-nana day əzəgzan win əḡrəm n Ǝrrum, əssəlkadan-ana-du əs təḡrəmt ta n Ǝssuk n Affəyus, wiyyad əssəlkadan-ana-du əs təḡrəmt as itawannu Ta n Karad Zəzzəbba. As tan-inay Buləs iga igodan i Məššina, ikna awen iman-net.

¹⁶ As din-nəggaz aḡrəm n Ǝrrum, irḡa əlxəkum i Buləs s ad iḡsər day ahan wər inamaha ar əd soji wa t-ogazan.

Təlxutbat ən Buləs day batu ən Ƴaysa Ǝlməsix day Ǝrrum

¹⁷ Karad adan dəffər awen, isassaxra-du Buləs imuzaran ən Kəl-Ǝlyəhud win əḡrəm n Ǝrrum. As d-əddewan inn-asan: «Imədrayan-in, nak wər nəḡšəd arat waliyyan i tamattay-nana wala deḡ əmmizraya aḡadaten šin du-nogaz ḡur marawan-nana, mišan əttərmasax day Yerusalam, tawagga day fassan ən Kəl-Ǝrrum.

¹⁸ As di-əšraḡan, əran di-ayyin fəlas wər əgeḡ arat waliyyan a di-issiwaran tamattant.

¹⁹ Mišan ənkarən Kəl-Ǝlyəhud ugayan s ad tawayya, iqqal-i əššil agamay n a di-išrəḡ Qaysara əmənokal wa zəwwəran, dər iga awen da ya wər əgeḡ ənnəyat n ad aga i tamattay-nana taxtəst waliyyat.

²⁰ Adi a fəl kawan-əssəgmaya, a kawan-ənəya, məšiwəla dər-wan. Isassaran win, wər sər-i tanded-way ar as əgeḡ attama-nin daḡ was əqqalan Kəl-Israyil.»

²¹ Ənnan-as: «Nakkanay za, wər nəgrew širawt waliyyat a du-təfâlat akal ən Yahudəyya daḡ talḡa-nak wala deḡ os-âna-du iyyan daḡ mədrayan-nana daḡ əddin, ag-ana isalan-nak madeḡ annu sər-ək ark arat.

²² Amaran nəra a dana-təməla kay iman-nak awa təsamadranax, fəlas arat iyyanda as danaḡ-əhan salan-net as, taggayt ta n tarrayt n Əlməsix Ƴaysa, wər t-illa adag a tat-wər-nəššek.»

²³ Təzzar namaggan dər-əs təmastant əzəl iyyan. As d-iḡlay əzəl wen, osan-t-idu s igət daḡ ahan wa iha. İššewal-asan əs gälleyat daḡ salan ən Taḡmar ta n Məššina wa n aḡora har iga ahad, isasagr-asan-tat. Isakn-en əs təməwit təsisagrət daḡ Əttawret ən Musa d Əlkəttaban n Ənnəbitan win hadatnen as, awa igannu əs Ƴaysa tidət daḡ a imos.

²⁴ Wiyyad əssokasan daḡ-san aratan win inna Buləs aššak, əzzəgzanan; win hadatnen ugayan s əzəgzan.

²⁵ Təzzar əmməzaxan gar-essan. As əggazan šin teklay, inna Buləs: «Tidət da a inna Infas wa Zəddigan i marawan-nana daḡ əmi n ənnəbi Isayas, as inna:

²⁶ "Aḡlu, akku tamattay en, tannaḡ-as: 'Ad tayyawan əsəsəm, mišan wər ilkem ad təgra wala, tayyawan asawad, mišan wər ilkem ad tənay wala';

²⁷ fəlas tamattay di, əsəḡər a təga əwəl-

net, gərrid as sallinat təməzzugen-net, təqqân šittawen-net; fəl ad wər tənəy za wala taslu, taqqam da wər təgra s əwəl-net, əngəm tutab, əzzuzəyaq-qat!"»

²⁸ Dəffər awen, inn-asan Buləs: «Əssənat za as, šimattiwen šin wər nəmos Kəl-Əlyəhud əntanatay da issok-enat-du Məššina isalan n efsan-net. Əntanatay a dasan-z-əssəsəmnen.»

²⁹ [As inna Buləs awen, əfalan-tu Kəl-Əlyəhud, əmmizaxan wəllen gar-essan.]

³⁰ Iga Buləs əššin elan əxrâdnən dəy ahan ixfâr ənta iman-net, itaggu marhaba y aytedan kul win əranen anay-net.

³¹ Itagg-asan isalan ən Taḡmar ta n Məššina, isasaḡr-en dəy arat kul wa iqqalan Əməli Ƴaysa Əlməsix ši wala tasa, wər t-illa dəy awedan a das-igdâlan awen.

**Ēlinjil ɔn Ȳaysa Ēlməsix Itawann-as dex
Arkawal wa Aynayan
Tamajaq, Tawallammat: Ēlinjil ɔn Ȳaysa Ēlməsix
Itawann-as dex Arkawal wa Aynayan New Testament
Le Nouveau Testament en tamajaq tawallammat,
écriture latine**

copyright © 2015 Wycliffe Bible Translators, Inc.

Language: Tamajaq, Tawallammat

Contributor: SIM International

All rights reserved.

2020-12-01

PDF generated using Haiola and XeLaTeX on 18 Apr 2025 from source
files dated 29 Jan 2022

3aaeb7b2-4a3b-51fe-8c2d-ed8c05d4be0f